

Lahona

E Tolu Mea
e Mafai ona
Tatou Faafetai
Atu ai Pea,

itulau 12

Mataulia ma le
Taulimaina o le Sauaina,
itulau 5, 18

Sailia o Tali i se Taimi
o le Taufaasese,
itulau 24

Auala e Fesoasoaini ai O Tatou
Maotatapuai ia i Tatou i a
Tatou Tapuaiga, itulau 38

UA I AI
IINEI LE
EKALEΣIA

Busan Korea i Sa





O Busan o le nuu lea o se tasi o siteki e 12 i Korea i Saute. O loo avea ma laumua o se misiona ia Busan. O ni nai mea moni nei e uiga i le Ekalesia i Korea i Saute:

tagata o le Ekalesia



88,418



12

siteki, 5 itu, 4 misiona



faapotopotoga

103

18



nofoaga autu
o talafaa losopito
o aiga

malumalu (Seoul)



1

1956

Uluai faifeautalai aloaia

1967

Na lolomiina ai le uluai Tusi a Mamona
i le gagana Korea

1973

Faatulagaina le uluai siteki

1985

Na faapaiaina ai le Malumalu o Seoul

1991

O le kopi lona tasi le miliona o le Tusi a
Mamona i le gagana Korea.

2020

Ua auai le aufaipese a Korea i Saute
i se ata vitio mo le viiga faai'u o le
konafesi aoao ia Aperila.





Auaunaga
e ala i le
Polokalama a
Tamaiti ma le
Autalavou
8



O Fatu ua Tuia i
Manu'a Loloto:
Malamalamā i le
Sauaina i totonu
o le Aiga
Saunia e Jason B.
Whiting

18



Ua Faa-
soa Mai e
Apostolo
Savali o le
Faamoe-
moe

12



Tumau i luga o le
Papa o Faaaliga
Saunia e Elder Lawrence E.
Corbridge

24

Puipua Mai le Sauaina

I sootaga manuia, e faatoese tagata ona o a latou upu ma faatinoga agaleaga ma faalagolago i le malosiaga togiola a lo tatou Faaola e fesoasoani ia i latou ia faaleleia ma salamo. Ae i tulaga e le manuia, e faaauau ai lava e tagata ona taulimaina isi ma le agaleaga, ma e mafai ona avea na fegalegaleaiga ma tulaga sauaina.

[O le sauaina ma isi] faiga faatiga faapena e leai se avanoa i le malo o le Atua," na aoao mai ai Peresitene Russell M. Nelson ("O Oa Faaleagaga," konafesi aoao Oketopa 2019). O le tele o tusiga o le mekasini a le Ekalesia i lenei masina o le a fesoasoani ia i tatou ia iloa ma taulima le sauaina:

- I la'u tusiga o i le itulau 18, o loo ou talanoa ai i uiga o le sauaina ma faailoa ai nisi o punaoa e fesoasoani ai ia te oe po o tagata e te silafia ia iloaina ma faamaloloina mai fegalegaleaiga faatautala.
- I le itulau e 58 o loo faasoa mai ai e se teineitiiti talavou lona aafiaga i le sauaina faalefeusuai a o laitiiti ma le auala na mafai ai ona maua le lototoa ma le malosi e tautala ai ma sailia se fesoasoani mai tagata matutua faalagolagoina ma le Faaola.

- I le Uo o lenei masina, i le itulau U12, e mafai ona e maua ai se gaoioiga tusitusi e fesoasoani ai e talanoaina ma lau fanau le "fai atu e leai." Mafaufau e faaaoga le gaoioiga lenei e fai ma faavae o se lesona i se afiafi faaleaiga e uiga i le puipua mai le sauaina.
- O le sauaina faalelagona e mafai ona matuai leaga e pei foi o isi ituaiga o sauaga. Faitau le "Iloaina o Sauaga Faalelagona" i le lomiga faaeletonika o lenei lomiga e aoao ai i faailoilo lapata'i e lima ma le auala e maua ai se fesoasoani.

Afai na e tiga, e mafai ona e liliu atu i le Atua mo se taitaiga ma se faamalologa ma sailia foi se fesoasoani mai tagata faatuatuaina. E malamalamā le Alii i mea o loo tatou lagonaina, ma o le a la tai-alaina i tatou i le saogalemu ma le olioli a o tatou liliu atu ia te la.

Talosia ia tatou tofu lagonaina uma le alofa o le Atua ma aapa atu ia te la i aso uma.

Jason Whiting, PhD
Aoga o le Olaga Faaleaiga a le lunivesite a
Polika laga

Anotusi

5 Faalauiologa o Sauaga ☸

6 Atatosi o le Faatuatua ☸

Sakiusa ma Salote Maiwiriwiri

O loo ola le aiga o le au Maiwiriwiri ma le olioli ma le faamoemoe i aso uma, e ui ina ua maliliu le toalua o le la fanau.

8 Mataupu Faavae mo le Auaunaga

Auaunaga e ala i le Polokalama a Tamaiti ma le Autalavou

E le tau tulia ina ia e i lalo ifo o le 18 tausaga lou matua e faaaoga ai le polokalama a Tamaiti ma le Autalavou e fesoasoani ai ia te oe i au taumafaiga tau auaunaga.

12 Ua Faasoa Mai e Apostolo Savali o le Faamoemoe

Auala e mafuta latalata atu ai i le Atua, auauna atu ma le alofa, ma agai atu i luma ma le onosai i le aluga o le faama'i i le lalolagi atoa.

18 O Fatu ua Tuia i Manu'a Loloto: Malamalama i le Sauaina i totonu o le Aiga

Saunia e Jason B. Whiting

Mataulia mamanu e lima o le sauaina ma sailia le faamoemoe ma le faamaloloina.

24 Tumau i luga o le Papa o Faaaliga

Saunia e Elder Lawrence E. Corbridge

O le sailiga mo le upumoni e amata i le sailia o tali i fesili autu.

30 O Leo o Le Au Paia o Aso e Gata Ai ☸

Ua maua e se aiga le filemu ma le olioli i le malumalu; o se paso ua maua ai le faamalologa; o se alii talavou ua toe maua se avanoa lona lua e faitau ai le Tusi a Mamona; o se alii talavou ua oo ina malamalama i le faamoemoega o lona papatisoga.

34 Sau, Mulimuli Mai ia te A'u: Tusi a Mamona 📖 ☸

O nei tusiga faalevaiaso e lagolago ai lau suesuega o le Tusi a Mamona i le masina lenei.

38 Maotatapuai---O Nofoaga o le Migao ma Tapuaiga

Saunia e Bishop Dean M. Davies

O lo outou maotatapuai o se nofoaga paia e mafai ona maua ai le tele o avanoa e lagonaina atili ai le malosi o le Agaga i lou olaga.

ⓘ Faitauga Vave

ⓘ Lagolago mo le Sau, Mulimuli Mai ia te A'u

I Le Faavaa
Atapue mai
Getty Images.




Vaega

Autalavou Matutua

44

E mafai ona avea mausa ma se filifili e taofiofia ai i lalo i tatou. E mafai ona tatou **maua le saolotoga pe a tatou aapa atu i lo tatou Faaola**, o le e alofa ia i tatou e oo lava i o tatou vaivaiga ma tauiviga.



Autalavou

52

Pe o e tauivi ma auaunaga i aso taitasi, faamalologa mai le sauaina, soifua maloloina faalemafau-fau, pe na o le ta'u o le igoa atoa o le Ekalesia, **e le na o oe.**



Tamaiti

Uo

Aoao e uiga i le **sefuluai** ma pe faapefea ona fesoasoani i lou aiga ia **ola fiafia atili**.



E NA’O TUSIGA FAATEKINOLOSI O OKETOPA

**37 Auala Eseese e Suesue ai Tusitusiga Paia**

Saunia e Marissa Widdison

Afai o le fiafia i ai, taumafai e suesue le talalelei i se tasi o auala nei nai lo lena.

**Matauliaina o le Sauaina Faalelagona**

Saunia e Nanon Tally

Ua faasoa mai e se fesoasoani o le Auaunaga Faaleaiga le ala e mataulia ma taulimaina ai le sauaina faalelagona i a outou fegalegaleaiga.

SAILI NISI MEA

I le polokalama o le Potutusi o le Talalelei po o le liahona.ChurchofJesusChrist.org, e mafai ona e:

- Maua ai le lomiga lenei.
- Maua ai na’o anotusi faatekinolosi.
- Saili lomiga ua mavae.
- Auina mai au tala ma manatu faaalia.
- Totogi [se lomiga] pe tuu atu se meaalofa o le totogi o se lomiga.
- Faaleleia au suesuega i meafaigaluega faatekinolosi.
- Faasoatutusiga ma vitio e sili ona e fiafia i ai.
- Sii mai pe lolomi ia tusiga.
- Faalogologo i tusiga e sili ona e fiafia i ai.

FAAFESOOTAI MAI I MATOU

Auina mai fesili ma manatu faaalia i le liahona@ChurchofJesusChrist.org.

la auina mai au tala i le liahona.ChurchofJesusChrist.org pe lafo mai i le:

Liahona, flr. 23
50 E. North Temple Street
Salt Lake City, UT 84150-0023, USA

OKETOPA 2020 VOL. 44 NU. 10
LIAHONA 16725 890

O le mekasini faavaomalo o Le Ekalesia a Iesu Keriso o le Au Paia o Aso e Gata Ai

O Le Au Peresitene Sili: Russell M. Nelson, Dallin H. Oaks, Henry B. Eyring

O le Korama a Apostolo e

Toasefululua: M. Russell Ballard, Jeffrey R. Holland, Dieter F. Uchtdorf, David A. Bednar, Quentin L. Cook, D. Todd Christofferson, Neil L. Andersen, Ronald A. Rasband, Gary E. Stevenson, Dale G. Renlund, Gerrit W. Gong, Ulisses Soares

Faatonu: Randy D. Funk

Faufautua: Becky Craven, Sharon Eubank, Cristina B. Franco, Walter F. González, Larry S. Kacher, Jan E. Newman, Adrián Ochoa, Michael T. Ringwood, Vern P. Stanfill

Pule Faatonusili: Richard I. Heaton

Faatonusili o Mekasini a le Ekalesia: Allan R. Loyborg

Pule o Mea Tau Pisini: Garff Cannon

Pule Faatonu: Adam C. Olson

Pule Faatonu Lagolago: Ryan Carr

Faasalalau Lagolago: Enish C. Dávila

Au Tusitusi ma Faatonutonu:

David Dickson, David A. Edwards, Matthew D. Flitton, Garrett H. Garff, Jon Ryan Jensen, Aaron Johnston, Charlotte Larcabal, Michael R. Morris, Eric B. Murdock, Joshua J. Perkey, Jay Pinborough, Richard M. Romney, Mindy Selu, Lori Fuller Sosa, Chakell Wardleigh, Marissa Widdison

Faatonusili o Faatufugaga: Tadd R. Peterson

Mamanu: Jeanette Andrews, Fay P.

Andrus, Mandy Bentley, C. Kimball Bott, Thomas Child, Joshua Dennis, David Green, Colleen Hinckley, Eric P. Johnsen, Susan Lofgren, Scott M. Mooy, Aleni Regehr, Mark W. Robison, K. Nicole Walkenhorst

Faatonu o le Puletaofia o Meatotino:

Collette Nebeker Aune

Pule i le Gaosiga: Ammon Harris

Gaosiga: Ira Glen Adair, Julie Burdett, José Chavez, Bryan W. Gygi, Ginny J. Nilson,

Mariissa M. Smith

Tailolomi: Joshua Dennis, Ammon Harris

Faatonusili Lomutisi: Steven T. Lewis

Faatonusili o Faletusi: Nelson Gonzalez

Mo le okaina o mekasini, alu i le store.ChurchofJesusChrist.org po o le Faletusi Tutotonu i Pesega. Telefoni 64127. Totogi o le Mekasini: \$0.55 (Samoa) 1 i le kopī. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le liahona.

ChurchofJesusChrist.org: pe meli mai i le *Liahona*, flr. 23, 50 E. North Temple, Salt Lake City, UT 84150-0023, USA; po o le i-meli: liahona@ChurchofJesusChrist.org.

Liahona (o lona uiga i le Tusi a Mamona o le "tapasa" po o se "faatonuā") e lomia i le faa-Alepania, Aminia (Sasae), Pisilama, Palekeria, Kemputia, Sepuano, Saina, Kalaoia, Siekisolvaki, Tenimaka, Take, Igilisi, Esitonita, Fit, Finelani, Farani, Siamani, Eleni, Hanikeri, Initu, Iselani, Initonlesia, Italia, Japan, Kiripati, Korea, Lativia, Litunia, Malakasa, Masela, Monokolia, Nouei, Polani,

Potukale, Romania, Rusia, Samoa, Saina (ua faafaigoine), Silovenia, Sipanilo, Suetena, Swahili, Tagaloka, Tahiti, Tai, Toga, Iukureini, Urutu, ma Viatename. (E eseese lava gagana.)

© 2020 Puletaofia e le Intellectual Reserve, Inc. Ua taofia aia tatau uma. Lomia i le lunaite Setete o Amerika.

Faamatatalaga o le Puletaofia: Vagana ua faailoa mai, e mafai e tagata taitoatasi

ona kopī anomea mai le *Liahona* mo lo latou lava faaagaina patino, e le faia ai ni pisinī (e aofia ai valaauga o le Ekalesia). O leni aia tatau e mafai ona faaleaogaina i soo se taimi. E le tatau ona kopīna ia ata pe afai o loo faaalia le faasaina i le laina o faaaloaloga faatasi ai ma le faatufugaga, la auina mai fesili e uiga i le puletaofia e le Intellectual

Property Office, 50 E. North Temple St., FL 13, Salt Lake City, UT 84150, USA; email: cor-intellectualproperty@ChurchofJesusChrist.org.

Mo le Aufaitau i le lunaite Setete ma Kanata: October 2020 Vol. 44 No. 10. LIAHONA (USPS 311) Samoa (ISSN

1045-0947) is published monthly by The Church of Jesus Christ of Latter-day Saints, 50 E. North Temple St., Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (American Express, Discover, MasterCard, Visa) may be taken by phone or at store .ChurchofJesusChrist.org. (Canada Post Information: Publication Agreement #40017431)

POSTMASTER: Send all UAA to CFS (see DMM 507.15.2). **NONPOSTAL AND MILITARY FACILITIES:** Send address changes to Distribution Services, Church Magazines, P.O. Box 26368, Salt Lake City, UT 84126-0368, USA.



FAALAUUILOAGA O SAUAGA



E ui ina tatou faamoemoe uma o le a taulimaina ma le faaaloalo tagata uma, ae o nisi tagata e saili e faatiga, pulea, pe faaseseina isi. O na ituaiga o amioga faataumaoi ua taua o le sauaina. E le tusa ai ma le talalelei a lesu Keriso, lea e aoao ai i tatou ia alofa le tasi i le isi ma ia taulimaina isi e pei ona tatou mananao ia taulimaina ai i tatou (tagai i le Mataio 7:12; Ioane 13:34; Mataupu Faavae ma Feagaiga 121:36–37).

O tagata e afaina ai e masani ona faatautala/sauaina e na tagata latou te iloa.

Atonu o le tagata na solitulafono o se tagata o le aiga po o se tasi na latou feiloai muamua i ai. E le o fautua atu e tatau ona tatou popole mo tagata uma tatou te iloa, ae e mafai ona tatou vaavaai mo—maa aoao a tatou fanau e vaavaai mo—isi faailoga nei e fa.

E masani ona sailia e tagata solitulafono tagata agavaivai.

E saili e tagata solitulafono i latou e ono le mafai ona tuuina atu le maliega pe puipuia i latou lava.

**O LE SAUAINA E I AI NI FAAILOGA MASANI.
O NI FAAILOGA NEI E LIMA E VAAVAIA
INA IA MAFAI ONA FESOASOANI E
TAOFIA AI PE TUU AI LE SAUAINA:**



E masani ona taumafai tagata solitulafono e faaesea tagata ua afaina.

O le faaaogaina o le faaesea po o le taufaamatau, e masani ona saili tagata solitulafono e taofia o latou tagata ua afaina mai le aapa atu mo se fesoasoani.

E masani ona amata e tagata faatautala/ faasaua i le soli po o le sopo tuaoi.

E tupu le faatautala/sauaina pe a i ai se soliga matuia o tapulaa mo amioga talafeagai ma le gagana i isi. E ono le amanaia e tagata solitulafono tuaoi po o le amata foi ona solia laiti, ina ia mafai ai ona faavaivaia le tagata ua afaina.

O tagata solitulafono atonu e faasolosolo malie ona saili e atiina ae le faatuatuaina a o lei faia le faatautala.

Ua taua lenei mea o ni “faatosinaga” ma e masani ona tupu i le autalavou ma fanau. O amioga faatosina e mafai ona aofia ai le talosagaina o ni taimi e na o ia ai ma lena tagata, uunaia le faalilolilo, talanoa i mataupu faalefeusuaiga, po o le faaali atu o ponokalafi pe amata se fesootaiga faale-tino ma le tamaitiiti.



Sakiusa ma Salote Maiwiriwiri

Suva, Fiti



E faigata lava ona ou talitonu i le filemu ma le fiafia sa ou maua i le fale o le au Maiwiriwiri. E ui ina e toalua le la fanau ua maliliu, ae o loo soifua ma le fiafia ma le faamoemoe i aso uma.

LESLIE NILSSON, TAGATA PUEATA

Salote:

E lua tausaga na mavae talu ona maliu lo ma atalii o Esa i le kanesa o le mamā, ae maliu le ma tama teine o Esalynn i le fula o le 'afu'afu o le fiafia. I totonusi o le malumalu, sa ou lagonaina se uunaiga malosi e talanoa i se faifeautalai tamaitai matua iina, o lē foi sa maliliu lana fanau e toalua i ni tausaga ua mavae. Sa ia fai mai, "Afai e te faia lou fale o se nofoaga paia, e mafai ona e lagonaina le i ai o lau fanau iina."

Na avea lena mea ma a ma'u sini. O mea uma ma te faia e fai ina ia avea lo matou fale o se nofoaga paia. Ma te mananao ia lagonaina lo la latalata mai.

Sakiusa:

O le aafiaga i le maliliu o Esa ma Esalynn, ua matuai vavalalata ai lava lo matou aiga. Matou te fefautuui faatasi ma isi o le ma fanau. Matou te o i le malumalu o se aiga. Ua matou ola i o matou olaga i se ala e sili ona faigofie ma filifili le lotofaafetai i aso uma. A matou talanoa e uiga i le faamauina o se aiga i le malumalu, e olaola lena faamauga i totonusi o i matou. Ma e ala i nei mea uma, ua matou lagonaina ai le faatasi mai o le ma fanau.

SAILILI ATILI

Tagai atili e uiga i le faigamalaga o le faatuatua a Sakiusa ma Salote, e aofia ai ata faaopoopo, i luga o le initoneti po o lenei tusiga i luga o le Gospel Library i le ChurchofJesusChrist.org/go/10206.

Ua faasoa mai e Elder Ronald A. Rasband le ala e mafai ai ona tatou faamalolosia o tatou fale ia avea o ni nofoaga o le alofa ma le puipuiga faaleagaga i le ChurchofJesusChrist.org/go/10207.

Mataupu Faavae o le Auaunaga

AUAUNAGA E ALA I LE POLOKALAMA A TAMAITI MA LE AUTALAVOU

*Valaauiina o isi ia ola ma fesoasoani ia i latou
i luga o le ala o le fatu lea o le auauana.*

Eanoanoai avanoa mo le auauana e ala i le polokalama a Tamaiti ma le Autalavou. Atonu o i ai sau fanau laiti po o ni talavou i le fale. Atonu o oe o se taitai i le polokalama po o oe foi o se auauana i aiga e i ai tamaiti ma ni talavou. Pe atonu foi e te *ono iloa* ni tamaiti ma ni talavou (e ono aofia uma ai i tatou). Po o le a lava lou tulaga o i ai, e tele auala e faaaoga ai le polokalama po o ona mataupu faavae e faamanuiaina ai olaga o isi.

Atiina ae Faatasi o i Tatou Lava

I le fatu o Tamaiti ma le Autalavou o loo i ai se taulaiga o le taumafai i aso taitasi e avea atili e faapei o le Faaola, o lē na auauana mai i le atoatoa. O le toatele o i latou ua auai i le faatinoga o le polokalama ua aoaoina e faapea o le tele o lou alualu i luma i itu eseese o lou olaga, o

le lelei tele foi lena o le faaaupegaina o oe e fesoasoani ai pe auauana atu i isi.

Ae i le polokalama a Tamaiti ma le Autalavou, o le faamanuiaina o isi e le tau faatali seia e aoaoina se mea. O le faatinoga o le aoaoina lava ia, e maua ai avanoa e auauana atu ai.

Mo se alii talavou e igoa ia Perofeta e nofo i Kana, na faatuina le sini i Tamaiti ma le Autalavou e aoao pe faapefea ona taina le piano sa na o se amataga. “O la’u sini o le fesoasoani foi i isi tagata ia iloa le mea lea ou te aoaoina,” o le tala lea a Perofeta.

E ui e lei avea o ia o se faiaoga, ae ua tuputupu ae lana sini ua avea o se mea telē atu nai lo le mea sa ia mafaufaufina. Ua to’ā 50

nei tamaiti ua i ai i le vasega tapiano i le faletapuai faatasi ai ma Perofeta. Ma mata o ai o aoaoina ia Perofeta ma isi tamaiti e to'a 50? Alexander M. ma Kelvin M., e ta'i 13 uma o la tausaga. "Ma te mananao e faaali atu taga o le agalelei i isi tagata," ua fai mai ai Kelvin.

E tolu aso i le vaiaso e aoao atu ai e le autalavou ia e toalua ia lesona amata o le piano e le totogiina ia i latou

uma e o mai e aoao. Ua i ai se aoga faaopoopo i lesona tapiano. Ua toatele tamaiti a'oga piano ua folasia atu i ai le Ekalesia e ala i lesona tapiano mulimuli ane, ua aoao i le talalelei ma ua tonu ia i latou e papatiso.

Ao tatou faia taumafaiga e faaleleia i tatou lava, e mafai ona tatou auauna atu i isi e ala i le valaauliaina o i latou e auai mai faatasi ma i tatou.



ATA NA PUEINA E ISAAC DARKO-ACHEAMPONG

ATA NA PUEINA E ALEXANDER K. BOATENG



O Se Fua Manumalo mo Auaunaga

I le avea ai o se peresitene o le Peraimeri i le siteki, o Sabrina Simões Deus Augusto o Curitiba, Pasila, ua vaaia le ala ua faamanuiaina ai e itu o le atina'ega patino o le polokalama a tamaiti ma le autalavou i lana siteki. Ae ua ia vaaia foi le tele o auala e faaaoga ai mea sa ia aoaoina e uiga i le atinaega patino i lona tofiga o se tuafafine auauna atu.

"Ina ua ou atiina a'e se taleni," ua saunoa ai Tuafafine Augusto, "ua mafai ona ou faaaogaina lena taleni e faamanuia ai se tasi ou te auauna atu i ai."

Sa aoaoina e Tuafafine Augusto se tasi o tuafafine na tofi i ai o ia, i le ala e fai ai ia lole sukalati. Ua fai nei e lena tuafafine ma faatau atu lole e fesoasoani ai i le tupe maua faaopoopo a lona aiga. "I ni masina mulimuli ane, sa faamanuiaina ai au ina ua aoao mai au e se isi uso, i le faiga o le falaoa hani e mafai ona ou faatau atu," na saunoa ai Tuafafine Augusto. "O le atiina a'e ma le fefaasoai o a tatou taleni e mafai ona faamanuiaina ai olaga o le tasi ma le isi, ma faalolotolina ai a tatou sootaga o ni uso a auaunaga." ■

E MAFAI FAAPEFEA ONA FESOASOANI LE POLOKALAMA A TAMAITI MA LE AUTALAVOU IA TE OE E AUAUNA ATU?

1. Valaaulia isi e auai i le faatinoga o le polokalama a Tamaiti ma le Autalavou.

E mafai ona e valaaulia ia aiga o le autalavou ma tamaiti e te auauna atu i ai e auai i le faatinoga o le polokalama o le Tamaiti ma le Autalavou. Latou te ono fiafia e auai i gaoioiga, atina'ega patino, po o vaega o le suesueina o le talalelei o le polokalama. (Mo nisi faamatalaga e uiga i le auaunaga e ala i le Sau, *Mulimuli Mai ia te A'u*, tagai "Auaunaga e ala i le Sau, *Mulimuli Mai ia te A'u*," i le *Liahona* Setema 2020.)

2. Lagolago a latou sini.

I le avea ai o se uso po o se tuafafine auauna atu i aiga e i ai talavou, ua e i ai i se tulaga masani e lagolagoina ia sini atonu o latou galulue agai i ai i Tamaiti ma le Autalavou. E ui ina patino a latou sini, ae afai e te iloaina le mea latou te naunau i ai, e mafai ona e ofo atu e fesoasoani i ni auala eseese. O lea mea e mafai ona avea o se ituaiga o le sueina o sapalai o ata o loo latou sailia, avea o se faamasino o a latou kuki o loo fai, pe avea foi o se faiaoga i se itu e te malamalama i ai. Pe e te iloa sui le suauu o se taavale? Fono se ofu masae? Pe o oe o se tagata tomai i faatalatalanoaga mo galuega? E mafai ona e ofo e faasoa atu le malamalama po o ou tomai pe afai latou te fiafia i ai.

3. Ia valaaulia isi e avea ma se vaega o lou lava atina'ega patino.

O le atina'ega patino e le o faapolopoloina mo tamaiti ma le autalavou. E mafai ona e auai oe lava i le faatinoga o le polokalama tusa lava po o le a lou matua. A o e faaaluina se taimi e faaleleia atili ai faaleagaga, faaleagafesootai, faaletino, ma faaleatamai i lou olaga, o le a sili atu le lelei o lou saunia e auauna atu i tagata taitoatas, tusa lava po o ai lua te fetaiai. E faapei foi o Perofeta i Kana, e mafai ona e faamanuiaina isi e ala i le valaaulia o i latou e auai faatasi ma oe, pe o le faatulagaina o lesona tapiano, o i se vasega faamalositino, po o le aoaoina faatasi o se gagana.

4. Ia avea le auaunaga o se sini.

Mafaufau e faaalu se taimi i aso taitasi mo le auaunaga. O lenei mea atonu o le auina atu o se tes, po o le afe i ai e vaai pe o faapefea mai, pe fuafua se faatasiga. E mafai ona aofia ai le vaai o se taimi e faakalena ai aso fanau o i latou e te auauna i ai pe tulitatao foi i latou i le ala o fesootaiga ia iloa ai pe o a mea latou te fiafia i ai, po o mea foi sa latou faia talu ai. Tusa lava foi pe na o le faaalu o sina lima minute e mafaufau ai pe o le a le mea o moomia e se tasi, e mafai ona ta'a'ina atu ai i manatu musuia e mafai ona faia ai se eseesega.



TAITOATASI

"O se faailoga o le Eklesia moni ma le ola a le Alii o se taumafaiga faatulagaina e le aunoa, ma faatonutonuina e auauna atu i fanau taitoatas a le Atua ma o latou aiga. Ona o Lana Eklesia lenei, o i tatou o Ana auauna o le a auauna atu i le tasi, e pei foi ona sa la faia."

Peresitene Russell M. Nelson,
"Auauna Atu i le Mana ma le Pule a le Atua," *Liahona*, Me 2018, 69.

FAASOA OU AAIFIAGA

Auina mai ia i matou ou aaifiaga o lau auaunaga pe o le auauna atu foi o isi ia te oe. Alu i le liahona .ChurchofJesusChrist.org ma kiliki le "Submit an Article or Feedback."

UA FAASOA ATU E APOSETOLO Savali o le Faamoemoe

Ile tali atu i le pipisi ai o le vairasi i le salafa o le lalolagi, ua faasaina ai e taitai ia faalapotopotoga i nofoaga faitele ma faatautaia le faanofo ese. Ua tapunia aoga, taofia e taitai o ekalesia le faatautaia o sauniga lotu, ma o i latou o loo galulue i fafo e manaomia ona faia talifofoga mo le puipuiga.

O le tausaga e 1919, ma o le fulū matautia na pipisi i le lalolagi lea na amata i le tausaga na muamua atu o le a ma'umau ai le fia sefulu miliona o soifua.¹ O le perofeta fou o le Ekalesia, o Peresitene Heber J. Grant (1856–1945), sa vaetofia ia Novema 1918 ae sa lei lagolagoina seia oo ia Iuni 1919 ona ua tolopoina le konafesi aoao ia Aperila.

I le taimi o lana auaunaga i le mavae ai o na ma isi aso faigata, na tuuina mai ai e Peresitene Grant se fautuaga talafeagai mo o tatou aso ina ua ia faapea mai, “Ua tatou o mai ai i lenei lalolagi ina ia maua le malamalamā, atamai, ma le poto, ina ia aoao i lesona, ia mafatia i tiga, ia onosaia ia faaososoga, ma maua ia manumalo o le olaga faale-tino.” Mai le malamalamā na ia maua mai i le fitā o aafiaga patino, sa ia faaopoopo mai, “Ou . . . te iloa o taimi o faigata e faamafanafanaina ai ma faamanuia ma faamalosiauina ia le Au Paia o Aso e Gata Ai e le pei o isi tagata!”²

I o tatou “taimi o faigata” i le taimi o le vairasi fou o le korona, tatou te maua ai le mafanafana ma le faamafanafanaga mai le talalelei toefuatina a Iesu Keriso. O lo tatou iloa e alofa le Tama Faalelagi i Ana fanau ma ua Ia valaauiina perofeta ma apostolo i o tatou aso e taialaina i tatou i afā o le olaga faaletino o se faamanuiaga sili lea.

Mai le fautuaga na faasoa i le taimi o faatalanoaga talu ai nei, e faamanatu mai ai e nisi o sui o le Korama a Apostolo e Toasefululua e mafai ona tatou

*Ua
ofoina
mai e
taitai o le
Ekalesia ni
malamala-
maaga e uiga
i le faalatalata
atu i le Atua,
auauna atu i le
alofa, ma agai
atu i luma ma
le onosai i le
taimi o le faa-
ma'i pipisi i
le lalolagi.*



lagonaina le olioli ma vaavaai atu i le lumanai ma le faamoemoe e tusa lava po o le a le mea o loo siomia ai i tatou.³

E Agai i Luma le Galuega

Na faatusaina e Elder Bruce R. McConkie (1915–85) i se tasi taimi le Ekalesia i “se caravan tele” lea e agai lava i luma e ui lava i le tetee.⁴ O Elder David A. Bednar na ia faauigaina mai le agai i luma ma le mausali o le Caravan i tapenapenaga musuia a le Ekalesia ma lona talafaasolopito i le feagai ai ma faigata.

“E leai se lima eleelea na te taofia lenei galuega mai le alualu i luma,⁵ ma e leai se faama’i pipisi i le lalolagi o le a taofia lenei galuega mai le alualu i luma,” na ia saunoa ai. “I le lotolotoi o luitau uma lava ua feagai ma i tatou i le taimi nei ma lenei vairasi, e agai pea i luma le galuega. . . . Tatou te le iloa po o le a le umi o le a i ai, ae o le a tatou manumalo. Ma atonu o le a tatou le toe faaaauau tonu la tatou mamamu muamua o le olaga ua tatou maitauina, ae o le tele o na fetuunaiga ma suiga o le a matua lelei lava.”

Na saunoa Elder Quentin L. Cook o sauniuniga musuia a le Ekalesia e aofia ai ni faataitaiga talafeagai e avea ma faamamafa i le tausia o le aso Sapati, faamalolosia o korama a le Perisitua Mekisateko ma le Aualofa, le suiga i le auaunaga, ma le faailoaina o le *Sau, Mulimuli Mai ia te A’u*, vitio o le Tusi a Mamona, ma le polokalama a Tamaiti ma le Autalavou.

“O le a tatou toe tepa i tua i lenei mea o se taimi autu o sauniuniga ae le na o se mea e tatau ona tatou tumau ai,” na ia saunoa ai.

Na lagolagoina e Peresitene M. Russell Ballard o le Korama a Apostolo e Toasefululua. E ui i le tapunia le tumau o malumalu ma falelotu, ua i ai i tagata o le Ekalesia ia meafaigaluega faaleagaga latou te manaomia e faaaauau ai pea ona agai i luma.

E manatuaina e Peresitene Ballard lona lagona i le toe foi mai ai i le fale mai i le lotu i le aso 7 o Tesema, 1941, i le iloa ai sa osofaia Pearl Harbor

Tapunia o malumalu “ua maua ai se avanoa ofoofogia e aoao atili ai e uiga i sailiiliga o talafaasolopito o aiga, faasinoupuina o igoa, ma le auala e saunia ai le tele o igoa mo le aso o le a toe tatala ai faitotoa o malumalu”

— Elder David A. Bednar

ma ua latalata ona tosina atu le Iunaite Setete i le Taua Lona II a le Lalolagi. E pei o le toatele o tagata i aso nei, sa popole o ia i le lumanai ma mafaufau ai pe o le a leai sona lumanai.

“Ae e le o le mea lena na tupu,” na ia fai mai ai. E pei lava ona manumalo tagata saoloto o le lalolagi i lena taua, o le a faapena foi ona manumalo le lalolagi i le taua e faasaga i le vairasi o le korona. “O le a lelei lava mea uma ao liliu atu o tatou loto i lo tatou Tama i le Lagi ma vaavaai atu ia te Ia ma le Faaola o le Togiola o tagata ola uma,” na ia saunoa ai.

O le isi auala e agai ai i luma le Ekalesia e ala mai lea i ana taumafaiga faafaifeautalai, lea e tali atu i suiga o tulaga o le lalolagi. Na saunoa Elder Dieter F. Uchtdorf sa suesueina e taitai o le Ekalesia ni auala fou e faasoat atu ai le talalelei e oo lava i le taimi ao lei amata ona faalavelaveina e le KOVITI-19 galuega faafaifeautalai. O lena faauilavea na aofia ai le felaua’iina o le faitau afe o faifeautalai i o latou atunu, vave faamaloloina o isi, ma toe fetuunai isi.

“O le KOVITI-19 na faatelevaveina ai o tatou mafaufau e uiga i lenei mea maoae ma pupula ai o tatou mata,” o lana tala lea. O se taunuuga, o ala o faasalalauga o tekinolosi ma agafesootai ua tatalaina nei faitotoa ia sa tapunia e nuu na tapu ai talaiga ma aiga sa le mafai ona oo i ai ma fale mautotogi.

“O le a faaaauau pea ona agai i luma le galuega



faafaifeatalai e ui lava i le pipisi o le faamai i le lalolagi,” na faaopopo mai ai Elder Uchtdorf. “Ua faaauau pea ona tatou aoao i auala e faaleleia ai le galuega faafaifeatalai i le taimi nei ma le lumana. Ua folafola mai e le Alii o le a faanatinatiina Lana galuega mo le faamanuaina o fanau uma a le Atua (tagai Mataupu Faavae ma Feagaiga 88:73). Ou te lagona ua tatou i ai i le ogatotonu tonu o lenei faagasologa a o tatou ola ai i nei taimi faigata. O a tatou faifeatalai faapelepele o painonia ia o o tatou aso, o loo asaina se ala o le faasoaina atu o le savali o le talalelei i ni auala fou e talafeagai ma o tatou tulaga ina ia mafai ai ona faaauau pea ona taavale atu i luma le Ekalesia a Iesu Keriso, seia tumu ai le lalolagi atoa” (Mataupu Faavae ma Feagaiga 65:2).

O avanoa fou mo le faasoaina atu o le talalelei e le na o le pau na o mea o loo tatalaina. O loto foi ua tatalaina ona o taimi faigata e masani lava ona faamaualalo ai tagata ma liliu atu ai i latou i le Atua, na saunoa ai Elder D. Todd Christofferson.

“Ua sili teisi atu le naunau o i latou e mafaufau, ‘Masalo ou te manaomia se mea e sili atu nai lo lau teugatupe. Atonu e tele atu nisi mea i le olaga nai lo o le mea sa ou ola ai,’ o lana tala lea.

Ua uunaia e Elder Christofferson tagata o le Ekalesia e vaavaai mo avanoa faafaifeatalai, e pei o le faasoaina o savali e faataatau i le talalelei ma ata e ala i faasalalauga faaagafesootai, fesootai atu i faifeatalai faamisiona e uiga i le fesoasoani atu i le faaaumeaina o tagata o loo latou aoaoina i le initonet, ma le fesootai atu i tagata latou te le o masani ona vaai soo i ai.

Faataumamaoina Faaleagafesootai ma le Faataumamaoina Faaleagaga

O le isi auala e agai ai i luma le Ekalesia o le tali faaleagaga lea e tuuina atu e le Au Paia o Aso e Gata Ai i luitau faaletino e pei o le KOVITI-19. Mo lo tatou puipuiga faaletino, tatou te faateleina lo

tatou mamao faaletino mai isi, ae mo lo tatou puipuiga faaleagaga, tatou te faalatalata atili atu ai i lo tatou Tama i le Lagi ma Lona Alo. O le pipisi ai o le faamai o le KOVITI-19 i le lalolagi ua tuuina ai i le toatele o tagata o le Ekalesia le tele o avanoa e faateleina ai lo latou puipuiga faaleagaga e ala i le mulimuli i le fautuaga a Peresitene Russell M. Nelson e faalogo i le Alii.

Ua silafia e lo tatou Tama pe a siomiaina i tatou e le lē mautonu ma le fefe, o le mea o le a sili ona fesoasoani tele ia i tatou, o le faalogo lea i Lona Alo,” na saunoa ai Peresitene Nelson i le konafesi aoao o Aperila 2020. Sa ia faaopopo mai, “A o tatou saili e avea ma soo o Iesu Keriso, o a tatou taumafaiga ia *faalogo ia te Ia* e manaomia ona matua faia ma le faamoemoe sili i ai. E manaomia ai le lotofuatiaifo ma taumafaiga tumau e faatumu o tatou olaga i aso taitasi i Ana afioga, Ana aoaoga, Ana upumoni.”⁶

E ui tatou te le taliaina le taofia o sauniga a le Ekalesia, o le tapunia o malumalu, po o le leai o ni galuega, o le faaaluina o le tele o le taimi i le fare e aumaia ai ia i tatou “se avanoa e mafaufau ai e uiga i le ala mai i le Atua” (tagai Alema 5:7), na saunoa ai Elder Cook. “Atonu o mea na tutupu talu ai nei e mafai ona avea ma se uti e mataituina faaleagaga e taulai atu ai i tatou i mea e sili ona taua. Afai o lea, o le a avea ma se faamanuiaga maoae i lenei vaitaimi le taulai atu i mea e mafai ona tatou faaatoatoaina i o tatou olaga ma le auala e mafai ai ona tatou faamanuiaina olaga o isi a o tatou ala mai i le Atua ma agai atu i luga o le ala o feagaiga.”

Na faaopopo mai Elder Jeffrey R. Holland, “O taimi faapena e valaaulia ai i tatou e vaai i tottonu o o tatou agaga pe tatou te mananao i mea o loo tatou vaaia iina. O le taimi lena [tatou te] mafaufau po o ai moni lava [i tatou] ma mea e taua moni lava.”

O taimi faapena e valaaulia ai foi i tatou e faateleina lo tatou faatuatua, auauna atu, ma le agaga faafetai, e uunaia ai i tatou e

“mafaufau i lo tatou faalagolago i le Atua ma faamaniuga mai ia te Ia lea e masani ona tatou le amanaiaina,” o le saunoaga lea a Elder Holland. “Tatou te tuuina atu i lo tatou Tama i le Lagi se faateleina o le loto faafetai, se loto faafetai sili atu, ma se ua’i sili teisi atu e manatua ai le tele o faafitauali ua foiaina ona o le Atua, o agelu, folafolaga faalefeagaiga, ma le tatalo.”

I le totonugalemū o lo tatou agaga faafetai o le faamanuiaga lea o le manatuaina o “le alofa mutimutivale tele o le Alii i le fanauga a tagata, mai i le foafoaga o Atamu e oo mai i lalo seia oo mai i le taimi [neil]” (Moronae 10:3). Na saunoa sui o le Korama a le Toasefululua o soo se taimi lava tatou te manaomia ai ona “malu i fare,” e mafai ona tatou mulimuli i le faataitaiga a Nifae ma Alema, le manatuaina o Ia “o le ua [tatou] faalagolago i ai,” le Faaola o Iesu Keriso, “o le a ia laveai mai pea ia te [i tatou]” (2 Nifae 4:19; Alema 36:27). Ma e mafai ona tatou manatua, e pei ona aoao mai le Apostolo o Paulo, e leai se mea e mafai ona “faateaeseina mai i tatou i le alofa o Keriso” (tagai i le Roma 8:35).

O le Alii o Iesu Keriso “o lo tatou malutaga sili” (tagai i le Salamo 61:1–4), na saunoa ai Elder Holland. “Po o le a lava le mea e tupu, o le a le faateaeseina lava i tatou mai le alofa o le Faaola ma Lona mafuta mai, e tusa lava pe tatou te le iloaina i lena taimi. E le o taofia le Agaga e se vairasi po o ni tapu faalemaloo po o ni vaiga mamao faafomai.”

“Fai Mea Lelei”

Talu ai nei, a o faiatuita se lipoti na faia e se komiti a le Ekalesia, sa oo ina popole Elder Christofferson e uiga i aafia i le “faamalosia le nofo toatasi” e mafai ona oo mai i luga o tagata nofufua o le Ekalesia—matutua ma e laiti.

“O le faamalosia o le nofo toatasi e mafai ona oo atu ai i le tuuatoatasi, ma o le tuuatoatasi e mafai ona maua ai ni taunuuga le lelei faaletino ma faalemafau-fau,” o lana tala lea. “Ina ia faafetaia’ia, o nisi o fautuua o le soifua maloloina lautele na fautuaina mai o i latou e aafia i le tuuatoatasi e vaavaai mo auala e ‘fai ai mea lelei’ mo se tasi.”

O le Au Paia o Aso e Gata Ai e mafai ona sailia ni auala e auauna atu ai, fesoasoani, ma saofagā atu



i isi, ae maise lava ia i latou ua tuuatoatasi, na saunoa ai Elder Christofferson, ma o tagata e tuuatoatasi o e tuuina atu ni auaunaga i isi e mafai ona faaitiitia ai o latou lagona o le faaesea.

“Taulai atu i auaunaga,” o lana tala lea. “E tele mea e mafai ona tatou faia mo le tasi ma le isi ina ia maua ai se lagona o le auai ma le usoga a alii ma tamaitai. O se taimi lea e mafai ai e le korama a toeaina ma le Aualofa ona o mai o i latou lava ma tuuina atu mea e na o i latou lava ua tulagase lo latou faatulagaina e faia.”

Ma nai lo le auina atu o feau tusitusia i se tasi i taimi uma, na ia fautua mai, “Ou te manatu e matuai lelei tele lava le valaau atu i se tagata e faaaoga ai lena tekinolosi tuai sa ta’ua o le telefoni. Tau lava o le valaau i ai e talanoa ma fegalegaleai. Tuu atu ia i latou e faalogo i se leo.”

O taumafaiga laiti e aapa atu ai i isi e mafai ona faia ai se eseesega tele, e faamalamalamaina ai se aso o se tasi i auala tatou te le iloa. Na saunoa Elder Cook, “O a tatou auaunaga e matua manaomia lava i tagata e matuai taumamao lava.

Na fautua mai Elder Holland, “E tatau ona tuuto atu se vaega faapitoa o o tatou aso e fesoottai atu ai i tagata o e manaomia se faamalosiauga.

*O taumafaiga laiti e
aapa atu ai i isi e mafai
ona faia ai se eseesega
tele, e faamalamalama-
ina ai se aso o se tasi i
auala tatou te le iloa.*

*“O a tatou auaunaga e
matuai manaomia lava
i tagata e matuai tauma-
mao lava.”*

—Elder Quentin L. Cook

Ioe, tatou te maua se faamalosiauga mai le faia o lena mea, o lea ua “sii ae” ai i luga tagata uma (3 Nifae 27:14, 15), e pei ona fetalai le Faaola na auina mai o Ia i le lalolagi e fai.”

O le isi auala e mafai ona tatou sii ae ai i tatou lava ma isi, o le saunia lea mo le aso o le a toe tatala ai malumalu. Tapunia o malumalu—pe mo faama’i pipisi i le lalolagi, toe fausia, po o le faamamaina—“ua maua ai se avanoa ofoofogia e aoao atili ai e uiga i saililiga o talafaasolopito o aiga, faasinoupuina o igoa, ma le auala e saunia ai le tele o igoa mo le aso o le a toe tatala ai faitotoa o malumalu,” o le saunoaga lea a Elder Bednar.

E tusa lava pe tatala pe tapunia malumalu, sa faaopoopo mai Elder Bednar, e mafai lava e tagata o le Ekalesia ona taumafai malosi ia agavaa ma maua se pepa faataga aoga o le malumalu.

Lesona e Finagalo le Alii Tatou te Aoaoina

E pei ona faailoa mai e Elder Bednar, e ui o le a leai se tasi e filifili e tofo i aafiaga o le faama’i pipisi o le KOVITI-19, ae ua i o tatou

luga foi se mala o aso e gata ai.

“Faatasi ai ma le vaaiga e faavavau e faapea o le talalelei toefuataina e maua ai ma le alofa tunoa lea e sau mai le Togiola a le Faaola, e mafai ai ona tatou aoaoina lesona mai faigata o le olaga faaletino lea e saunia ai i tatou mo faamanuiaga o le faavavau,” na ia saunoa ai. E tatau ona tatou tatalo. E tatau ona tatou sailia. E tatau ona tatou fesili atu. E tatau ona i ai ni o tatou mata e vaai ma taliga e faalogo ai. Ae e mafai ona faamanuiaina i tatou i ni auala ofoofogia e aoao ai lesona ia o le a faamanuiaina ai i tatou i le taimi nei ma le faavavau.”

Faatasi ai ma lona aafiaga matautia i aiga i le lalolagi atoa, na aoaoina ai e le KOVITI-19 tagata e faateleina le faaali atu o le popole tele mo isi, na saunoa ai Peresitene Ballard.

“Ua tatou iloa le taua tele o o tatou aiga, le taua o o tatou tuaoi, ma le taua o o tatou uso a tagata o le Ekalesia,” na ia saunoa ai. “Ua i ai lesona ua tatou aoaoina nei ia o le a avea ai i tatou ma ni tagata sili atu.”

Ma pe a mavae atu faigata o i ai nei, o le a se mea e mafai ona tatou faamoemoeina? O le mea lava e tasi, na saunoa ai Elder Uchtdorf. O le a faaauau pea ona feagai le fanau a le Atua i totonu ma fafo atu o le Ekalesia ma luitau.

“Ua tatou ola i se taimi e manaomia ai ona tatou aoao,” na ia saunoa ai. Ma o le lesona sili ona taua e mafai ona tatou aoaoina o le tali i luitau o le a oo mai o le tali foi lea i luitau o i ai nei: o le talalelei a Iesu Keriso.

Ona o le Au Paia o Aso e Gata Ai ua mauaina le talalelei toefuataina a Iesu Keriso, na saunoa ai Elder Holland, e mafai ona latou aoao ia lelei ma faamoemoeina, le faia o mea sili latou te mafaia ma talitonu i le Alii ma Lana afioga ina ua ia fetalai, “Ia tatou faia ai ma le fiafia mea uma ua i ai i lo tatou mana; ona mafai lea ona tatou tutu, ma le mautinoa atoatoa, e vaai i le faaolataga a le Atua, ma mo lona aao e faaali mai” (Mataupu Faavae ma Feagaiga 123:17).

“E tele naua mea e olioli ai ao faaleleia lo tatou faatuatua, faalago-lago atili i le Alii, ma vaai i le vavega o Lana laveaiga,” o le saunoaga lea a Elder Holland. ■

FAAMATALAGA

1. Tagai William G. Hartley, “The Church Grows in Strength” *Ensign*, Set. 1999, 35.
2. *Aoaoga a Peresitene o le Ekalesia: Heber J. Grant* (2002), 49, 48.
3. Tagai Russell M. Nelson, “Olioli ma le Ola ai Faalelagaga,” *Liahona*, Nov. 2016, 82.
4. Bruce R. McConkie, “The Caravan Moves on,” *Ensign*, Nov. 1984, 85.
5. Joseph Smith, in *History of the Church*, 4:540.
6. Russell M. Nelson, “Faalogo ia te Ia,” *Liahona*, Me 2020, 90.



O Fatu ua Tuia i Manu'a Loloto: Malamalama i le Sauaina i totonu o le Aiga

O mamanu le manuia e mafai ona atiina ae i soo se sootaga. O le matau-liaina e mafai ona aliali ai le sauaina pe taofia ai foi a o lei amataina.

Saunia e Jason B. Whiting, PhD

Aoga o le Olaga Faaleaiga a le lunivesite a Polika laga

Talu ai nei sa valaau mai ai a'u e se tamā ua nuti-momoia lona loto. O lona afafine o Jenna (ua suia igoa) sa aoga i le kolisi ma faia ai se faigaou fou, ma sa televave tele le gasologa. O lana uo tama o Jake, sa uunaia o ia la te faaipoipo ma sa tuuititia ai le fesootaiga a Jenna ma ona matua. Sa faatoese atu Jenna ia i la'ua, ma faamatala mai, o le malosi o le alofa o Jake ma lona naunau la te mafuta o se ulugalii.

Sa amata ona matua popole le aiga o Jenna ina ua latou iloaina sa i ai se toalua muamua o Jake ma se la tama na te lei ta'uina ia Jenna. Sa la telefoni i le toalua muamua, o lē sa fai mai, o Jake e mataga ona uiga itaitagofie ma e fuā foi. Ina ua iloa e Jake, sa amata ona ita tele. Fai mai o ia ua "pule mai" matua o Jenna ma sa ia ta'ua se taimi na la le fiafia ai i se tala ula sa ia faia e uiga i le atamai o Jenna. Na faatauanau pea ma le iloa lelei e Jake ia Jenna ia fai e ia lava ana faaiuga e ala i le momotueseina o i laua. Sa leai se faamoemoe o matua o Jenna ona ua le toe tali maia a la telefoni ma tesí.

E mananao tagata uma i se aiga fiafia, ae tusa lava foi pe taumafai tagata e ola i le talalelei, e mafai lava ona leatapa'ia sootaga. O nisi o luitau o ni taunuuga o le


le malamalama ma maseiga masani i aiga. Peitai, i aiga maloloina, e faatoese ia tagata ona o amioga le lelei ma toe fonofono masaesae, ae i tulaga e le manuia, e i ai mamanu faifai pea o le 'ina'inā po o le faatautala ia e oo ai ina sauaina.

Sauaina Faaleaiga ma le Talalelei

"Ua outou tu'imomomoina loto o a outou avā aga-vavai, ma aveesea le faatuatuaina o outou e a outou fanau" (Iakopo 2:35).

O le sauaina e aofia ai faatinoga ua faamoemoe ia faatiga pe puleaina. E aofia ai se āuga o amioga e ono aofia ai le le amanaiaina, faapopoto, faitioga faaleo, ma sauaga faaletino pe faalefeusuiga.¹ Ae pagā, o amioga faasaunoa o se mea masani, na fuafuaina e nisi o sikola e faapea pe tusa ma le kuata o tamaiti i le lalolagi atoa e leaga le faiga faaletino, faalefeusuiga po o le faale-lagona.² O tagata matutua foi ua maualuga le afaina, ma e tusa ma le 1 mai le 4 tamaitai ma le 1 mai le 10 alii ua aafia i sauaga faaletino mai se toalua.

O le sauaina e mafai ona tupu i soo se sootaga, ma o alii ma tamaitai e mafai ona avea ma tagata e faatinoina sauaga. Peitai, e peiseai o alii e lotofafau ma faatinoina sauaga matuia faaletino ma faalefeusuiga, ae o tamaitai



"O le leo e tuuina atu ai le molimau faamaoni, e momoli atu ai le tatalo naunautai, ma lagiina ai viiga o Siona e mafai ona avea ma leo lava e tasi e otegia ma faitio ai, faamasiasi ma faamamasagia ai, faatiga ma faatamaia ai le agaga o oe lava faapea foi isi i le gasologa. "E luai mai i le gutu e tasi le vivii ma le fetuu," o le faanoanoaga lea o lakopo. 'Ou uso e [ma tuafafine] "e le tusa ona faia faapea o na mea' [lakopo 3:10]."

Elder Jeffrey R. Holland o le Korama a Apostolo e Toasefululua, "O Le Gagana a Agelu," *Liahona*, May 2007, 16.



e peiseai e fefefe, pulea malosi, pe matua faatiga e se toalua.³

O le sauaina e faatama'ia ai le agaga o le ē faatausuai ma le ē afaina ai, ma e feteena'i ma aoaoga a le Faaola. Ua saunoa mai perofeta o ona po nei e faapea, o i latou "o e faasaunoa i tai-toalua po o fanau . . . o le a i ai se aso tou te tutu atu ai e tali atu i luma o le Atua."⁴ O i latou o e faasaua e tele ina latou le amanaiaina pe sua foi mata-upu faavae o le talalelei. Mo se faataitaiga, sa ou fautuaina se ulugalii e faia e le tane ni fegalegaleaiga tau-lagona ma tamaitai ma faaalu ai a la teugatupe i taaloga faitupe, ma nai lo le faatoese, sa ia fosia lana ava e faamagalo ma tau-sisi pea o lana ava e "tele atu lana aga-sala" pe afai na te le faamagaloina o ia [tane]. Sa ia faapasiloa lona tiga ae fai mai o la e sa'o o ia i le Atua semanu e le avea o ia o sē e faigaluega i le malumalu. Ina ua talanoa atu lana ava i taitai o le Ekalesia, sa ia lei manatu mamafa i mea na ia faafitia ae faatele i atugaluga o lana ava, ma fai mai e ātu lava o ia. Sa teena e le tane ia "mataupu faavae o le faaaloalo, alofa, [ma le] agaalofa"⁵ ma sa faia faatautala lana avā. O ana [avā] taumafaiga e ola i mataupu faavae o le talalelei sa le mafai ai ona foia le faafitauli sa fatuina e lana tane. E mafai e i tatou taitoatasi ona faamatuu atu i amioga

e le manuia. E i ai uiga patino masani i ituaiga uma o sauaga, ma o le tele o le ogaoga ma le faifai soo o nei mea, o le atili le manuia ai foi lea o le sootaga. O ni mamanu masani nei o sauaga e lima e mafai ona fesoasoani ia te oe e iloa ai amioga le lelei ia te oe lava ma isi.

1. Faasaua

"Ua 'ole'ole o latou laulaufaiva, o i o latou laugutu le mea oona o le asipi: . . . ua tumu [o o latou] gutu i le fetuu ma le upu faafiuifiu" (Roma 3:13–14).

Na sau se alii e vaai au mo se fofo i moomooga o lana avā, o lē sa tauemuina o ia i lona "manaomia o se fesoasoani." I le lotu sa tausafia ma faaleagaga o ia, ae i le fale o lona faasausili lē mafaufau e matuitui tiga pei o se sasa. Na te faitioina lana tupe maua ma fai mai o lana galuega faafai-aoga "o se galuega a se teine." Sa ia fai i lana tama tama, "Ou te faamoemoe e te le i'u ina avea o se palaai pei o lou tamā," ma e alu le aso o talanoa i le telefoni ma lona tina, lea la te aamu ai ma fai pona o a la tane. O tagata faitio e manatu e tauleleia i le matua'ia o le tiga ma "fifia ia mafatia ai isi" (Mata-upu Faavae ma Feagaiga 121:13). Ua solia e tagata o nei aiga poloaiga a Iesu "e aua le faamasino atu" ma "aua le faasala atu" (Luka 6:37) a o latou vaai maualalo, faaalia le inoino, pe faipona.

SUESUE ATILI

E mafai e taitai ona maua le fesoasoani mo le taulimaina o le sauaina i le Punaoa a Taitai ma Failautusi i le ChurchofJesusChrist.org. Ia faameainia e taitai ma faiaoga uma o tamaiti ma le autalavou le aoaoga faamasani lenei o le "Puipuia o Tamaiti ma le Autalavou" i totonu o le tasi le masina talu ona valaauina. E mafai ona maua le aoaoga faamasani i le ChurchofJesusChrist.org/callings/church-safety-and-health.

2. Taufaasese

“Ua ulu ia te oe se agaga pepelo, ma ua e tuu ese le Agaga o le Atua” (Alema 30:42).


O le taufaasese o se aga masani o le sauaina a o faaititia e le au saua a latou amioga, ae tuua’ia isi, ma femilosa’i faaupuga. O lea tulaga e faafememea’i ai i latou e aafia fua, e pei ona faamatala mai e se tasi o i latou na auai i a’u suesuega: “[O lo’u toalua e] mateletele lona ita, ona fai mai lea o se faatoesega ma faapea mai, “Ia tasi o le mea o oe e sese’ . . . ma fai ai lava seja oo ina amata ona ou talitonu i ai.”⁶ O le faafititia o le mea moni i se tasi e ta’u o le tutuina o le kesi, ma e tuua ai tagata ua afaina fua, e fenumia’i ma lē mautonu e uiga i o latou manatua ma manatu. E pei o isi ituaiga o taufaasese, o le tutuina o le kesi e fai faapopoto ai talanoaga ma folamua mai ai se talaluma pepelo.

O i latou o e sauaina matuia isi e teena lava le ioeina faapea o latou faatiga ma e tele ina latou fai mai o i latou ua afaina fua. Ina ua faamatala mai e Jenna lona le toafimalie e uiga i faitioga a Jake i ona matua, sa ita o ia ma tausisi e faapea sa “faatiga” o ia ia te ia. O Jake o se tasi “o i latou ua alalaga ua solitulafono . . . ma o fanau i latou lava o le le usiusitai” (Mataupu Faavae ma Feagaiga 121:17). Sa le gata ina ia faalauiolina se tala sese ae sa ia teena foi le mea moni.⁷

3. Alofaga

“Tautino atu ou ’aleu ma lena sese na e faia” (Alema 39:13).

O se tagata lotomaualalo na te lagonaina le tu’itino i le faatiga i isi ma



salamo ma faia mea e sili atu ona lelei. O se tasi o lē e faasaua, e teenaina le fafagu o le loto faamaoni i ’alofaga. E pei ona toefaamatala e se tasi o a’u tagata auai i saililiga, “Ou te lagona le maniti e uiga i le sauaina faaletino, ona mulimuli ane lea ou te mafaufau ai semanu e le tupu pe ana faapea e tau lava ina tapuni lona gutu.” O lona “faanoanoa e lei tupu mai i le salamo” (Mamona 2:13) ae nai lo lena sa tulei esea i le ita matuitui ma le tautuua’i.

I le faatalanoaga, sa ou fai atu ai i se ava e faapea ou te lei molimauina lava lona faaalia o le salamo faaleatua mo le tele o tausaga i le faitioina o lana tane. O lana tali sa le o se faanoanoa ae o se gaulemalie mo ia lava: “Manaia, o se tasi lea o mea ou te le o faia!” O tagata faasaua e teena le tiutetauave ma e itaita gofie ma e faauufi. E faigofie lava ona tiga i nai mea iti.

4. Faamaualuga

“Ia taitasi outou ma manatu ma le lotomaualalo, ua sili nisi uma ia i latou lava” (Filipi 2:3).

O le faamaualuga e aofia ai aia patino ma le manatu-ifo ia te oe lava. O se tasi alii e mateletele i lana avā ma le fanau i taimi uma e mafaufau ai latou te “le o faaaloalo” ia te ia. Afai e le ogatusa o

latou manatu ma ia, ua latou “vaai maualalo” ia te ia pe ua latou “le usiusitai.” O le faamaualuga e faatautavā ma e taulai i le paoa ma le manumalo. I se tulaga e ese mai ai, o se aiga maloloina e galulue faatasi, e i ai se tulaga tutusa o le le faaitu’au, o tagata o le aiga e “faamaoni tagata uma o le tasi i le isi i fealoaiga na latou fai” (4 Nifae 1:2). O taitoalua e ao ona avea o ni paaga tutusa,⁸ lea e tofu sao ai ma e taua manatu uma.

5. Puleaina

“Pe a tatou . . .faaaoga le pule po o le puleaga po o le faamalosi i luga o agaga o le fanauga a tagata, . . . e aveese e le lagi i latou lava” (Mataupu Faavae ma Feagaiga 121:37).

E ui tatou te faatauaina le fitalia, o se mea e ofo ai i le tele o taimi e ta'u atu ai e tagata o le aiga i le tasi ma le isi pe faapefea ona mafaufau, lagona, ma faatino. O nisi ua oo lava ina latou pulea e ala i le taufaafefe, faamaasiasi, leai se alofa, po o le taufaamata'u. O se tasi tane e i ai ona faamoemoega le mafulisa'ia faapea e tatau i lana avā ona saunia sana taumafataga o le taeao i aso uma i se taimi patino, ia faatino ni manaoga patino, ma faalogo atu ia te ia e tusa ma ona

“atugaluga,” ia e masani ona aofia ai le auala e mafai ona faaleleia ai o ia [ava]. Na te mataituina lona faaalinina o tupe ma e ita pe afai e le vave ona tali mai o ia i ana tesi.


Sa faamatala e se tasi tina lona le fafia e le aunoa i lana tama teine talavou i soo se taimi e faaalia ai e le teineitiiti le faanoanoa pe le tausisia foi tulaga faatonuina e le tina. Afai e le tino mai ia faamoemoega, pe afai foi e faaalia e lana tane ni popolega, e le toe ano lava i tagata uma ma e le toe gagana.

Faamoemoe ma le Faamalologa

“Ua ou faalogo i lau tatalo, ua ou iloa ou loimata; faauta foi, ou tefaamalolo ia te oe” (2 Tupu 20:5).

E ui o le sauaina e nutimomoia ai le loto, ae e mafai lava ona suia e le aunoa. E mafai e i latou o e afaina fua ona aapa atu i punaoa faaleagaga ma faapolofesa, ma saili atu i le mana o le Togiola a le Faaola e faamalolo ai o latou manu'a. Ina ia maua se fesoasoani, alu i le abuse.ChurchofJesusChrist.org.

O i latou na faasaua ua tatau ona salamo ma saili atu mo se fesoasoani. O lea tulaga e manaomia ai le alu ifo i “lalo i le loloto o le lotomaualalo” (3 Nifae 12:2) ma



talia le tiutetauave atoa mo a latou amioga. O le suiga e manaomia ai le sili atu nai lo na o folafolaga mo taimi pupuu ma taumafaiga palepale aluga. O le tiga o le salamo loloto e tauivi i le agaga, ma o nisi e le naunau e faia, ma e tuua ai e aafia fua ma faaiuga faigata pe faapefea ona puipuia i latou lava.⁹

E popole lo tatou Tama Faalelagi ia i tatou e faapei foi o le tamā mafatia na valaau mai ia te au e uiga i lona afafine. O le alofa o le Atua e pei o le “lautele o le faavavau” (Mose 7:41), ma e matuai tiga lava o Ia pe a faatiga e Lana fanau le tasi ma le isi. I se talanoaga faamomoiloto ma Enoka, sa tutulu o Ia. “O i latou nei o ou uso; o i latou o galuega a o'u lava lima, . . . ma [ua Ou] tuu atu foi le poloaiga, e tatau ona latou alolofa o le tasi i le isi, . . . ae faauta, ua latou aunoa ma le alofa, ma ua latou inoino i o latou lava toto” (Mose 7:32–33). E i ai le taufaitagi i le lagi ma le lalolagi pe a faamanu’alia ia tino ma agaga. Ae, faatasi ai ma le lotomaualalo, o le mana o le Atua, ma fesoasoaniga faapololesa pe a tatau ai, e mafai ona taofia ai amioga faataumaoi ma amatalia se fale o le mamalu, saogalemu, ma le alofa. ■

FAAMATALAGA

1. Mo nisi faamatalaga e uiga i le sauaga faaletino, tagai i le abuse.ChurchofJesusChrist.org. Mo nisi faamatalaga e uiga i sauaga faalefeusuaga ma le faaoolima, tagai i le Benjamin M. Ogles, Agency, Accountability, and the Atonement of Jesus Christ: Application to Sexual Assault” (Faigalotu a le Iunivesite o Polika Iaga, 30 Ian. 2018), speeches.byu.edu; ma Chieko N. Okazaki, “Healing from Sexual Abuse” (Brigham Young University conference, Oct. 23, 2002).
2. Tagai i le Maryam Ajilan Abbasi, Masumeh Saeidi, Gholamreza Khademi, Bibi Leila Hoseini, Zahra Emami Moghadam, “Child Maltreatment in the World: A Review Article,” *International Journal of Pediatrics*, vol. 3, no. 1 (2014), 353–65.
3. Tagai Hamby, S., “Current controversies: Are women really as violent as men? The ‘gender symmetry’ controversy,” in Claire M. Renzetti, Jeffrey L. Edleson, and Raquel Kennedy Bergen, *Sourcebook on Violence Against Women*, 3rd ed. (2018), 78–82.
4. “O Le Aiga o se Folafolaga i le Lalolagi,” *Liahona*, Me 2017, 145; tagai foi abuse .ChurchofJesusChrist.org.
5. “O Le Aiga: O Se Folafolaga i le Lalolagi.”
6. Jason B. Whiting, Megan Oka, and Stephen T. Fife, “Appraisal distortions and intimate partner violence: Gender, power, and interaction,” *Journal of Marital and Family Therapy* (2012), suppl: 1:113–49.
7. Mo isi faataitaiga faatusi paia o le teena o le upumoni, tagai i le Ioane 3:19–21; Galuega 7:54; 2 Nifae 1:25–26; ma le 2 Nifae 4:13.
8. Tagai “O Le Aiga: O Se Folafolaga i le Lalolagi”; tagai foi H. Burke Peterson, “Pulega Amionetonu,” *Ensign*, Iulai 1989, 6–11, mo nisi faamatalaga e uiga i le aoaoga faavae o le tusapau ma fesili e mafaufau i ai e tusa ma sootaga o feagaiga.
9. O i latou o i ai i ni tulaga faasaua, e tele ina feagai ma filifiliga e uiga i le ala e puipuia ai lo latou lava saogalemu, po o le saogalemu o isi, faapea foi e tatau ona latou faatutuina ni tuaoi po o ni faaititiga o a latou fegalegaleiga ma i latou o e ua tiga. Na talanoaina e Peresitene James E. Faust (1920–2007) lea tulaga faigata ina ua utia se tasi i “se sootaga faaumiumi ma e le mafaaasoina mai ai lea e faataumaoia ai le mamalu o se tagata i le avea ai ma se tagata soifua” (“Faamauoaina o Lau Faaipoipoga,” *Liahona*, Ape. 2007, 3); tagai foi i le vaega o le “Fesoasoani mo E Afaina Fua” i le uepisaite a le Ekalesia i le puipuiga o le sauaina mo nisi faamatalaga ma itu e filifili ai.



SUESUE ATILI


Ina ia maua nisi faamatalaga faaopoopo pe faafeesootai punaoa faapolofesa ma isi fesoasoaniga, asiiasi i le uepisaite a le Ekalesia mo le sauaina i le abuse .ChurchofJesusChrist.org.

Ina ia aoao atili e uiga i le auala e fesoasoani ai i e ua aafia fua, fatau le vaega o le “Pe Mafai Faapefea Ona Ou Fesoasoani? Mo Uo ma Taitai” i le fatuga faafuainumera o lenei tusiga i le liahona .ChurchofJesusChrist.org .org po o totonusi o le polokalama o le Gospel Library.

PUNAOA MO TAITAI

O taitai e silafia ia tulaga sauaina ia e aofia ai fanau iti ma avea o ni e ua aafia fua po o ni molimau, e tatau ona faafesootai le laina fesoasoani a le Ekalesia o loo maua i le counselingresources .ChurchofJesusChrist.org.





Saunia e Elder
Lawrence E.
Corbridge

Fitugafulu ua
Faamalolo ma
le Mamalu

TUMAU I LUGA O LE Papa o Faaaliga

*O le faalagolago i le papa o faaaliga, e mafai ai ona
tatou maua ia tali i fesili e aupito taua.*

Eavea o se vaega o se tofiga na tuu mai ia te au o se Pulega Aoao i ni
nai tausaga talu ai, sa ou faitau ai i le tele naua o anomea e faasa-
gatau i Le Ekalesia a Iesu Keriso o le Au Paia o Aso e Gata Ai, o le
Perofeta o Iosefa Samita, o le Tusi a Mamona, ma mea na tutupu i le Toe-
fuataiga. Talu ona suia lena tofiga, ou te lei toe foi e tautevateva ai i lena
faataufusi.

O le faitauina o na anomea e tuua ai lava au e le aunoa ma se lagona o
le faasiasia, ma i se tasi aso na musuia ai au e lena sane o le pogisa e tusia
se vaega o se tali i na tuuaiga faatautee uma. Ou te fia faasoa atu ni nai
mafaufauga sa ou tusifaamaumauna i lena aso, ma e ui o le mea sa ou tusia
sa mo a'u lava ia, ae ou te faamoemoe o le a fesoasoani foi ia te outou.

Pe o le a Tatou Tutumau ea e Faavavau?

Na fai mai le perofeta o Tanielu e faapea, o aso amuli “e faatuina ai e
le Atua o le lagi o le malo e le faaumatia e faavavau: o lea malo foi, e le
tuuina atu ia i se tasi nuu, na te tu’imomomoina ma faaumatia ia malo uma
lava, a o ia e tumau lava e faavavau” (Tanielu 2:44).

O le malo o le Atua o Le Ekalesia a Iesu Keriso o le Au Paia o Aso e
Gata Ai. O le a “tumau e faavavau.” O le fesili o le, Pe o le a e ma ou tutu-
mau ea pe “o le a [tatou] o ese foi?” (Ioane 6:67). Ma afai foi tatou te o ese,
o fea o le a tatou o i ai?



O Le Taufaasese o se Faailoga

o O Tatou Taimi

Ina ua faamatala e le Alii ia faailoga o Lona afio mai ma le iuga o le lalolagi, sa la ta'ua le tele o mea, e aofia ai ttau ma tala o ttau, o le tulai mai o malo e faasagatau i isi malo, o oge, faama'i, mafuie, ma le tele o isi faailoga, e aofia ai ma lenei: "Aua i aso na o le a tutu mai ai foi Keriso pepelo, ma perofeta pepelo, ma o le a latou faaali mai faailoga tetele ma mea e ofo ai, e oo ina a mafai, o le a latou faaseseina ai lava e ua filifilia, o e ua filifilia e tusa ma le feagaiga" (Iosefa Samita—Mataio 1:22; tagai foi i le Mataio 24:24).

Ou te le o mautinoa pe o a uma mea e faatatau i ai le "pe a mafai, o le a latou faaseseina ai lava le au filifilia," ae ou te manatu o lona uiga, o le a luitauina tagata uma i o tatou taimi.

E toatele i latou o e taufase, ma e tele ituaiga o taufaasese. I le tasi itu tatou te fetaiai ai ma i latou o e osofa'ia le Toefuataiga, o le Perofeta o Iosefa Samita, ma le Tusi a Mamona. O le isi tatou te vaaia ai i latou o e talitonu i le Toefuataiga ae fai mai e le o atoa le Ekalesia ma ua se ese mai le ala. Ae fai mai nisi e talitonu i le Toefuataiga ae e le fiafia i le aaoaga faavae o loo feteenai ma uiga siita'i o o tatou taimi. O nisi e aunoa ma le pule ua latou fai mai ua latou maua faaliga, o miti, ma asiasiga e faasagatonu le vaa, e taiala i tatou i se ala e maualuga atu, pe saunia le Ekalesia mo le iuga o le lalolagi. O isi ua faaseseina e agaga pepelo.

I le isi itu o le fua ua tatou oo mai ai i se atulaulau atoa o mea faalavefau. E lei i ai se taimi na tele atu ai faamatalaga, o faamatalaga sese, ma faamatalaga taufaasese; lelei ua tele atu, o meafaigaluega, ma taalogia; ma isi mea

e filifili mai ai, o nofoaga e o i ai, ma mea e vaai i ai ma faia e faapasi ai le taimi ma tata'i ese mai ai mai le mea e sili ona ttau. O na mea uma ma isi mau mea ua salalau i le taimi nei lava i le lalolagi atoa e ala i faasalalauga faaeletonika. O se taimi lenei o le taufaasese.

E Ttau Tele le Atamai

O le upumoni e mafai ai e i tatou ona vaai manino aua o le "iloa lea o mea e pei ona i ai, ma e pei ona sa i ai, ma e pei ona o le a oo mai" (Mataupu Faavae ma Feagaiga 93:24). O le silafia e ttau tele e aloese ai mai le taufaasese, e iloatino ai le upumoni ma le mea e sese, ma ia iloa manino ai ma faatautaia se ala e aloese ai mai faafitauli ma mea matautia i o tatou taimi.

Na saunoa le Perofeta o Iosefa Samita: "O le atamai e manaomia mo le olaga ma le faaleatua. . . . O le atamai o le faaaliga. Faalogo . . . o lenei le ki atoatoa; o le atamai o le mana o le Atua i le faaolataga."¹

Fai mai tagata, "E tatau ona e faamaoni i ou talitonuga." E ui ina moni lena mea, ae e le mafai ona e sili atu nai lo le mea e te iloa. O le tele o i tatou e gaoioi e faavae i o tatou talitonuga, aemaise o mea tatou te talitonu tatou te fiafia i ai. O le faafitauli o le, o nisi taimi o tatou e sese.

O nisi tagata atonu e talitonu i le Atua ma e sese ia ponokalafi ae o la lava e kiliki i le uepisaite o ponokalafi, ma le talitonuga sese faapea o le a sili atu lo latou fiafia pe afai latou te faia po o le faapea e le mafai ona tatalia ae kiliki ai po o le faapea, latou te le o faatiga ai i se isi. Ua sese lava i latou.

O isi atonu e talitonu e sese le pepelo ae pepelo lava i taimi, e talitonu sese o le a sili atu ona fiafia pe afai e le iloa le mea moni. Ua sese lava i latou.

Atonu e talitonu se tasi ma ua iloa lava foi o Iesu o le Keriso ae faafititia pea lava o Ia e le na o le faatasi ae faatolu, ona o le talitonuga sese faapea o le a sili atu ona ia fiafia e faamalie le aofia. Sa le'i leaga ia Peteru. Ou te le o mautinoa foi pe sa vaivai o ia. Sa na ona sese lava o ia. (Tagai Mataio 26:34, 69–75.)

Pe a leaga ona tatou faatino se mea, atonu tatou te mafaufau o tatou ua leaga, ae o le mea moni ua na ona tatou sese. O le lu'itau e le faapea o le punia o le ava i le va o a tatou faatinoga ma o tatou talitonuga; ae, o le lu'i o le punia o le ava i le va o o tatou talitonuga ma le upumoni.

E faapefea ona tatou punia lena ava? E faapefea ona tatou aloese mai le taufaasese?

O Uluai Fesili ma Fesili Lona Lua

E i ai uluai fesili ma e i ai foi fesili lona lua. Amata i le taliina muamua o uluai fesili. O uluai fesili e aupito sili ona taua. E itiiti lava ni nai uluai fesili. Ou te ta'ua le fa:

1. "Pe o i ai se Atua o lo tatou Tama?"
2. Pe o Iesu Keriso o le Alo o le Atua, le Faaola o le lalolagi?
3. Pe o Iosefa Samita o se perofeta?
4. Pe o Le Ekalesia a Iesu Keriso o le Au Paia o Aso e Gata Ai o le malo lea o le Atua i le lalolagi?

O le eseesege, o fesili lona lua e le muta. E aofia ai fesili e uiga i le talafaasolopito o le Ekalesia, o faaipoipoga faaautaunonofo, o le tupuga mai o tagata Aferika ma le perisitua, o tamaitai ma le perisitua, o le faaliliuga o le Tusi a Mamona, o le Penina Tau Tele, DNA ma le Tusi a Mamona, o faaipoipoga a itupa tutusa, o tala eseese o le Uluai Faaaliga, ma isi mau mea.

Afai e te taliina ia uluai fesili, e taliina ai foi ma fesili lona lua, pe leai ai foi se taua tele. Tali ia uluai fesili, ona mafai lea ona e taulimaina isi mea e te malamalama i ai ma mea e te le malamalama i ai ma mea e te ioeina ma mea e te le ioeina e aunoa ma le tuua o le Ekalesia.

O Le Metotia Paia o le Aoaoina

E i ai auala eseese o le aoaoina, e aofia ai metotia faasaienitisi, faafuainumera, akatemia, ma faalelagi. O metotia uma e fa e alagatataua ia iloa ai le upumoni. E tutusa lava le auala e amata ai: i se fesili. E taua ia fesili, aemaise o uluai fesili.

O le auala faalelagi o le aoaoina e aofia ai elemene o isi metotia ae o le taunuuga e fuao ai isi mea uma lava e ala i le valaau atu i mana o le lagi. O le taunuuga o mea a le Atua e faaalia mai e le Agaga o le Atua, lea e masani lava o se leo filemu, ma le itiiti. Na fetalai mai le Alii, "O le a tuu atu e le Atua ia te outou le poto e ala i lona Agaga Paia, ioe, e ala i le meaalofa lē mafaamatalaina a le Agaga Paia" (Mataupu Faavae ma Feagaiga 121:26).

Na aoao mai e le Aposetolo o Paulo e faapea, e le mafai ona tatou iloaina mea a le Atua sei vagana ai e ala i le Agaga o le Atua (tagai 1 Korinito 2:9–11; tagai foi Faaliliuga Iosefa Samita, 1 Korinito 2:11). Na ia saunoa, "E le talia e le tagata faaletino o mea a le Agaga o le Atua: aua o mea valea ia ia te ia." Tatou te vaaia lena mea i aso uma. Sa faaauau le tala a Paulo, "Na te le mafai foi ona iloa, aua e faamasinoina faaleagaga" (1 Korinito 2:14).

Mai faafitaluli uma tou te fetaiai i le olaga, o le tasi e tatau ona muai tali o na mea uma o le mea e tupito le malamalama i ai. O le tulaga





aupito leaga o tulaga
uma o tagata soifua e le
o le mativa, ma”i, tuuatoa-
tasi, sauaina, po o taua---pe o
le a lava le matuia o i ai na tulaga. O
le tulaga aupito leaga o tulaga uma o tagata
soifua e sili ona taatele: o le oti lea faaleagaga.
O le tuueseesina lea mai le afioaga o le Atua,
ma i lenei olaga, o Lona afioaga o Lona Agaga
po o le mana lea.

I se isi itu, o tulaga aupito sili o tulaga uma
o le tagata soifua e le o le tamaoaiga, lau-
iloa, tulaga aloaia, soifua manuia, o mamalu
o tamaalii, po o le malupuipuia. O le tulaga
aupito sili o tulaga uma o tagata soifua, o le
faaeeina lea i le mana faalelagi. O le toefanau-
ina lea, o le maua o le meaalofa ma le mafu-
taga a le Agaga Paia, o le punavai o le atamai,
faaaliga, malosiaga, manino, alofa, olioli,
filemu, faamoemoe, mautinoa, faatuatua, ma
toetoe o isi mea lelei uma.

Na fetalai mai Iesu: “O le Fesoasoani o le
Agaga Paia lea, . . . na te aoao ia te outou
i mea uma lava” (Ioane 14:26). O le mana
lea “tatou te iloa ai le tonu i mea uma lava”
(Moronae 10:5). “O le a faaali mai . . . ia i
[tatou] mea uma . . . e tatau ona [tatou] faia”
(2 Nifae 32:5). O le punavai o le “vai ola” e
puna a’e i luga i le ola e faavavau (Ioane 7:38;
tagai foi i le fuaiupu e 37).

Totogi po o le a lava le tau e tatau ona e
totogiina, ia talia po o le a lava le avega e
tatau ona e tauaveina, ma faia po o le a lava le
osigataulaga e tatau ona e faia ia maua ai ma
tamau i lou olaga le agaga ma le mana o le
Agaga Paia. O mea lelei uma e faalagolago i le
mauaina ma le tausisia o le mana o le Agaga
Paia i lou olaga.

“O Le Mea Ua Le Faagaeitia”

O lea la o le a le faasasia sa ou lagonaina i
le tele o tausaga talu ai a o ou faitauina anomea
faatautee? O le a faapea mai nisi o le faasasia o le
fua o le talitonu faaitu’au, o le lilifa atu lea e piki ma filfili
na o mea e ogatusa ma o tatou manatu ma talitonuga faivavale. O le
mafaufau faapea o mea uma ua talitonu i ai se tasi ma sa aoaoina ai
atonu e sese, aemaise i le leai o se mea sili atu e sua ai, o se mafaufa-
uga faasasia ma le faalavelave moni lava.

Ae o le faasasia sa ou oo i ai a o ou faalogologo i tagata sa faitio-
ina le Perofeta o Iosefa Samita ma le Toefuataiga o le Eklesia a Iesu
Keriso e ese lava. O lena faasasia e le o se talitonuga faaitu’au, ma e le
o le fefe ina nei ou sese. O le leai o le Agaga o le Atua. O le tulaga o le
tagata pe a “tuua na o ia lava” (Mataupu Faavae ma Feagaiga 121:38).
O le faasasia o le pogisa ma le “mafaufauga papa” (Mataupu Faavae
ma Feagaiga 9:9; tagai foi i le fuaiupu e 8).

Na fetalai le Alii:

“Ma o le mea ua le faagaeitia e le mai le Atua, ma o le pouliuli lea.

“O le mea e mai i le Atua o le malamalamama lea; ma o ia o lē e maua-
ina le malamalamama, ma tumau pea i le Atua, e mauaina le malamalamama
atili; ma o lena malamalamama o le a tupu susulu malamalamama tele pea
lava pea seja oo i le aso e atoatoa ai” (Mataupu Faavae ma Feagaiga
50:23–24).

O faaaliga mai le Agaga o le Atua e fuaaoina talitonuga faaitu’au auu
e le o faavaeina na o ni faamaoniga. Ua ou faaaluina lo’u olaga atoa i
le sailiga ia ou faalogo i le afioga a le Alii ma aoao ia iloa ma mulimuli
i le Agaga o le Atua. O le agaga na fesootai ma leo leaga na osofaia le
Perofeta o Iosefa Samita, le Tusi a Mamona, ma le Toefuataiga e le o le
agaga o le malamalamama, atamai, ma le upumoni. E le tele se mea ou te
iloa, ae ou te iloaina le siufogfa o le Alii, ma o Lona siufogfa e le o i
ai i leo o e amioleaga.

I se faatusatusaga tuga i le faasasia ma mafaufauga papa mataga lea
na liliofa ai le faataufusi o le masalosalo o le agaga o le malamalamama,
atamai, filemu, ma le upumoni lea e o mai faatasi ma mea na tutupu
ma le aoaoga faavae mamalu o le Toefuataiga, aemaise ai o tusitusiga
paia na faaalia mai i le lalolagi e ala mai i le Perofeta o Iosefa Samita.
Tau lava ina faitau i ai ma fesili ifo ia te oe lava ma le Atua pe o ni upu
o le pepelo, taufaasese, ma se faafoliga pe o ni upumoni.

E Le Mafai Ona E Aoaoina le Upumoni e ala i le Aveesea

O nisi o e fefefe faapea atonu e le moni le Ekalesia, ua faaaluina lo latou taimi ma le gauai e tau la'ala'a ai i le faataufusi o fesili lona lua. Ua faaseseina i latou i le taumafai e aoao le upumoni e ala i le faagasologa o le aveesea, e ala i le taumafai e aveesea masalosologa uma. O se manatu e le lelei i taimi uma. E le mafai lava ona aoga.

O loo i ai ni tautinoga ma ni manatu e feteenai lava ma le upumoni. O taimi taitasi uma e te tulituliloa ai se tali i se tasi o tautinoga feteenai ma tepa ae i luga, e i ai foi se tasi e faataupupula atu ia te oe. Ou te le o faapea atu e tatau ona e le amanaiaina, ae o loo ou fai atu e mafai ona e faaaluina lou soifua ma le naunautai e tulituliloa ia tali i tautinoga uma e faasagatau i le Ekalesia ae le maua lava se malamalamaga i upumoni aupito ttau.

O tali i uluai fesili e le oo mai e ala i le talina o fesili lona lua. O loo i ai tali i fesili lona lua, ae e le mafai ona e faamaonia se tonu e ala i le faaleaogaina o mea faafeagai uma. E le mafai ona e faamaoniaina le Ekalesia e moni e ala i le faaleaogaina o tautinoga uma e faia faasaga i ai. O se faiga faavae e ponatia. O le taunuuga lava e tatau ona faamaonia le moni, ma faatasi ai ma mea a le Atua, o le faamaoniga moni e iu ina oo mai moni e ala i faaaliga e ala mai i le agaga ma le mana o le Agaga Paia.

I Ona Soo, na fesili i ai Iesu:

"A o outou pe se a la outou upu ia te au po o ai?

"Ona tali mai ai lea o Simona Peteru, ma faapea mai, O oe o le Keriso, o le Alo o le Atua soifua.

"Ona tali atu ai lea o Iesu, ua faapea atu ia te ia, Amuia oe Simona Paiona; aua e le se tagata na ia faaali atu ia te oe, a o lo'u Tama o i le lagi.

"... O Peteru oe, ou te ati ae foi la'u ekalesia i luga o lenei papa; e le mafaia foi e faitotoa o seoli ona manumalo i ai" (Mataio 16:15–18; tagai foi i fuaiupu 13–14).

O le Ekalesia a Iesu Keriso ua faavae i luga o le papa o faaaliga, e le mafaia foi e faitotoa o seoli ona manumalo i ai. O oe ma A'u o le Ekalesia lea. E tatau ona ta faavae i luga o le papa o faaaliga, ma e ui ina atonu tatou te le iloaina le tali i fesili uma, ae e tatau ona tatou iloa ia tali i uluai fesili. Afai tatou te iloa, o le a le manumalo lava faitotoa o seoli ia i tatou ma o le a tatou tumau e faavavau.



Tumau i luga o le Papa o Faaaliga

O loo i ai se Atua i le lagi o lē o lo tatou Tama e Faavavau. O Iesu Keriso o le Alo o le Atua, o le Togiola o le lalolagi. O Iosefa Samita o se perofeta a le Atua o lē na faataatiaina le faavae mo le Toefuataiga o le malo o le Atua. O Le Ekalesia a Iesu Keriso o le Au Paia o Aso e Gata Ai o le malo lea o le Atua i le lalolagi. Ua ou iloa

lenei mea e ala i o'u aafiaga---mea uma lava. Ua ou iloa lenei mea e ala i faamaoniga, ma o le faamaoniga e lofutuina. Ua ou iloa lenei mea e ala i le suesue. Ma, e sili ona moni, ua ou iloa lenei mea e ala i le agaga ma le mana o le Agaga Paia.

Ma faatasi ai ma lena mea, ua ou iloa o mea uma e manaomia ona ou iloa ia ou tumau ai e faavavau. Ina tatou tumau ai i luga o le papa o faaaliga, aemaise ai i uluai fesili. Afai tatou te faia, o le a tatou tumau e faavavau ma e le se ese ai lava. ■

Mai se lauga sa faia i se faigalotu, "Tumau e Faavavau," sa fofogaina atu i le Iunivesite o Polika Iaga i le aso 22 Januari, 2019.

FAAMATALAGA

1. *Aoaoga a Peresitene o le Ekalesia: Iosefa Samita* (2007), 282–83.

O la Lava o Sō Ta'ua

Vinaisi Maca Naquere, Lautoka, Fiti

*Sa tuu e faamauina i ma'ua ma lo'u toalua, ae sa matua
telē naua lenei sauniga paia nai lo i ma'ua e toalua.*

Ina ua mavae tausaga e fitu o le faamoemoe ma le faatalitali mo se fanau, sa iu ina faamanuiaina i maua ma lo'u toalua i se tama teine. O Alisi o le malamalama o o ma olaga, ae sa na o le lima masina na ola ai o ia ae maliu i le limonia.

O le aafiaga sili lea ona faigata i lo'u olaga. O aso uma ou te sau ai i le fare mai le galuega ma saofai ma tagi. E tele ina matou saofafai ma matua o lo'u toalua ma la te aumaia le malosiaga ia te au. Sa ou tatalo pea mo se isi tamaitiiti, ae e leai lava. Sa faatumulia au i le faanoanoa.

Sa amata e o'u matua faale-tulafono ona fautuaina i ma'ua ma lo'u toalua e ma te o i le Malumalu i Suva Fiti e faamauina ai. Ma te lei o muamua i le malumalu, ma sa tonu ia i ma'ua o le auala sili lea mo i ma'ua e maua ai le faamoemoe ma le faamalologa.

Sa leai se mea sa tapenaina ai au mo le mea sa ou lagonaina i lena aso! Sa ou iloaina o le a faamauina i ma'ua ma lo'u toalua mo le faavavau. Sa faatumulia a'u i lea malamalama ma le lotofaaftai ma le alofa. Ae sa ou le malamalama faapea o lenei sauniga paia e telē atu nai lo i ma'ua e toalua.

I le malumalu na ou aoaoina ai e mafai ona faamauina Alisi ia i ma'ua.



Sa ou tagiina loimata o le olioli ina ua ou iloaina lenei aoaoga faavae paia. O le a ma faatasi pea ma la ma tama teine le faavavau atoa! Ou te molimau atu ua saunia e le Atua mea uma tatou te manaomia mo le fiafia i Lona maota paia.

I tausaga talu mai lena taimi, ua faamanuiaina i ma'ua ma lo'u toalua i se atalii ma ni fanau vaetamaina e toatolu. Ae e le mafai lava ona ma faagaloina Alisi. Ona o sauniga paia o le malumalu, ua avea ai lo ma afafine o se vaega o lo matou aiga e faavavau.

Pe a ou feiloai i se tasi ua maliu se tamaitiiti, ou te lagonaina faatasi ma i latou o latou tiga. Ae ua ou iloaina foi o lena tiga e le o le iuga lea. I le maliu o Alisi, faapea foi le oo i isi tofotofoga, ua ou iloa ai o loo i ai le Atua iina mo au. Pe a ou lotovaivai pe faitio i ni mea, ou te iloaina lava o loo i ai pea lava le Atua iina.

Ua ou iloa o le a ou toe vaai ia Alisi, ma e faaauau pea ona faatumulia e le upumoni i ma'ua ma lo'u toalua i le olioli loloto. ■

Na la Toe Tuufaatasia A'u

Alaina Dunn, luta, ISA

*Na faalogo la'u uo o la sa ou ma'i ma sa ia auina mai se
paso na ia faia faapitoa mo a'u.*

Sa ou mafaufau lava a'u ia o a'u o se tagata e ola maloloina. O lea sa faateia ai au ina ua ou ala ae i se tasi taeao ua lagona e pei o oomiina malosi lo'u fatafata ma pei o le a pa. Sa faatelevave atu au i le falemai, ae ina ua mavae ni nai itula o suesuega, sa le mafai e fomai ona maua le faafitauli. Sa latou auina au i le fale, e ui o la lava sa ou mafatia i se tiga matautia. O lea na amata ai ni vaaiga o le fomai mo le fitu-masina-le umi, nofo i le falemai, ma le tiga sili ona matautia ua ou oo i ai i lo'u olaga.

Sa amata ona ou faatu. Sa tatau ona toe aveese mai a'u vasega i le kolisi ma ou toe foi e nofo ma o'u matua. Sa le mafai ona matou o e tafafao ma a'u uo. Sa ou matua tigaina tele ma sa le mafai ai ona ou faia lava se mea sa ou fiafia i ai. Sa ou lagonaina o mea uma ou te manatu alofa i ai—o o'u faanaunauga, o a'u fegalegaleaiga, o a'u taleni—ua nutipalaina, ma o le taimi nei ua foliga mai ua le mafai ona toe tuufaatasia vaegamea o lo'u lava tagata. Ma sa amata ona ou taumanatunatu: Ua mafai faapefia e le Tama Faaelagi ona faatagaina lenei mea e tupu ia te au? Pe ua le alofa o Ia ia te au?

Ina ua mavae se isi vaaiga tiga ma le le manuia a le fomai, na pau lava le mea sa ou manao ai o le faapupuu ma tagi. Ae ina ua ou taunu i le fale, sa ou vaaia se mea uigaese i luma o le faapaologa: o se pusa tuai masaesae o

seevae ua tumu i mea faapipii ma o loo faatuatusi mai ia te au.

O se tusi i luga o le pusa sa faaalia ai o le afifi na aumai i se tasi o a'u uo. Na faalogo o ia o la sa ou ma'i ma sa manao o ia e faafifafia a'u. Ina ua ou tatalaina le pusa o seevae, sa ou maua ai le tele o nutiga momi ninii. O se paso na ia faia faapitoa mo au.

A o ou tuufaatasia le paso, sa amata ona ou tagi. O le paso na mamanu ai lo'u igoa, ae siomia i savali matagofie o le alofa ma le faamalosiauga. Sa ou lagonaina o vaega na faataapeapeina o a'u lava ia, ua toe tuufaatasia nei a o ou tuufaatasia le meaalofa a la'u uo.

I sina taimi puupuu mulimuli ane, sa amata ona ou iniuvai lea sa faaitiitia ai auga ma sa fesoasoani i fomai e faia ai se faaiuga. Sa uiga ese le tulaga sa ou i ai ae sa mafai ona togafitia, ma faatasi ai ma vailaau talafeagai, sa mafai ai ona ou toe foi i le olaga masani.

E oo lava ina ua faamaloloina lo'u tino, sa ou iloaina o le a le gallo lava ia te au mea sa ou aoaoina. Ona o le meaalofa matagofie a la'u uo, sa ou iloa ai sa alofagia au ma sa lei faagaloina lava au e lo'u Tama Faalelagi. Ina ua mavae ni masina o lagona nutipalaina, faafetai i le agalelei o se ue ma le alofa o lo'u Tama o i le Lagi, ua ou toe atoatoa ai. ■



"E I Ai Se Lua Tusi Lanumoana e I Ai Mataitusi Auro?"

Michael Jacobson, Oregon, ISA

*O sei taimi ina ua uma ona tia'i le tusi, sa ou fialoa
pe o a mea sa i ai.*

I tausaga ua mavae, sa ou mauaina
ai se tusi lanumoana e i ai mataitusi
auro i le faavaa mai faifeautalai sa
talai i le nofoaga autu o le militeli lea
sa aoaoina ai au mo la'u galuega i le
Neivi a le Iunaite Setete.

Ina ua amata ona ou faitauina le
tusi, sa fai mai se tasi ia te au e sese
ona sa kopiina mai le Tusi Paia. O le
mea lea na afua ai ona ou masalomia
le moni o le tusi, ae sa ou teuina pea.
Sa ou faitauina sina mea itiiti, ma toe
tuu i le ta'ele o la'u ato, ona galo ai
foi a lea.

I le mavae ai o se tausaga mulimuli
ane, sa tonu ia te au e teu faamama

la'u ato. Sa ou mauaina le tusi ae ua
le o toe i ai so'u manatu i ai, o lea
na ou tia'ia ai. Ae i se taimi mulimuli
ane, sa oo ina ou fialoa le mea sa i ai
i lena tusi lanumoana e i ai mataitusi
auro. Ua ou talitonu nei o le lagona
lea na aumai mai le Agaga, "lea na te
taitai ia fai mea lelei" (Mataupu Faavae
ma Feagaiga 11:12).

I le 2005, sa valaaulia ai au e se
uo fou na ou maua, e faalogologo i
faifeautalai. Muamua, sa i ai a'u fesili
ma ni faaletonu i mea sa la aoao mai,
ae sa to'a faifeautalai ma tuuina mai
tali e talafeauga ia te au.

Ina ua ou iloaina o nei faifeautalai
e pei o ia na ou feiloai i ai i tausaga
ua mavae, sa ou fesili ma le
naunautai ia i la'ua, "E i ai se
lua tusi lanumoana e i ai
mataitusi auro?"

"Ioe, e i ai!" sa tali mai ai se tasi o i
la'ua. "E ta'ua o le Tusi a Mamona!"

Sa o se mea fiafia le toe maua o le
Tusi a Mamona. O le mea moni, sa
ou matua fiafia lava ma o lea na ou
faituaina e sili atu i le faatasi a o lei
atoa ni vaiaso se lua! A o ou faitauina
ma tatalo, sa oo ina ou iloaina o le
afioga a le Atua.

Na saunoa Elder Rubén V. Alliaud
o le Fitugafulu i se mea i le konafesi
aoao e fesootai i lo'u aafiaga ma le
Tusi a Mamona. "Soo se tagata faitau
lava e tautino atu i se suesuega faa-
maoni [o le Tusi a Mamona], faatasi
ma se agaga o le tatalo, e le gata o
le a aoao e uiga ia Keriso ae o le a
aoao *mai* ia Keriso—aemaise lava pe
a latou faia le faaiuga e "faataitaia o
le mana o le afioga" [Alema 32:5] ma
aua le vave teena ona o manatu faa-
ilogalanu o le le talitonu ona o mea
ua ta'u mai e isi e uiga i mea latou te
lei faitau lava i ai."¹

O le faitauina o le Tusi a Mamona,
tatalo, ma le faalagolago i le Agaga,
ua ou vaai ai i mea maoae ua taunu
i lo'u olaga. ■

FAAMATALAGA

1. Rubén V. Alliaud, "Maua e ala i le Mana o le Tusi a Mamona," *Liahona*, Nov. 2019, 37.



O Le Faamoemoega o Lo'u Papatisoga

Rui Cong Hong, Aai o Niu Taipei, Taiuani

A o lei oo i lou papatisoga, sa ou nofo na o au ma sa ou tatalo ia faavavega ona o mai a'u uo.

I le avea ai o se tamaitiiti e nofo i nuu maotua o Taipei, i Taiuani, sa leai so'u iloa e uiga i faiseautalai. O le taimi muamua lava na ou fesootai ai ma i la'ua, sa ou fialoa e uiga i la'ua savali. E lei umi ae ou naunau e mulimuli ia la'ua aoaoga ma faataitaia le talalelei i lo'u olaga. Sa ou lagonaina o se auala lea mo au e iloa ai pe i ai moni lava se Atua.

I totonu o se masina, sa aoaoina au i le talalelei ma poloaiga ia e aoao a o lei oo i le papatisoga. Na oo mai le filemu ia te au e ala i le tatalo, ma sa ou mauaina se faaaliga patino mai le suesueina o tusitusiga paia, ma ou te lei misia lava se sauniga Lotu. Sa tonu ia te au e tatau ona ou papatiso.

O le luitau aupito telē sa ma feagai i le taimi lea o faafitauli na alia'e mai i a'u sootaga ma nisi o a'u uo ona sa latou tetee i lou auai ai i le Ekalesia. Sa ou tatalo malosi e uiga i nei faafitauli, ae sa foliga mai sa atili ai ona leaga a matou sootaga.

Sa ou valaaulaina a'u uo i lo'u papatisoga, ae sa latou matuai le amanaiaina la'u valaaulia. Sa ou matua le iloaina lava le mea a fai. A o lei faia lo'u papatisga, sa ou nofo na o au i luga o le sofa i le faapaologa o le falelotu, ma tatalo ai ia faavavega lava ona tutū mai a'u uo ina ia mafai ai ona ou ta'u atu ia te i latou e uiga i



suiga lelei ua ou faia i lo'u olaga, ma faamaonia atu ai ia i latou sa ou faia le faaiuga sa'o e ala i le papatisoina.

E lei o mai lava a'u uo, ae a o sasaa atu lo'u loto i le Atua, sa ou lagonaina se uunaiga. O le taimi lea, sa ou lagonaina ai se alofa tele mai lo'u Tama Faalelagi. Sa ou iloaina sa i ai o Ia iina ma sa faafogofa moni mai i la'u tatalo.

Sa ou uluai manao ia papatiso ona o mea matagofie uma ua tutupu i lo'u

olaga, ae i le taimi lea, sa oo ina ou malamalama i le faamoemoega o lo'u papatisoga.

O le uunaiga na ou maua sa pei o le siufofoga o le Alii o tulei sa'o mai ma le alofa ia te au ma faapea mai, "E te le tau faamaonia se mea i se tasi. Na pau lava le mea e te manaomia o le faamaonia mai ia te a'u ua e nau-nau e sau ia te au ma tumau faamaoni i la'u talalelei mo aso uma o totoe o lou ola." ■



Tle auaunaga a Iesu Keriso ia sa Nifae, sa Ia faaali atu le alofa tele ma Lona mana faamalolo ia i latou uma o e na o mai ia te Ia. O le a se mea e mafai ona tatou aoao mai i le aafiaga o sa Nifae ma le Faaola?



TALANOAGA


- Pe ana fai sa e i ai faatasi ma sa Nifae, mata o le a se mea semanu e te talosagaina le Faaola ia faamalolo? O le a sau tala e fai atu ia te Ia?
- E mafai faapefea ona e, faapei o sa Nifae, sau ia Keriso ma iloa ai Lona alofa ma le mana faamalolo i lou olaga?
- O anafea na e lagonaina ai le alofa o le Faaola? Na faapefea ona e lagonaina lena alofa?

E mafai faapefea ona tatou iloa le mana faamalolo o Keriso?

Tofotofoga o sa Nifae

O le tele o tausaga a o lei taunu atu lesu sa tumu i faigata. Sa onosaia e sa Nifae:

- | | | | | | |
|---|--|-----------------------------------|---|--|---|
| • Sauaga faale-lotu (tagai i le 3 Nifae 1:9). | • Amioleaga ma mea inosia (tagai 3 Nifae 2:3, 7:7) | • Taua (tagai i le 3 Nifae 2:17). | • Faailoga lanu o ituiga (tagai 3 Nifae 6:10-14). | • Fevaeveai fa-lemalo (tagai 3 Nifae 7:1-4). | • Mala faalena-tura i le taimi o le tolu aso o le pogisa (tagai 3 Nifae 8). |
|---|--|-----------------------------------|---|--|---|



Auaunaga a Keriso ia sa Nifae

Ina ua faaali atu le Faaola i tagata sa Nifae, sa la valaaulia tagata uma o e puapuagatia i soo se ala" (3 Nifae 17:7) e o mai ina ia faamaloloina. O Lana valaaulia na tuuina atu i talaatu o faigata na feagai ma sa Nifae i lena taimi. Sa faatatau i manua na vaaia ma mea e lei vaaia atonu sa tauaveina e sa Nifae i o latou olaga uma. Sa faamalolo e lesu Keriso "tagata uma" (3 Nifae 17:9) ma auauna atu ia te i latou "taitoatasi" (3 Nifae 17:21).



3 Nifae 17-19

(28 SETEMA–11 OKETOPA)

Ina ua asiasi atu le Faaola ia sa Nifae, e 11 taimi na Ia tatalo ai faatasi ma i latou. E ala i upu ma faataitaiga, sa Ia aoao atu ai i latou i le ala e tatau ona latou tatalo ai. O loo faauau pe a perofeta, tagata vaai, ma tali faaaliga o aso e gata ai ona aoao mai mea sa aoao mai e le Faaola e uiga i le tatalo. O nisi nei o faataitaiga:

TALANOAGA

O a isi mea na aoao mai e le Faaola ma perofeta ma aposetolo o aso e gata ai e uiga i le tatalo? E mafai faapefea e nei aoaoga ona fesoasoani i au tatalo ia anoa atili ia te oe?

FAAMATALAGA

1. David A. Bednar, “Tatalo e le Aunoa,” *Liahona*, Nov. 2008, 43.
2. Thomas S. Monson, “O Sini e Tolu e Taialaina ai Oe,” *Liahona*, Nov. 2007, 121.
3. *Aoaoga a Peresitene o le Ekalesia: Howard W. Hunter* (2015), 115.
4. Dallin H. Oaks, “O Le Gagana o le Tatalo,” *Liahona*, May 1993, 17.
5. Boyd K. Packer, “Tatalo ma Uunaiga,” *Liahona*, Nov. 2009, 43–46.

E mafai faapefea ona ou tatalo e faapei ona sa aoao mai e le Faaola?



O mea sa aoao mai e le Faaola.

Tatalo mo isi (tagai 3 Nifae 17:14, 17, 21; tagai foi 3 Nifae 18:23)

“Ia mataala ma tatalo e le aunoa” (3 Nifae 18:15)¹

“Tatalo i o outou aiga (3 Nifae 18:21; tagai foi 3 Nifae 17:3)

Aua le faatelea ni mau upu (tagai 3 Nifae 19:24; tagai foi 3 Nifae 13:7)

“Tatalo pea” (3 Nifae 19:26)

O mea o loo aoao mai e perofeta, tagata vaai, ma tali faaaliga o Aso e Gata Ai

“Tatalo mo isi faatasi ai ma le malosi uma o o tatou agaga, e faateleina ai lo tatou malosi e lagona ai ma gauai atu i le siufogoa o le Alii.”²

“E ala i le tatalo ma le faamaoni ma le lotonaunau e mafai ai ona tatou maua ia faamanuiaga manaomia ma le lagolago e moomia ina ia tatou saogalemu ai i lenei malaga faigata ma luitau i nisi o taimi lea ua tatou ta’ua o le olaga faitino.”³

“Afai o le a e . . . [auai] i tatalo faaleaiga i aso taitasi, . . . o le a e maua faamanuiaga folafolaina a le Alii i le tauis o se fanau amiotonu.”³

“O a tatou tatalo e tatau ona faigofie, tuusa’o ma faamaoni.”⁴

“Tatalo soo. Tatalo i lou mafaufau, ma i lou loto. Tatalo i ou tulivae. O le tatalo o lau lava lea ki i le lagi. O le loka o loo i lou itu o le veli.”⁵





3 Nifae 20-26

(12-18 OKETOPA)

Faatasi ai ma le tele o mea na aoao atu e le Faaola ia sa Nifae, sa Ia aoao atu foi i latou e uiga i le faapotopotoina o Israuelu ma sa poloaiina i latou e suesue i tusitusiga paia ma ia tausia a latou lava faamaumauga. E mafai faapefea ona tatou mulimuli i nei aoaoga i le taimi nei?



Suesue i Perofeta

Na poloai atu le Faaola ia sa Nifae e “suesue i perofeta” (3 Nifae 23:5). Ua ia i tatou le avanoa e faalogologo ai i le perofeta soifua ma isi taitai o le Ekalesia o lauga mai i konafesi aoao.

- O le a se mea e mafai ona e faia ina ia maua ai ni mea se tele mai le konafesi aoao?
- E faapefea e le “suesue i perofeta” ona fesoasoani ia i tatou i le faapotopotoina o Israuelu?

Aufaatasi i le Galuega

Na valoia e Iesu Keriso se “galuega ofoofogia” i aso e gata ai (tagai i le 3 Nifae 21:9). O lena galuega o le faapotopotoina o Israuelu. Na taua e Peresitene Russell M. Nelson lena mea “o le mea aupito taua o loo tupu nei i le lalolagi” ma sa ia saunoa, “Afai e te filifili e, pe afai e te manao ai, e mafai ona avea oe o se vaega tele o lena mea.”¹



- E mafai faapefea e oe ma lou aiga ona aoao atili e uiga i le auai ai i le faatinoina o le faapotopotoina o Israuelu?



Tausi se Faamaumauga

Sa poloaiina e Iesu Ona soo sa Nifae e tausia se faamaumauga o Ana aoaoga ma valoaga a Samuelu le sa Lamana (tagai i le 3 Nifae 23:4, 6–13). E faapena foi, e mafai ona tatou tusi faamaumauina o tatou aafiaga i le olaga e fesoasoani ai ia i tatou e aoao atu isi.

- Pe o i ai ni aafiaga faaleagaga ua mavae e te lei faamaumauina?
- E mafai faapefea ona e tusi faamaumauina mea o loo aoao atu e le Atua ia te oe?

FAAMATALAGA

1. Russell M. Nelson, “Faamoemoe o Israuelu” (faigalotu a le autalavou i le lalolagi atoa, 3 Juni, 2018), *HopeofIsrael.ChurchofJesusChrist.org*.



3 Nifae 27–4 Nifae

(19–25 OKETOPA)

Ina ua mavae le faaali atu o le Faaola ia sa Nifae, na toeitiiti atoa le 200 tausaga o le lotogatasi ma le filemu ona sa latou "liliu . . . uma i le Alii" (4 Nifae 1:2).

O a ni nai faataitaiga o faatinoga amiontonu a sa Nifae? E mafai ona e fai-tau i le 4 Nifae 1:2–15 ma faatutumu ia avanoa i nisi faataitaiga e te maua:

- _____
- _____
- _____
- _____

TALANOAGA

- Faatusatusa le fiafia o sa Nifae amiontonu i le faanoanoa ina ua latou amioletonu. Manatunatu loloto i le ese-esega ma sue ni auala e mafai ona e liliu atili atu ai i le Alii.
- Pe mafai ona e filifilia se mea e tasi e mafai ona e faaleleia atili i lou olaga?
- E mafai faapefea e nei mea ona aumaia faalatalata oe i au uo, aiga, ma le Alii?


O le a le uiga o le liua moni?



Fiafia ma le Lotogatasi

Sa fiafia sa Nifae ma sa lotogatasi e ala ia latou faatinoga amiontonu (tagai 4 Nifae 1:2–15).

- Sa latou faatutusa tagata uma ma agalelei i le tasi ma le isi.
- Sa latou mulimuli i poloaigai a Keriso.
- Sa latou lotomualalo i anapogi ma talosaga.



Faanoanoa ma le Fevaevaeai

Ae paga lea, o na tausaga o le lotogatasi ma le fiafia sa lei tumau e faavavau. Sa mulimuli ane, ua le toe usitaia e sa Nifae ia poloaiga a le Atua (tagai 4 Nifae 1:24–31). I le faia o lena mea:

- Sa amata ona latou manatu faapito ma faamaualulu.
- Sa latou fauina a latou lava lotu mo le mauaina o a latou tipe.
- Sa latou faafitia le Ekalesia a Keriso.







Saunia e Bishop
Dean M. Davies

Fesoasoani
Muamua i le
Au Epikopo
Pulefaamalumalu

Maotatapuai— O Nofoaga o le Migao ma Tapuaiga

*O loo i ai le Agaga o le Alii i o tatou maotatapuai ma o le a
musuia i tatou pe a tatou faafoeina i tatou lava i le migao i
Ona luma.*

Sa faasoa mai e se paaga tuuto faigaluega ia te au sona aafiaga a o ia faataunuina se tofiga e teu ese nofoa ma faamamā le nofoaga autu o le siteki ina ua mae'a se konafesi a le siteki. Ina ua maea le 30 minute o le faatinoina o nei tiute, sa ia iloaina o ia le tagata mulimuli o loo totoe i le fale. Ae, nai lo le lagonaina o le tuuatoatasi ma se faanatinati e alu, sa ia matauina le lagona matagofie lava e tasi sa ia lagonaina i le taimi o le konafesi, o loo tumau pea ia te ia ma sa faateleina.

Ina ua mae'a lana galuega ma ulufafo atu mai le maotatapuai, sa la fetau mai se tasi tagata o le au paia sa foliga mai sa ia mataituna lelei o ia. O le mataulia o le mea sa faia e la'u uo, sa tago atu le tagata lea i lona lima ma faapea atu, "Uso, o loo silafia e le Alii nei mea iti ua e faia mo Ia, ma o loo silasila mai i lalo ma soisoi mai i ai."

Na mavae tausaga e tele ao avea o se epikopo, sa toe i ai foi lea lava uo na o ia i le maotatapuai o lana uarota. Ina ua mae'a ona tape ia moli i le falesa, sa ia faatuuai mo sina minute a o susulu atu le masina i faamalama agai atu i le pulelaa.

Sa toe faatumulia foi o ia i lea lava lagona filemu ua masani ai, ma sa ia nofo ifo i lalo i luma o le falesa ma manatunatu i le mau taimi paia sa ia oo i ai i lena faatulagaga—o taimi e tele sa ia matauina ai ositaulaga o lulifufia le areto i le laulau faamanatuga, o taimi na ia lagonaina ai le Agaga Paia o mafuta atu ia te ia a o ia tuuina atu se lauga i se konafesi a le uarota, o sauniga o papatisoga sa ia taitaia, o pese matagofie a aufaipese sa ia faalogo ai, ma le mau molimau mai tagata o le uarota sa matua tuia loloto ai o ia. A o nofonofo ai na o ia i le falesa ua pogisa, sa ia lagonaina le faatumuina i taunuuga tuuafatasi o nei aafiaga i lona olaga ma olaga o tagata o lana uarota, ma sa punou ifo lona ulu i se lotofaafetai maoae.





Sa aoaoina ma le poto ma le tonu la'u ue faaapea o nofoaga e sili ona paia i le lalolagi o le malumalu ma le fale, ae e ala i aafiaiga e lua na faamatala atu i luga, sa ia malamalama ai foi i le natura paia o o tatou maotatapuai. Ona sa faapaiaina e le pule o le perisitua, ua avea ai nei faatulagaga e liligi mai i ai e le Alii ia faaaliga i luga o lona nuu ma "faaalia ai le mana faaleatua" e ala i sauniga e faatinoina ai iina (tagai i le Mataupu Faavae ma Feagaiga 84:20).

O le maotatapuai e tuufaatasi ma le fale e aumaia ai le olioli folafolaina lea e mafai ona maua e le Au Paia faamaoni i le Aso Sapati. E avea o se nofoaga e tapuai faatasai ai tagata o le au paia, ma matua'ia ai ona "fili faatasai o latou loto i le lotogatasi ma le alofa o le tasi i le isi" (Mosaea 18:21) ma agai atu i le Faaola. Mo i tatou e tuuina atu le lotofaafetai e tatau ai ma le faaaloalo mo le sasaa mai o faamunuiga faaleagaga lea e oo mai ia i tatou e ala

mai i o tatou maotatapuai, e ao ona tatou ulufale atu i nei nofoaga o tapuaiga ma se uiga faaalia o le migao loloto ma le faamaoni.

O Le Uiga o le Migao

I la tatou aganuu faaonaponei i le Ekalesia, o le upu *migao* ua suaia ia uiga tutusa ai ma le upu *fifilemu*. E ui o leo lemu e matuai talafeagai mo o tatou falesa, ae o lea malamalama utiuti i le migao e le o maua tonu ai le uiga atoa o le upu. *Reverence* e maua mai i le veape Latina o le *revereri*, o lona uiga o le "tu atu ma le ofo i le."¹ Pe mafai ona tatou maua se faaupuga e sili atu ona faamatalaina ai ma le mana ia lagona o o tatou agaga pe a tatou manatunatu loloto faamaoni i mea sa faia e le Faaola mo i tatou taitoatasii?

Ua ou manatua ai upu o se viiga matagofie tatou te lagina i o tatou falesa, "Ou te tu ma ofo i le alofa o Iesu."² O lena lagona maoae o le lotofaafetai, faaneetaga ma le maofa o le fatu lea o le migao, ma e uunaia ai i tatou e aloese mai soo se ituaiga o gagana po o amioga e ono faavaivaia ai na lagona i totonu o i tatou lava po o isi.

O Maotatapuai ma le Aso Sapati

Mai faaaliga i ona po nei, ua tatou iloa ai o se vaega tutotonu o la tatou tapuaiga i le Aso Sapati o le "o atu i le fale tatalo ma ofo atu a

[tatou] faamanatuga i le aso paia [o le Alii]" (Mataupu Faavae ma Feagaiga 59:9). O "fale o le tatalo" lea tatou te faapotopoto ai i le Sapati o tatou maotatapuai paia na.

Ua fesoasoani mai Peresitene Russell M. Nelson ia tatou malamalama atili i le sootaga vavalalata i le va o lo tatou migao mo le Faaola ma o tatou lagona e uiga i le aso Sapati. I le faasoa mai o lona lava aafiaga i le faamamaluina o le Sapati, sa faamatala mai ai e Peresitene Nelson, "Sa ou iloa mai tusitusiga paia o la'u amio ma o'u uiga i le Sapati o le a avea ma se *faailoga* i le va o a'u ma lo'u Tama."³

E pei lava o le avea o a tatou amioga ma uiga faaalia i le Sapati o se faailoga o lo tatou tuuto atu i le Alii, o a tatou amioga, o o tatou uiga faaalia, e oo lava i le faiga o o tatou lavalava ao i ai i Lona fale o le tatalo e mafai ona ta'u atu ai le maualuga o le migao tatou te lagonaina agai i le Faaola.

O Maotatapuai ma Sauniga

Na faateleina e Elder Jeffrey R. Holland o le Korama a Aposetolo e Toasefululua lo tatou malamalama e uiga i lenei manatu faavae, ma tautino mai ai:

"E faaopoopo atu i le faavanoaina o taimi mo aoaoga o le talalelei e faatotonugalemu-i-le-aiga, o a tatou sauniga o le Aso Sa ua fetuunaiā . . . ua faamamafa ai le faamanatuga o le Tausamaaga a le Alii e fai ma taulaiga autu paia, ma faamamaluina o o tatou aafiaga i tapuaiga i vaiaso taitasi. E ao ona tatou manatuaina i se ala sili ona patino tatou te mafai ai, na maliu Keriso mai se loto nutimomoia i Lona tauaveina



atoa na o Ia o agasala ma faanoanoaga o le aiga atoa o le tagata.

"Talu ai na tatou saofagā i lena avega matautia, o se taimi faapena e matua manao-mia ai lo tatou faaaloalo"⁴

E taua le manatua o le nofoaga atofa mo lea taimi sili ona maualuga o le faaaloalo agai i le Faaola o le falesa o le maotatapuai. E faaopoopo atu i le migao tatou te lagonaina i le saungia faalevaiaso o le faamanatuga, o o tatou lagona o le migao ma le faaaloalo e faateleina pe a tatou mafaufau i isi sauniga ma faamanuiaga o le perisitua e faatinoina i totonu o maotatapuai, e aofia ai le faaigoaina ma le faamanuiaina o fanau, papatisoga ma faamauga, faauuga i le perisitua, ma le vaetofaina mo valaauga. O nei sauniga taitasi ma faamanuiaga e mafai ona aumaia ai se liligi tele mai o le Agaga Paia pe afai e o mai i latou o e auai i le faatinoina ma i latou o e lolotu mai i se uiga faaalia o le migao.

O Maotatapuai ma Tapuaiga

O le aso Sapati tatou te maua ai le avanoa e tapuai ai i le Alii i le taimi o a tatou suesuega



i le fale, ma se potopotoga i le taimi o la tatou faamanatuga ma isi sauniga. Talu mai aso o le popofou o le Ekalesia, sa fifia le Au Paia e o mai faatasi e mafuta ma amatalia noataga faaleusoga a alii ma le usoga faatamaitai. Sa mamanuina foi o tatou maotatapuai ma ni avanoa e faatino ai na ituaiga o gaoioiga i le gasologa o le vaiso. Peitai, e le tatau ona galoa ia i tatou le uluai faamoemoega o nei fale, o le saunia ai lea o se nofoaga mo tapuaiga.

O tapuaiga ma le migao e fesootai vavalata. “A tatou tapuai atu i le Atua, tatou te faalatalata atu ia te Ia ma le alofa migao, lotomualalo, ma le faamemelo. Tatou te mataulia ma talia o Ia o lo tatou Tupu paia, le Foafoa o le atulaulau, o lo tatou Tama pele alofa ma faavavau.”⁵

O lea faamoemoega autu o le tapuaiga e

tatau ona tosina ai la tatou amio i maotatapuai tusa lava pe o tatou faiangaoioiga faaagafesootai po o faafiafiaga. E ao ona tausisia se vaava-aiga tele e faaitiitia ai le gaogaosa, o otaota, po o le faaleagaina o soose vaega o le fale mai gaoioiga faale-Lotu, ma e tatau ona vave faia se faatatau e faamama ai pe faaleleia ai pe a tulai mai se mea faapena.

E mafai ona aoaoina tamaiti ma le autalavou o le migao ma le tau-siga o le maotatapuai e le na o sauniga ma fonotaga i Aso Sa. O le auai o le au paia i le faamamaina o maotatapuaia—aemaise le auai tuufaataso i matua ma fanau—o se auala matagofie lea o le atiina ae o se lagona o le migao mo o tatou maota paia. E pei ona molimauina i le aafia i la’u uo i le faasa’osa’oina o le nofoaga autu o le siteki ina ua uma le konafesi a le siteki, o lena lava gaoioiga o le teuina o le maotatapuai o se auala o le tapuai ma valaaulia ai le Agaga o le Alii.

O Maotatapuai ma le Faaola

I lalo o le taitaiga faaperofeta a Peresitene Nelson, ua faia ai tau-mafaiga maoae ia mautinoa ai e le taofia le suafa o Iesu Keriso pe a faasino i Lana Ekalesia. I se auala foi faapena, e le tatau ona tatou



ATA NA PUENNA E JAMES ILIFFE JEFFERY

ATA PUENNA E JAMES ILIFFE JEFFERY

*O le tausiga o o
tatou maotatapuai
o se ala o le tapuai
ma e valaaulia ai le
Agaga o le Alii.*



faatagaina le aveesea o le Faaola mai le totonugalemu o a tatou tapuaiga—e aofia ai o tatou nofoaga mo tapuaiga.

Ua tatou masani i le faasino atu i le malumalu o le maota o le Alii, o se faatatauga sa'o ma le taua. Peitai, tatou te ono magaga ina galo, o o tatou maotatapuai taitasi ua faapaiaina i le pule o le perisitua e avea o se nofoaga e mafai ona afio ai le Agaga o le Alii ma se nofoaga mo fanau a le Atua—i latou i totonu ma fafo o le Ekalesia—e mafai ona latou maua ai “le malamalama i lo latou Togiola” (Mosaea 18:30).

O le faamemoega na faasilasila mai talu ai nei e faamatagofie ai o tatou maotatapuai i galuega o faatufugaga ia e faaalia ai ma le faaaloalo le Faaola ma mea paia na tutupu i Lona soifuaga i la le tino ma ina ua mavae i la le tino, ua mamanuina ina ia ta'a'ina atu ai o tatou mata, mafaufau, ma loto ia latalata atili

atu ia te Ia. A o e ulufale atu i nei fale o le tatalo mo sauniga ma gaoi-oiga, matou te valaaulia ma le alofa oe e te tu, matau, ma manatunatu loloto i nei atavali paia, e maimoa i ai ma lau fanau, ma faatagaina i latou ia faateleina ou lagoona o le tapuai ma le migao i le Atua.

Na tautino mai e le perofeta o le Feagaiga Tuai o Sapakuka, “O Ieova ua i lona malumalu paia o ia: ina faalologo ia le lalolagi uma i ona luma” (Sapakuka 2:20). Ia faapena foi ona tatou manatua o loo i ai le Agaga o le Alii i o tatou maotatapuai ma o le a musuia i tatou pe a tatou faatautaia i tatou lava ma le migao i Ona luma. ■

FAAMATALAGA

1. “Revereri,” Lexico Powered by Oxford, [lexico.com](https://www.lexico.com).
2. “Ou te Tu ma Ofo,” *Viiga*, nu. 107.
3. Russell M. Nelson, “O Le aso Sapati o se Aso Fiafia,” *Liahona*, Me 2015, 129.
4. Jeffrey R. Holland, “Faauta i le Tamai Mamoe a le Atua,” *Liahona*, Me 2019, 46.
5. Dean M. Davies, “O Faamanuiaga o le Tapuai,” *Liahona*, Nov. 2016, 94.

Autalavou Matutua

I Le Vaega Lenei

44 Pe Tutusa le Mausa ma le Fouvale?

Saunia e Destiny Yarbro

48 O Motugaafa e 7 mo le Faatoilaloina o le Faaogaina o Ponokalafi

Saunia e Richard Ostler

Na o Polokalama Faaeletonika

Lagolagoina o Lo'u Tina i Lana Malaga i le Mafaufau Manino

Saunia e Onnastasia Cole

Saili nei tusiga ma isi:

- I le Liahona.ChurchofJesusChrist.org
- I le [YA Weekly](http://YAWeekly.com) (i lalo o le vaega mo Autalavou Matutua i le Gospel Library)

Faasoa Mai Lau Tala

E i ai sau tala uiga'ese e faasoai mai? Pe e te manao e vaai i ni tusiga e uiga i ni mataupu faapitoa? Afai o lea, matou te fia faalogo atu ia te oe! E mafai ona e tuuina mai lau tusiga po o ou manatu faaalia i le Liahona.ChurchofJesusChrist.org.

E Mafai Ona E Maua le Saolotoga

Pe ua e, po o se isi e te alofa i ai, ua utia i le faataamilosaga o le faaleaga mea, salamo, toe faaleleia ma toe faaleaga foi? E toatele le autalavou matutua sa matou galulue a o avea o se epikopo o le uarota a le autalavou matutua, na utia i le faataamilosaga lava lea e tasi. **Peitai e toatele foi na maua le saolotoga e ala i le Togiola a lesu Keriso.** O savali e uiga i maua i le vaega o le masina lenei o loo tuuina atu ai se malamalamaaga e fesoasoani i le mauaina o le saolotoga---mo oe lava faapea foi ma isi.

O le mea aupito taua e tatau ona tatou manatua o le, **o i tatou uma o ni fanau pele a le Tama Faalelagi.** Na aoao mai e Elder Dieter F. Uchtdorf, 'E le o faatalitali [le Atua] seiloga e te faatoilaloina ou vaivaiga ma maua leaga ona faatoa alofa mai lea ia te oe. O loo alofa o la ia te oe i le taimi nei faatasai ma se malamalamaaga atoa i au tauviga. . . . Na te silafia lou salamo mo taimi na e sasi ai pe toilalo ai. **Ma o loo alofa pea o la ia te oe**" ("Ola Fiafia i le Talalelei," *Liahona*, Nov. 2014, 123; faaopoopo le faamamafa).

I se isi itu, o le a taumafai Satani e faatalitonu oe o le a mamao ona e toe maua le alofa o le Tama Faalelagi ma le mana o le Faaola e faaliliu ai ma faamamaina oe. O le a taumafai Satani ia taofia oe i se vaitaaavili o le maasiasi ma le inoinio ia te oe lava, ae aua e te talitonu i ana pepelo.

Nai lo lena, liliu atu i le Tama Faalelagi. **Aua e te fefe** e talanoa atu i lou epikopo po o le peresitene o le paranesi ma isi e alolofa ia te oe. A o e faitau i tala o le faamoemoe mai isi talavou matutua o e sa aafia i maua, ia e gaoioi i luga o uunaiga e te mauaina. **la onosai ia te oe lava, manatua lou natura paia, ia taitasi le aso i le taimi, ma talitonu i le mana faamalolo o lesu Keriso.** O la ma le tele naua o punaoa o le a fesoasoani ia i tatou ia manuia i le sailiga o le saolotoga tatou te naunau i ai. Aua lava e te fiu.

O lau uo,
Richard Ostler





Pe Tutusa le Mausa ma le Fouvale?

O se malamalama sili atu e uiga i mausa e mafai ona fesoasoani ia i tatou ia talitonu faapea, e i ai se aso, o le a laveaiina ai i tatou e le Alii mai le pologa.

Saunia e Destiny Yarbro

Io tatou lalolagi pau, o le mausa e faaoso ita ma o se mea moni e fetuunai ai le olaga mo nisi. Pe a tatou faaaogaina se mea soona fai e solaese ai mai le olaga, e pei o meaai, fualau faatonuina, fesootaiga faaagafesootai, faitala, ponokalafi, talapepelo, taalo faitupe, e oo lava i le soona fai o faamalositino, e faigofie lava ona tatou utia i se faataamilosaga o se mausa.

A o'ou mataua tagata matagofie, alolofa, ma i latou o loo siomia ai au o tauivi ma mausa, e le nao le lolo atu i filifiliga sese, sa ou liliu atu i tuisusiga paia ma suesuega i le taimi nei e uiga i mausa ina ia malamalama atili ai i nei uunaiga faaneura ma matafaioi.

O Vao o Mausa

O le faautautia o se mausa e mafai ona pei o le vaavaiaia o se togalaau. Tatou te le veleina vao i le taimi e tasi ma faapea ai ua uma. Ua tatou iloa o le a toe oso ae foi isi vao, o lea tatou te veleina ai ma le faaeteete e le aunoa ia vao e puipui ai ia laau.

Afai o loo tatou tauivi ma se mausa, tatou te ono lotovavai pe a toe faia tusa lava pe ua uma ona salamo ma sailia se fesoasoani. Tatou te ono ofo ma lagona le le fiafia ona e faatitino le malolosi o nei faaososoga pe a mavae ni

vaitau fiafia naua po o le faanoanoa foi i o tatou olaga. (E faapei lava ona folifoli ina tele atu vao e ola a'e pe a mavae se timu maniaia po o se afā malosi.)

O Mausa ma le Fouvale ma le Loto

Ua ou iloa e faaaoga e Satani ia mausa e fai ma "faa-maoniga" faapea tatou te fananau mai lava ma le manao i le leaga, faapea na tatou ōia lava mai le amataga pe faapea foi ua fiu le Alii ia i tatou. E faaaoga e le tiapolo le maasiasi e faalotovaivai a i tatou, ma faapea mai ai po o le a lava le tele o taimi tatou te salamo ai, e faaauau pea lava ona oo mai faaososoga.

E tele mafuaaga e lilifa atu ai tagata i mausa, ae o mausa e tele ina amata i se taumafaiga e faamalie ia "manaoa loloto e lē mafaaafetaia'ia."¹ O lea la, e ui o le fouvale e mafai ona tau atu ai i mausa ma o mausa foi e mafai ona afua ai le agasala, e tele ina totōina pe faateleina i vaivaiga nai lo le fouvale ma le loto i ai.²

Ae faafetai, ua tatou iloa o vaivaiga e mafai ona tatou maua ai le avanoa e aoao ai e uiga i le alofa tunoa ma atiina ae ai le faatuatua loloto i le mana faamalolo o lesu Keriso.³



Seia Laveai mai le Nofopologa

Tatou te maua le malamalamaaga i le faatautaiga ma le sao ese mai le mailei o mausa mai ni vaega se lua o tagata o i le Tusi a Mamona: o le nuu o Limae ma le nuu o Alema.

O ia vaega uma e lua sa nofopologa mo se vaitau umi. Sa taufai iloa e ia vaega e lua "sa leai se auala sa mafai ona latou laveaiina ai i latou lava" mai le nofopologa (Mosaea 21:5). Na taufai liliu atu ia nuu e lua, i se taimi, i le Alii mo se fesoasoani.

Sa nofopologa le nuu o Limae ona o mafuaaga faasolitulafono. E aunoa ma le saili atu i le fesoaoani a le Alii, sa faatolu ona latou tau ma o latou fili "i le ita." Sa latou faia'ina i ttau taitasi. Ina ua amata ona latou faalotomaua-laloina i latou lava, "sa tuai ona faafogofa mai le Alii i la latou tagi . . . [peitai na la] *tali* ma sa faafogofa mai ia latou tagi, ma amata ona faamalūlū loto o sa Lamanā sa amata ona latou faamāmāina a latou avega" (Mosaea 21:15; faaopoopo le faamamafa). Sa faamanuiaina i latou ona o lo latou lotomaualalo faateleina, peitai "sa lei tusa ai ma le silafaga a le Alii ia laveaiina i latou mai le pologa" seia umi se taimi mulimuli ane.

Sa nofopologa le nuu o Alema e ui i lo latou amiontonu, ae sa latou "sasaa atu o latou loto i le [Atua]." E ui i le silafaina o o latou manaoga amiontonu, ae sa faatagaina e le Atua se taimi i le va o lo latou faatagataotauaina ma lo latou laveaiina. A o faaauau ona latou faalagolago ia te la, sa la folafola atu o le a la "faamāmāina foi avega ua tuu i o outou tau'au, e oo ia te outou tou te lē lagonaina i latou i luga o o outou tua, a'o outou [i ai] lava i le pologa." I le tali atu, sa latou "gauai atu ma le loto fiafia ma le onosai i le finagalo atoa o le Atua" (Mosaea 24:12, 14, 15).

Na mulimuli ane laveaiina ia vaega uma e lua. Ua faapea foi ona folafola mai ia i tatou e faapea afai tatou te "liliu atu i le Atua i o tatou nofopologa, e "mafai ona [tatou] tutu o ni molimau mo [la] i le lumanai" ma o le a mafai ona tatou "iloa ma le mautinoa o le Alii le Atua, [e] asiasi

atu i [Ona] tagata i o latou puapuaga." (Mosaea 24:14)---ma o latou mausa!

Ia Faamafanafanaina Outou

Afai o e tauivi ma mausa, manatua, faatasi ai ma le fesoasoani a le Alii, o le taimi lea e mafai ona avea ma eleele lafulemu mo le atiina a'e o uiga paia faaKeriso. A e faateleina lou lotomaualalo, o le a mafai ona e aoaoina le onosai, agaolofa, tali-tiga, ma le agamalu.

Talanoa i ou taitai perisitua ma i latou e mafai ona ofoina atu se fesoasoani, ma faaaoga le tele o meafaiga-luega ua saunia e le Tama Faalelagi e fesoasoani ai ia te oe ia maua lou saolotoga. Faalagolago i le Alii, ao e mulimuli ma le maelega ia te la, e mafai e la ona faaliliu lenei luitau faavaivai loto ma le faafiufiu i se avanoa mamana mo le toe faaleleia faaleagaga.⁴

Fai mai se uluai Au Paia o Aso e Gata Ai i Ausetalia, ina ua ia faatusatusa lona taimi ua tuanai ma le taimi ua i ai nei: "O lo'u olaga ua tuanai [sa] o se vaomatua o vao, sa seāseā i ai se fugalaau e Tutupu mai ai. [Peitai] o le taimi nei ua mou atu le vao, a ua Fuga mai ai fugalaau i le mea sa vaoa."⁵

A oo ina tatou veleina e le aunoa a tatou togalaau ma liliu atu i le Alii i o tatou tofotofoga, o le a tatou mauaina le folafolaga na tuuina atu i le nuu o Alema: "la faamafanafanaina outou, ona o le aso a taeao o le a Ou laveai ai outou mai le pologa" (Mosaea 24:16).

Toaga pea e vele---e aoga le seleselega! ■

E alaala le tusitala i Texas, ISA.



FAAMATALAGA

1. Spencer W. Kimball, "Iesu: Le Taitai Atoatoa, *Liahona*, Mati 1980, 7.
2. Tagai 1 Korinito 15:42–44.
3. Tagai 2 Korinito 12:9, Eteru 12:27.
4. Tagai Isaia 51:3.
5. Martha Maria Humphreys, sii mai i le Marjorie Newton, *Southern Cross Saints: The Mormons in Australia* (1991), 158.



O Motugaafa e 7 mo le Faatoilalo-inia o le Faaaogaina o Ponokalafi

I le galulue ai faatasi ma le autalavou matutua nofofua e faatoilalo le faaaogaina lē mafaufau o ponokalafi, ua ou maua ai ni nai motugaafa e mafai foi ona fesoasoani ia te oe.



Saunia e Richard Ostler

na ua vaetofia au o se epikopo fou o se uarota a talavou nofofua matutua, sa i ai se laina o talavou nofofua matutua i fafo o le faitotoa o lo'u ofisa sa faatali matou te fono. Mate mai po o le a le mea sa matou talanoaina i lena uluai faatalanoaga?


Ponokalafi.

Ma mo le isi tolu tausaga, o le taumafai e fesoasoani i talavou matutua e faatoilalo se masani lē mafaufau, o se itu tele lea o lo'u valaauga, o lea sa ou iloa ai ou te manaomia ona aoao i le tele sa ou mafai. Sa ou anapogi, tatalo, alu i le malumalu, fefautuawai ma isi taitai, iloilo punaoa uma sa maua, alu i vasega mo le foiaina o mausa, ma sa ou aoao mai ia i latou sa galulue e sue se fofo. Ou te fia faasoaina atu ni manatu e tumu i le faamoemoe e uiga i mea sa ou aoaoina.

1. Iloa O Oe o se Atalii/ Afafine o ni Matua Faalelagi, O E Alolofa ia te Oe

Afai o e galue ia faatoilalo le faaaogaina lē mafaufau o ponokalafi, e te ono lagonaina pei ua tosoeseina mai oe mai le Tama Faalelagi aua ua e manatu ua e le agavaa mo le alofa po o le fesoasoani sei a vagana ua e foaina. O le mea tonu lava lena e manao ai Satani—ia faaesea mai oe mai tagata uma e alolofa ia te oe faatasi ai ma le manatu e mafai ona e faatoilaloina e oe lava ia ia ponokalafi, ma e na o le pau foi lena o le taimi o le a e agavaa ai mo le alofa.

Ona o lou natura paia, e te agavaa ai pea lava pea e maua le faamoemoe, musumusuga, ma faaaliga patino mai le Tama Faalelagi ma le mana faamalolo o lesu Keriso e faatoilalo ai ponokalafi.¹ Aua e te tosoeseina mai oe mai ia i La'ua pe mai tagata o e alolofa ia te oe.



2. Aveese le Maasiasi

Ua ou aoaoina e faapea o le aveese o le maasiasi e taua i le faatoilaloia o ponokalafi. O le maasiasi o le lagona faapei ua e masofasofa, faataumaoia, pe o se tagata leaga. O le talitonu i nei manatu faataumaoi e uiga ia te oe lava e mafai ona taofia moni ai oe e utia i se faataamilosaga o mausa. O le lagonaina o le faanoanoa mo se mea na e faia o se vaega o le faagasologa o le salamo ma e mafai ona fesoasoani ia te oe e suaia lau amio. Ae o le maasiyi e te lagona ai faapei ua leaga lou tagata atoa ma ua le mafai ona e maua se fesoasoani mai le Faaola.²

E finagalo le Tama Faalelagi ia te oe ia e maua le faamoe moe atoatoa ia lesu Keriso ma faamanuiga o Lana Togiola. O le maasiasi e tilotilo i tua ma taofiofia ai oe i se vaitaavili o pepelo ma le inoino ia te oe lava. Faamolemole ia taumamao mai le auala o le maasiasi.

3. Aua Le Vavevave e Faaaoga le Igoa o le "Mausa"

Ua toatele tagata ua faaigoaina i latou lava faapea ua fai ma "mausa" le ponokalafi. Ou te lapatai atu ia te oe ia aua nei e faaaogaina ma le le sa'o lena igoa. O le toatele o tagata talavou o e o tauivi ma ponokalafi e /e o avea moni ma mausa.³ Ma o le faaigoaina ma le le sa'o o lea igoa e ono faigata atili ai ona faamuta

le faaaogaina o ponokalafi ona o le maasiasi, tuuitiitia le faamoe-moe, ma le inoino ia te oe lava lea e aumai faatasi ai.


4. Ia Amatalia se Fuafuaga Tusitusia mo le Puipuiga

O se fuafuaga faaletagata lava ia mo le puipuiga, o se pepa o faamatatalaga e maga-tolu lea e mafai ona fesoasoani ia te oe e faatoilalo ai ponokalafi.

Vaea 1: Lisi au faaosofia. O le faaosofia o le uluai laasaga lea i le faataamilosaga lea e tata'i atu ai e matamata i ponokalafi.

E tele ni ituiga o faaosofia:

- **Tulaga Faaletino:** o siosiomaga e amatalia ai se faaosofia ona o mafaufauga po o amioga ua tuanai (e pei o le i ai i le potu lava lea e tasi po o se taimi patino o le aso)
- **Fā'atu/atuatuvalē/tuuatoatasī/o mea tutupu faafusei:** o lagona faigata po o tulaga faaletino e faaosofia ai oe e liliu atu i ponokalafi e avea o se auala e te solaese ai ma taulima nei lagona
- **O Mea e Vaaiā:** o le vaai ma le loto mama i se mea e le faaponokalafi ae faaosofia ai e ala i faasalalauga faaaga-fesootai, o tifaga, ata, ma isi mea.



Vaega e 2: Fai se fuafuaga pe faapefea ona faaitiitia ia faaosofia.

Mo se faataitaiga, afai e i ai sau faaosofia o tulaga faaletino e pei o le lagona lamatia i le tuneva o le po, o le tape o lau telefoni i le 30 minute a o lei moe, pe moe e aunoa ma lau telefoni i lou potu e mafai foi ona fesoasoani. Afai o ponokalafi o se auala e mafai ona e taulimaina ai lagona faigata, sue ni auala e taulima ai na lagona. Mata e mafai ona fesoasoani le faamalositino po o fualau ia te oe e faaitiitia ai le maualuga o lou fā'atu po o atuatuvaluga? Mata e mafai ona fesoasoani le o e tafafao ma au uo pe lesitala i se vasega inisitituti e faaitiitia ai lou tuuatoatasi? Mafaufau pe o a mea o loo e tauivi ai ma pe o a ni filifiliga e mafai ona fesoasoani ia te oe.

E le gata i lea, **aua e te manatu faatauvaa i meafaigaluega faale-agaga.** Tatalo, suesue i tusitusiga paia, auauna atu, ma le alu i le lotu ma le malumalu o ni meafaigaluega mamana e taua i le faaitiitia o faaosofia ma fesoasoani ai ia te oe ia tumau le malosi.

Vaega 3: Fuafua lelei mea o le a e faia pe a ua faaosofia oe. Mo faaosofia taitasi, tusi i lalo lau fuafuaga ma ona laasaga eseese.

Mo se faataitaiga, pe a oo ina faaosofia oe, e mafai ona tape vave lau telefoni, tesi pe valaau i se isi, alu e savalivali pe faamalositino, faitau mai le Tusi a Mamona, pe fai soo se isi mea e ono fesoasoani e toe tata'iese ai ou mafaufauga.

Tusi i lalo ia laasaga e aoga mo oe! O nisi taimi o le a mou ese atu ai faaosofia e aunoa ma le tau faia o laasaga uma o lau fuafuaga mo le puipuiga. Ae e mafai ona fesoasoani au laasaga e tosoese mai ai oe mai le taimi lea. O le taimi lava e mou ese atu ai le faaosofia, ia faafou nei loa lau fuafuaga mo le puipuiga i le mea sa aoga ma pe mafai faapefea ona fetuunai ina ia atili aoga i le isi taimi. Tuu i se mea e mafai ona e vaai i ai i aso taitasi.

5. ia Malamalama i le Sasi Laitiiti ma le Toe Faateteleina

O se sasi laitiiti o le taimi e te faia ai sina mea sese, ae vave lava ona e toe faaleleia ma faaaoga ai e avea o se aafia e aoao mai ai ina ia faaleleia atili ai lau fuafuaga mo le puipuiga. O le toe faateteleina o le taimi ua e fiu ai, nopia'i ai, ma ua e le kea.

Ila iloa o le sasi laitiiti o se vaega o le faaleleia o lau fuafuaga mo le puipuiga. Aua e te faia se faaiuga faapea ua lusi uma atu lou aluliu i luma, pe faapea ua le taulia galuega uma sa e faia---aua o la e taulia. Ia sagisagi atu ma se uiga faaalia o le faamoemoe ma ia iloa o le a i ai se aso e te latalata atili atu ai i le faaleleia atoatoa.

Afai e i ai sou sasi laitiiti, fesili ifo ia te oe lava:

- O le a le mea na tupu?
- Aisea na ese ai lea faaosofia?
- Pe na e fā'atu talu ai nei? Na faapefea ou lagona faalelagona?
- Pe na faavaivaia oe i se taimi na e le suesue ai i tusitusiga paia?
- Pe e te lei matuai faia ni faamalositino talu ai nei?
- Pe o i ai se mea i lau fuafuaga mo le puipuiga e le aoga?



- O le a se mea e mafai ona ese lou faiga i le isi taimi?

Tusi i lalo mea o loo e aoaoina ma faaaauau pea!

6. Talitonu i le Mana Faamalolo o le Faaola

E mafai ona fesoasoani Iesu Keriso ia te oe i le faagalogia faatupulaia o le salamo, ma ua ia te la le mana e mafai ai e oe pe a e taumafai e faatoilalo ia ponokalafi. E malamalamo o la i Ou lagona ma o loo faatalitali mai e aveese lena avega mai ia te oe. Aua e te manatu faapea o le liliu atu ia te la e faaopoopo atu ai i Lana avega. Ua uma ona la totogia le tau mo oe. Nai lo lena, ia e faia le mea silisili, faalatalata atili i le Faaola, ma ole atu ia te la e fesoasoani ia te oe ia faamaloloina, ia suia ou manao, ma ia avatu atili ia te oe le malosi e te agai ai i luma.

E pei ona sa aoao mai Elder Ulisses Soares o le Korama a Apostolo e Toasefululua: "A tatou taumafai e le aunoa e faatoilalo o tatou luitau, o le a faamanuiaina i tatou e le Atua i meaalofa o le faatuatua ina ia faamaloloina ma le faatinoga o vavega. O le a la faia mo i tatou mea e le mafai ona tatou faia mo i tatou lava."⁴

7. Aua e te Faia Na o Oe Lenei Mea

O fesoootaiga ma faauooga e mafai foi ona avatu ai ia te oe le mana ma le fesoasoani ia manuia. E ao ona i ai se tasi e mafai ona fesoasoani ia te oe ia tumau i lau lava matafaioi ma fesoasoani ia te oe i ou taimi lelei ma taimi e sili ona le lelei. E tatau ona latou lagolagoina oe e aunoa ma le faamasinoina o oe. Ma e mafai foi ona e tuuina atu lena lava lagolago mo i latou. Saili atu fautuaga mai taitai o le Ekalesia po o tagata o le aiga. Pe afai e manaomia, e mafai foi ona fesoasoani ia te oe se fomai faapitoa po o se fautua faapolofesa o le mafaufau ma le soifua maloloina e iloa ai mafuaaga o loo natia atonu ua e tauivi ai ma ponokalafi.

Manatua o Outou o Matua ma Taitai o a Taeao


O outou o le augatupulaga muamua o loo faafoeina i le 24/7 le maua o ponokalafi. Ou te talitonu o lenei luitau ua i ai i lona tulaga aupito maualuga i la outou augatupulaga auo o le a i ai ni a outou meafaigaluega sili atu ma le poto e taitai ese ai isi mai lenei maunu, pe a avea outou o ni matua ma taitai i se aso. "E le i tuuina mai i tatou e lo tatou Tama Faalelagi i le lalolagi ina ia toilalo ae ia faamanuiaina ma le mamalu."⁵

E ui ina e mafai ona fesoasoani nei motugaafa i au taumafaiga e faatoilalo ia ponokalafi, ae aua e te fefe e liliu atu foi i isi punaoa. E eseese uma lava foliga o malaga toefaaelelia a tagata uma. Sue po o le a le mea e fesoasoani ia te oe. Aua le fiu. Fai ia tasi le aso i le taimi. E mafai ona e faia lena mea. E te mafaia moni lava (tagai i le Filipi 4:13). Ma o le a avea oe ma tagata na tatau ona avea ai oe. ■

E alala le tusitala i luta, ISA.

FAAMATALAGA

1. Na faamatala mai e Sister Joy D. Jones le eseesege i le va o le aogā ma le agavaa i le "O Le Taua le Mafuatiaina," *Liahona*, Nov. 2017, 14.
2. Tagai Wendy Ulrich, "E Le o se Agasala Le Vaivai," *Liahona*, Apr. 2015, 23; "Maasiasi ma le Ta'usalaina: Fesoasoani mo le Iloatinoina o le Siufofoga o le Atua mai Pepelo a Satani" (digital-only article), *Ensign*, Jan. 2020.
3. Tagai Dallin H. Oaks, "Faamaloloina Mai le Mailei o Ponokarafi," *Liahona*, Oke. 2015, 52. Ua faamalolama mai e Peresitene Oaks le tulagaese i le va o maualuga eseese o le aafia ai i ponokalafi: "(1) faafua-seia le vaaia, (2) nisi taimi o le faaaogaina, (3) faateleina le faaaogaina, ma (4) le mafai ona puleaina (fai ma mausa)." E fesoasoani le mataulia e le o tagata uma e faaaogaina ponokalafi ua fai ma "mausa." O loo i ai le faamoeome mo le faatoilaloina o ponokalafi, tusa lava po o le a le maualuga o le aafia ua e i ai.
4. Ulisses Soares, "Ia Amoina o Tatou Satauro," *Liahona*, Nov. 2019, 114.
5. Richard G. Scott, "Aoao ia Iloa Tali i Tatalo," *Liahona*, Ian. 1990, 33–34.



DOCTRINAL
MASTER



Ina ua vaetofia a'u e galue

i le Misiona a Kalefonia San Bernardino o se faifeautalai faamisiona, sa matou i ai faatasi ma lo'u aiga iina. O lo'u ata lea o loo opo atu i se tasi o o'u uso ina ua uma ona vaetofia a'u. Sa avea o se malaga ia oo mai i lea taimi, ae sa ou matuā faafetai mo suiga na ou vaaia ia te au lava ia faapea foi i lo'u aiga.

O lo'u tausaga lona lua-i-le toe tausaga o la'u aoga mauluga, sa ou aafia ai i se faalavelave tau taavale matautia. A o lei tupu lena mea, sa na ona ou faia lava o mea e tatau ona ou fai. Ae ina ua mavae le faalavelave, sa toetoe lava ina suia moni o'u mafaufauga. Semanu e uma ai lava i lena taimi lo'u ola iina, ma sa ou le manao e faamuta faapena. Sa fesoasoani lo'u epikopo ia ou i ai i le ala sa'o: o le faitauina o le Tusi a Mamona i aso taitasi ma sauniuni e ave se misiona.

O le tamoe o la'u taalogia lea, o le mea sa ou faananau i ai. Ina ua mavae le faalavelave, sa le mafai ona ou tamoe mo se vaitau, ma sa ou taumafaufau po o le a se isi mea o totoe ia te au. Ae sa ou liliu atu i le Alii, ma a o ou faia, sa ou maua se vaitau maoae mo taalogia i le tausaga na sosoo ai. Sa i ai lava faigata, ae o le mea na suia o le, nai lo lo'u faia mo au lava ia, sa ou faia mo le Alii.

Na o le vaa'i atu i le tele o faamanuiaga e mafai ona maua mai le atoaga o le talalelei o le mea lea na suia ai au. O le mauaina uma o lena fiafia ma le olioli, sa ou manao ai e faasalalau atu i le lalolagi. Ua ou naunau mo tagata ia maua le olioli ua ou maua i aso uma ona o le talalelei. Ma o le ala lena ua ou auaua ai i se misiona: e fesoasoani ai "ia aumaia le tino ola pea ma le ola faavavau o le tagata" (Mose 1:39).

Garret W., 18, Karolaina i Matu, ISA

ANOTUSI



58

54 Auaunaga a Marta i Aso Taitasi

Saunia e Sam Lofgran

58 Ala Na Ou Maua ai le Faamalologa mai le Sauaga Taufeusuiga

Taofia le igoa

62 Fesili & Tali: Pe faapefea ona taulimaina le tuuatoatas? Pe mafai ona ou auaua atu i se misiona ma ni luitau o le soifua maloloina faalemafaufau?

64 O Le Upu Mulimuli: O Lo Tatou Faamoemoe, o lo Tatou Malamalama, o lo Tatou Malosiaga

Saunia e Elder Ronald A.
Rasband

65 Tagata mai le Tusi a Mamona: Uso o lareto

AUAUNAGA

a Marta



ASO TAITASI

O lenei tina ma lana tama teine e galulue malosi ia ola faatasi i le talalelei. Ma ua mafai e Marta ona ola ai e ala i le auauna atu i lona tina i ni ala tulaga ese.



Saunia e Sam Lofgran

Mekasini a le Ekalesia

O Marta e 11-tausaga le matua mai Potukale, ma e faapei foi o le tele o teineiti o lona vaitausaga, e fiifia e faalu ona taimi ma ana uo, 'ai meaai ma taalo i ana pepe taalo. E fiafia foi o ia e faalu lona taimi ma lona tina. Ae o le nonofo faatasi ma lona tina o lona uiga e fai si eseesega o le olaga o Marta nai lo isi tamaiti.

O le tina o Marta, o Sonia, sa fanau mai ma se faaletonu faaletino na faigata ai mo ia ona savali. E le pipili atoa o ia, ae na te manaomia se tootoo vaefa e pipii ai ma savali. E le mafai ona faia e ia ona lava lavalava, faataele ia lava, pe oso na o ia i lona moega. O le mea lea sa faigata ai ia te ia ona nofo na o ia. Sa mafai e Marta ona auauna atu ia Sonia mo ni nai tausaga ua mavae e ala i le fesoasoani ia te ia i mea e le mafai ona faia e ia lava.

"Ou te teu faamamaina mea ou te taalo ai ina ia mafai ai ona faigofie le fealuai o lo'u tina," o le tala lea a Marta. "Ou te faavanoaina foi ni taimi mai lo'u taalo ina ia ou siakiina ai lo'u tina ma vaai pe na te manaomia se fesoasoani. Afai ou te taalo ae valaau mai, ou te vave alu lava ona e ono avea o se mea e manaomia vave."

Ae e taumafai lava Sonia e tuu Marta e ola i le olaga masani i le mea na te mafaia. Afai e le manaomia e Sonia se fesoasoani, na te faamautinoaina o maua e Marta se taimi e taaalo ai ma ana uo.



OLA I LO LA FAATUATUA

E maua le avanoa o Marta e ola ai i le talalelei i aso taitasi e ala i le auauna atu i lona tina. Na te tauaveina le tele o tiutetauave e le masani ona maua e isi tamaiti. Mo se faataitaiga, e ala po e fesoasoani i lona tina e sauniuni mo galuega a o lei amataina aoga. A aunoa ma le fesoasoani o Marta, e le mafai e Sonia ona fealuai pe alu e faigaluega i aso uma.

E o faatasi foi Marta ma Sonia i le lotu. Sa papatisoina Sonia ina ua valu ona tausaga, o lea la na ola ae ai Marta i le Eklesia. E aoao e Sonia ia Marta e uiga i le ttau o le talalelei i aso uma. O setasi auala na te faia ai lenei mea o le i ai o ata e tele o lesu Keriso i lo la fale.

“Ou te iloa o loo soifua le Atua ma o lesu Keriso e moni,” na fai mai ai Sonia. “Ma ou te manao i tagata uma e o mai i lo’u fale ia iloa e taua tele le faatuatua ia te au. E taua foi ia te au le aoao atu o lenei mea ia Marta ina ia ola a’e o ia ma le malamalama ia lesu Keriso.”

Ua faaaoga e Marta mea na aoao ai o ia e lona tina ma o loo aoao atili foi e ia lava e uiga i le talalelei. O setasi auala e fiafia o ia e aoao ai o le faitauina lea o tusitusiga paia, lea e fesoasoani ia te ia e fausia ai se sootaga malosi atu ma le Tama Faalelagi ma le Faaola. “A ou faitau i tusitusiga paia, ou te lagonaina le i ai o lesu Keriso i o’u autafa,” na ia fai mai ai.

MAUAINA O LE MAFANAFANA

E ui ina mafai ona faigata ona tauaveina se tiutetauave tele naua, ae o le alu i le lotu i vaiaso taitasi ua fesoasoani ia Marta e maua ai le mafanafana na te manaomia ia fesoasoani atili ai i lona tina. “A oo ina fai ia tatalo e amata ai ma faaui le sauniga faamanatuga, e ese a le toafilemu” na ia fai mai ai. “A ou i ai iina, o nisi taimi ou te lagonaina ai e pei o ta’u mai e le Tama Faalelagi ia te au faapea o au o se tagata lelei ma e tatau ona avea pea lava o se tagata lelei e fesoasoani i lo’u tina.”





Soo se taimi na te lagona ai faapea, na te manatua ai lona lotofafetai tele mo lona tina. Na te lagonaina le auina mai e le Tama Faalelagi o agelu e lagolagoina o ia. "Ou te manatu e faamalosi mai o la ia te au e ala i luga ma fiafia ma mitamita i le tina ua ou maua," na fai mai ai Marta.


O se tasi o lesona ua aoaoina faatasi e Sonia ma Marta o le, e le faigofie pe atoatoa le olaga---mo soo se tagata. Fai mai Sonia, "E leai ni o'u faafitauli ou te faanoanoa ai. Ou te iloa na aumai e le Atua ia te au lenei tino ma le toto ma ponaivi faapea, ona e faapitoa lava au, ma ta'u mai e le Atua ia te au e mafai ona ou faia. Ou te faia le mea sili ou te mafai. E mafai ona ou faia isi mau mea, ae o le asō o lea e ou te manuia lava. Ou te mitamita i mea ua ou faia, i mea ua ou maua, ma mea o le a ou faia a taeao.

Ua iloa foi e Marta o le a lelei mea uma, e ui ina e mafai ona faigata le olaga i taimi, a o ia tausia lona tina. Ua ia iloa e eseese luitau o tagata uma. "E leai se olaga o se tasi e atoatoa," o lana tala lea. Ae e oo lava foi i ona lava luitau patino, e maua lava e Marta mea lelei i tulaga uma---o le la sootaga ma lona tina o se tasi lea o faataitaiga. "O lo'u tina e i ai tapulaa faaletino, ae i le mafaufau ma lagona e ese le atamai. O i ma'ua o se uo lelei tele."

VAAVAAI ATU I LUMA.

O le a la se mea o i le lumanai mo Marta ma Sonia? Fai mai Marta, "Ou te manao e latalata i lo'u tina, ma ioe, ou te fia faaipoipo, fai sa'u fanau, ma fai so'u aiga. Peitai i le lumanai, pe afai e mafai, ou te manao e faatau se fale mo lo'u aiga ma lo'u tina aua ou te le manao e mamao mai ia te ia e oo lava i se aso se tasi!"

E lagona e Sonia e i ai le faamoemoe mo le lumanai faapea foi o le ia faafetai pea e le aunoa mo le mafutaga ma Marta ma lona alofa. "E maeu le i ai o se tama teine matagofie. E ese le manaia o le i ai o Marta i lo'u olaga. O ia o se meaalofo mai le Atua. Sa la saunia ia Marta e nofo iinei faatasi ma au." ■



*Sa ou ola malu'ia. Ae
mulimuli ane sa ou aoaoina
ai e faapea o o'u taimi aupito
pogisa, sa mafai ai ona ou
faalagolago i lo'u Faaola.*

Ala Na Ou Maua ai le Faamalologa *mai Sauaga Tau-Feusuaiga*

Taofia le igoa

Sa amata ona ou malu'ia ina ua na o le fitu o'u tausaga ma sa toe faaipoipo ai lo'u tina. Sa matou fiafia lava i lo'u tamā fai fou. Sa agalelei o ia, ma sa fetaui lelei ma lo matou aiga. Sa ou lagonaina lava lo'u saogalemu i le i ai faatasi ma ia. Sa manaia mea uma seja oo i se tasi aso, ina ua taufai pisi tagata uma, sa ia sauaina faalefeusuaiga ai au.

Sa ou le malamalama pe o le a lana mea sa fai ia te au. Sa ou lagona le fefe, fememea'i, ma sa ou matua maasiasi lava. Ae sa ou fefe tele e ta'u i se tasi. Sa ou mafaufau o le a ou faaleagaina le fiafia fou ua maua e lo'u aiga ma o le a leai se tasi e talitonu ia te au. O lea sa tonu ai ia te au e aua ou te pisa.

Sa na o le tasi le taimi na ia faatiga ai ia te au, ae o le manatua o le sauaina o le a mamafa pe a i lo'u mafaufau. Sa iu ina ua ou matua masalosalo lava o le a iloa mai e se tasi lo'u tiga ma alia'e ai la'u mealilo sa ou taumafai e nanā le mea moni i le avea ai o se ue lelei i lo'u tamā fai. Sa faapitoa lona agalelei mai ia te au, ma sa amata foi ona ou toe fiafia i ai.

Ae na oo ina matua sili atu le leaga o le mea ua oo i ai. Ina ua amata ona faigaluega Tina i le po, sa amata ona faifai pea le sauaina o a'u e lo'u tamā fai. Sa ou matua lagonaina le mafatia. Sa ou manao e ta'u, ae sa matua alofagia lo'u tamā fai ma sa ou manatu ai o le a tutū tagata uma mo ia. O le mea lea i le po ina ua na o au, sa ou aioi atu ai i le Atua e fesoasoani mai ia te a'u e ufiufi la'u mealilo.

TAUTALA E TA'U

I se tasi aso sa i'u ina tuu le sauaina. Sa ou le iloa pe aisea. E ui ina sa ia lei toe faatiga ia te au, ae sa ou lagonaina pea le palapala ma le maasiasi. Sa ou inoino ia te au lava ia. O nisi taimi sa oo ina ou felafoa'i pe faigofie atu le otu nai le fesagai ma le mea moni. Sa ou manao pea e ta'u, ae sa ou fefe i le mea o le a faia e le mea moni.

Ona oo lea i se tasi Aso Sa i le lotu ina ua 14 o'u tausaga, sa ou faalogo ai i se lesona e uiga i le faia o faaiuga tetele. Sa fautuaina i matou e lo'u faiaoga e anapogi ma tatalo ma sa folafola mai o le a faamalolosia e le Atua i matou e faia le mea sa'o. Ina ua tuua le lotu, sa ou mafaufau pea e uiga i le mea sa ia fai mai ai. Sa ou mafaufau pe afai ou te fesili, pe mata o le a fesoasoani moni mai le Atua ia te a'u e ta'u?

O le aso na sosoo ai, sa ou anapogi ai mo le lototeli e ta'u ai ia Tina e uiga i le sauaina. Sa le mafai ona ou mafaufau i le aoga aua na pau le mea sa mafai ona ou mafaufau i ai o le pe faapeafea sana tali. E oo atu i le taimi na ou taunu ai i le fale, sa ou matua lagonaina le ma'i. Sa ou toe tatalo mo se malosi, aua sa ou lagona ou te lei saunia e ta'u atu ia te ia.

I lena afiafi, sa ou soso atu ai i lo'u tina a o kuka le matou meaai o le afiafi. Ou te le iloa po o le a se tala e fai atu, ae ina ua ou vaai atu i ona mata, sa ou maua le lototoa e tau ai lava ina amata ona ou tautala. O le taimi lava na ou amata ai, sa masaa uma mai ai mea sa nanā mo le tele o tausaga.

Sa ma saofafai ifo ma lo'u tina i luga o le nofoa ma fetagisi faatasi ai. Mulimuli ane, sa ma faafesootaia lo matou peresitene o le paranesi ma telefoni ia leoleo. Sa molia lo'u tamā fai i le mea sa ia faia ia te au, ma sa ou maua le puipuiga sa ou moomia---o le a ou le toe vaai ai lava ia te ia.

O LE ALA I LE FAAMALOLOGA

I le taimi lena, sa faigata ona toe faamatalala lo'u aafiaga i taitai, ma le tuufesili o a'u uo po o fea o i ai lo'u tamā fai, ae faatasi ai ma le lagolago a lo'u aiga, sa le toe tuua ai na o au. Faatasi, sa matou toe opogi faatasi i se autu fou faaleaiga: "Ou te mafaia mea uma lava i le faamalosi mai o Keriso ia te a'u" (Filipi 4:13). Sa ofoina mai e lo matou aiga lautele lo latou alolofa ma le lagolago ma, i le mavae ai o se taimi, sa amata ona faamaloloina faatasi i matou.

Sa ma o ma lo'u tina e auai i fautuaga faapolofesa, lea sa avea ma fesoasoani tele! O lo'u faufautua o le mea tonu lava lea sa ou moomia. Sa ia fesoasoani ia te au e malamalama i lagona uma sa ou lagonaina ma sa fesoasoani mai ia te au i le taulimaina o manatuaga leaga uma. Ou te lei iloaina le tele o lo'u tiga, vagana ai ina ua amata ona ou toe lagonaina le atoatoa.



Ou te lei manatu o le a mou ese atu le tiga ona ua ou tautala e ta'u, ae ou te lei iloaina foi le tele o le taimi (ma le onosai) ou te moomia ia faamaloloina ai. Aua na umi tele se taimi sa ou lagonaina ai le le agavaa. Sa tatau ona ou toe aoaoina e alofa ia te au lava.

Sa ou maua le filemu sili ina ua ou liliu atu i lo'u Faaola ma lo'u Tama Faalelagi. O le iloaina sa La'ua silafia *tonu* o'u lagona na aumaia ai ia te au le malosi ma le faamoemoe. Sa ou faalagolago ia te i La'ua i taimi aupito sili ona pogisa. Ina ua mavae se taimi umi, sa amata ona mou atu manatuaga, ma sa ou lagonaina moni le filemu e ala i le alofa o le Faaola.

O se tasi o vaega aupito sili ona tauia i le faagasologa o le faamalologa o le iloaina lea e faapea sa *i ai so'u lumanai susulu*. Ina ua sauaina au, sa le mafai ona ou manatu e i ai so'u olaga e pei ona masani ai. Sa ou lagonaina lo'u masofasofa tumau. Ae e ala mai i le fesoasoani ma le faamalologa, sa ou maua ai mea e sagisagi atu i ai. Sa amata ona ou faamatalaina la'u tala i isi teineiti o e sa tiga foi, ma sa ou filifili foi e

auauna atu i se misiona. O le faaso atu o la'u molimau i isi, na faamalosia ai au.

E le fuaina lo'u taua i mea na faia e lo'u tamā fai ia te au. Na ia suia e faavavau lo'u olaga, ae ua ou filifili e faaaoga lo'u aafiaga e fesoasoani ai i isi. E i ai lava nisi aso e faigata ai, ae e ala i mea uma, ua faamalosia ai au e le Allii, ma ou te iloa o le la fesoasoani mai pea lava ia te au. Ua suia a'u mai sē na afaina fua i sē ua laveaii. ■

AFAI O OE O SE TAGATA NA AFAINA I SAUAGA

O Le A Le Faatautala/Sauaina?

O le faatautala/sauaina o le tuulafoaiina po o le faia ma le le migao o isi (e pei o se tamaitiiti, se tagata matua, se tagata e i ai manaoga faapitoa, po o se isi lava) i se auala e mafua ai se manu'a faaletino, faalelagona, pe faalefeusuiga. E feteenai ma aoaoga a le Faaola.

"O le tulaga o le Ekalesia e le mafai ona taliaina le faatautala/sauaina o soo se ituaiga" (*Tusitalima Aoao: Auauna Atu i Le Ekalesia a lesu Keriso o le Au Paia o Aso e Gata Ai* [2020], 38.6.2) O sauaga faatautala o le solia lea o tulafono a le Atua ma faapea foi ona avea o se solitulafono o tulafono o nuu ma alalafaga.

Ituaiga Eseese o Faatautala/Sauaina

Sauaina Faalefeusuai: Amioga 'ina'inā ma le loto i ai po o amioga faasaua e se tagata i se isi, ia e afua ai manu'a o le tino.

Sauaina Faalefeusuai: O gaoioiga po o fesootaiga faalefeusuai e le'i manaomia, ma tagata e faatinoina le faatiga e ala i le fai faamalosi, faia faiga taufaamata'u, po o le faia faatautala o tagata e le mafai ona tuuina atu se ioega. O gaoioiga faalefeusuai uma i le va o se tagata matua ma se tamaitiiti o le sauaina po o le faatautala lea tusa lava po o le a le malie i ai.

Sauaina i Upu pe Faalelagona: O se mamanu o amio e osofaia ai pea lava e se tagata ma le loto i ai se tasi i auala e le tinoa, e pei o upu malolosi, faamata'uina, faapopotoina, pe faamaasia. O lea mea e afua ai se lagona tuumualaloina o le taua o le tagata lava ia ma le mamalu. E ui ina e le faaletino, ae o lenei ituaiga o sauaina e faatamaia ai se soifua manuia aoao faalemafaufau ma faalelagona o se tagata.

E Faapefea Ona Maua le Fesoasoani

Ua faamoemoeina i tatou e le Alii ina ia faia mea uma tatou te mafaia e taofia ai le sauaina ma ia puipuia ma fesoasoani atu ia i latou ua aafia i sauaga faatautala. E leai se tasi e faamoemoeina e onosaia amioga sauā faatautala. Pe o tupu i le taimi nei pe sa tupu i se taimi ua leva, e mafai lava ona e mauaina punaoa e fesoasoani ai ia te oe i le abuse.ChurchofJesusChrist.org.

SUE NEI LOA LAVA SE FESOASOANI

"Afai o loo sauaina/faatautala oe i le taimi nei pe sa faatautalaina/sauaina i le taimi ua tuanai, ia e maua le lototoa e saili ai se fesoasoani. . . . Saili le lagolago a se tasi e mafai ona e talitonuina. O lou epikopo po o le peresitene o le siteki e mafai ona avatu ia te oe faantuaga taua ma fesoasoani ia te oe mo taitai faalemalu. . . . Aua e te fefe—aua o le fefe o se meafaigaluega a Satani na te faaaogaina e faamafatia ai pea oe. O le a fesoasoani le Alii ia te oe, ae e tatau ona e aapa atu mo lena fesoasoani."

Elder Richard G. Scott o le Korama a Aposetolo e Toasefululua, "O Le Faamaloloina o Taunuuga Faataumaoi o le Sauaina po o le Faatautala," *Liahona*, Me 2008, 42.

E faapefea ona ou faagaloina lagona o le tuuatoatasi?



"O le tiga o le tuuatoatasi e foliga mai o se vaega o le poto masani i le olaga fai-tino. Ae o le Alii i Lona alofa mutimutivale ua ia faia ina ia tatou le taulimaina lava na o i tatou ia luitau o le olaga fai-tino. . . Ua uma ona folafola mai ia i tatou le mafutaga faifai pea a le sui lona tolu o le Aigaatua ma o lea e maua ai le avanoa paia e tali ai faaaliga mo o tatou lava olaga. E le o tuua lava na o i tatou!"

Sheri L. Dew, o se fesoasoanilua i le Au Peresitene Aoao o le Aualofa sa i ai, "E Le o Tuua Lava Na o i Tatou," *Liahona* Nov. 1999, 112.



Atiina A'e Au Talen

Ou te faagaloina o'u lagona o le tuuatoatasi e ala i le atiina ae o a'u taleni, pe o se mea famusika, o se mea ou te fiafia i ai, ma isi mea. E fesoasoani lena e faasalaveia ai oe mai ou lagona o le tuuatoatasi, ma e tele ina mou ese atoa atu ai. O le a tau atu ai foi i le mauaina o isi e tufa atu i ai mea e te fiafia i ai.

Steven H., 12 tausaga, Mekisiko Fou, ISA



Saili Atu i le Malamalama

Ou te sailia le lagolago, faamalosiauga, ma le alofa o le Tama Faalelagi ma le Agaga Paia e aumaia ai ia te au le filemu, faamoemoe, ma le malosiaga pe a ou mafaufau loloto, tatalo, ma faitau i tusitusiga paia. E pei ona fai mai i le 3 Nifae 11:11, o Iesu Keriso "o le malamalama ma le ola o le lalolagi." Na afio mai o la e tuliese le pogisa.

Andrea B., 18 tausaga, Zulia, Venezuela

Aapa Atu i Uo ma Aiga

Pe a ou lagonaina le tuuatoatasi, ou te fia aapa atu i a'u uo ma aiga; ou te fiafia moni ai lava. Ou te vaavaai i faamanuiaga i lo'u olaga ma faafetai i le Tama Faalelagi i le tele o mea ua la tuuina mai ia te au!

Talli N., 16 tausaga, Oregon, ISA



Manatua le Fuafuaga a le Atua

la iloa e ala i le fuafuaga a le Atua, e le manaomia ai lo tatou lagona tuuatoatasi.

E mafuta pea lava le Agaga

Paia ma i tatou, ma e silafia e le Atua mea o loo tatou tauivi ai. Na uia e le Alii tofotofoga uma ma tauiviga o loo tatou feagai. O se tasi o mea sili ona taua tatou te lagonaina i le olaga nei o le fiafia, ae e le mafai ona tatou maua le fiafia e aunoa ma le faanoanoa (tagai i le 2 Nifae 2:11). Tatalo i le Atua ma ole atu i ai mo se fesoasoani; Na te le tuulafoaiina lava se tasi o i tatou.

Brock S., 17 tausaga, Iuta, ISA

Faalagolago i le Alii

O le tuua o le aiga ae sau i Pasila mo la'u misiona sa faigata. Sa faigata ona ou tautala i le gagana! Ae ua ou aoaoina foi e faapea afai e ia te oe le Agaga o le Alii, e te le lagonaina lava le tuuatoatasi. Na te silafia oe, ma o le a fesoasoani pea lava ia te oe. Faalagolago ia te la!

Elder Joseph Tolen, 20 tausaga le matua, Misiona a Pasila Campinas

E ono iloiloina tali mo le uumi po o le manino. O tali ua lolomiina e faamoemoe mo se fesoasoani ma ni manatu tonu, ae e le o ni faalauiloaina aloaia o aoaoga faavae a le Eklesia.

O Le A Sou Manatu?

"O le a se mea e tatau ona ou faia pe afai ua ou salamo ae le mafai ona tuua lo'u mafaufau pea e uiga i le mea sese sa ou faia?"

Auina mai lau tali ma, afai e manaomia, se ata pue manino, a o lei aulia le aso 15 o Novema, 2020, i le liahona .ChurchofJesusChrist.org (kiliki le "Submit an Article po o le Feedback").



Afai sa i ai o'u luitau faalesoifua maloloina o le mafaufau, pe mafai pea lava ona ou alu i se misiona?

loe. O i latou uma ua "i ai le manao e auauna atu i le Atua . . . ua valaaaulia outou i le galuega" (Mataupu Faavae ma Feagaiga 4:3). O fea tatou te auauna atu ai e le taua tele nai lo le auala tatou te auauna atu ai. Ma soo se tasi e mafaufau e auauna atu i se misiona, o le a faia o latou suesuega faaletino ma le mafaufau.

Afai ua ia te oe le mana'o e auauna atu i se misiona, talanoa i lou epikopo. E mafai ona fesoasoani o ia ia te oe e amata le faagasologa o lau talosaga. O se vaega o lena faagasologa o le a aofia ai le feutagai ma fomai ma isi polofesa, faapea foi taitai o le Eklesia ma matua. O nei feutagaiga e le faapea ai e iloilo pe e "lava lou lelei" mo le Alii, ae ia fesoasoani e iloa ai itu sili mo lau auaunaga.

O se valaauga e auauna atu e mafai ona oo mai i soo se tasi ua i ai le manao e auauna atu. O le tofiga e te mauaina e auauna atu i se nofoaga faapitoa, pe i se auala faapitoa e mafai ona faalagolago i le tele o itu taua. O tagata e i ai luitau faalesoifua maloloina (e aofia ai le soifua manuia faalemafaufau) e taumafai i nisi taimi e taofiofi lea faamatalaga i le faagasologa o le talosaga, ma le manatu o le a fesoasoani ia i latou ia maua le tofiga latou te mananao ai. Ae afai e te faamaoni atoatoa e uiga i lou talaaga faafomai (e aofia ai lou soifua manuia faalemafaufau, o le a faamanuiaina oe e le Alii. Na te faamoemoe ia te oe e te faia mea uma e te mafai ia faaleleia ai lou soifua maloloina. Ma o le tele lava o le lagolagosua faafomai e te maua i le fale, e mafai lava ona faaauau i le galuega i le misiona.

Mo nisi faamatalaga e uiga i le soifua maloloina faalemafaufau, alu i le [mentalhealth.ChurchofJesusChrist.org](https://www.mentalhealth.ChurchofJesusChrist.org).

Mo nisi faamatalaga e uiga i misiona, e aofia ai misiona tautua, alu i le [ChurchofJesusChrist.org/callings/missionary](https://www.ChurchofJesusChrist.org/callings/missionary)

O Lo Tatou Faamoemoe, o lo Tatou Malamalama, o lo Tatou Malosiaga

Saunia e Elder Ronald A. Rasband

O Le Korama a Apostolo e Toasefululu

Inua ua faauuina a'u o se Apostolo, sa saunoa mai le Peresitene pele o Thomas S. Monson (1927–2018) o le a avea a'u ma se molimau faapitoa o le suafa o Iesu Keriso i le lalolagi atoa. Sa le'i māmā ia te a'u lena poloaiga. Sa ou matua suesueina tusitusiga paia ia iloa le Alii i Ona suafa ma faalagiga. O nei suafa uma o le a ou faasoa atu ia te outou e mai fuaiupu o tusitusiga paia ua faamanatu mai ai ia i tatou lo tatou faamoemoe o loo ia te la.

O la o le Faamoemoe o Israuelu (Ieremia 17:13), Fetu Ao Pupula (Faaaliga 22:16), Leoleo Mamoe Lelei (Mataupu Faavae ma Feagaiga 50:44), Faipule (Isaia 9:6; 2 Nifae 19:6), Alii o le Filemu (Isaia 9:6; 2 Nifae 19:6), Faaoala (Roma 11:26), Malamalama o le Lalolagi (Ioane 8:12), ma le Faitaulaga Sili i mea lelei uma e oo mai (Eperu 9:11). E Malosi o la e faaoala (Alema 34:18; Mataupu Faavae ma Feagaiga 133:47) ma o Le o i ai le mana uma (Mataupu Faavae ma Feagaiga 61:1).

O le faatosinaga ma le aafiaga o Keriso e maoae. E i ai o la iina pe a tatou vaivai ma tauvi e agai i luma. Ma afai tatou te pauu, o Lona "malamalama ua susulu i le pouliuli" (Mataupu Faavae ma Feagaiga 6:21) e pupula atu nai lo se isi lava taimi muamua. E alofa o la ia i tatou i o tatou taimi e sili ona lelei ma taimi e sili ona faigata.

O le avea ma se soo o Iesu Keriso, e le o se mea e taumatemate. O Lona ala ua faailoga lelei i Ona tulagaaaao. Pe a tatou mulimuli ia te la, o le a tatou fiafia i mea e fiafia i ai o la. A o tatou faafouina a tatou feagaiga ma la i vaiaso taitasi i le aai i le faamanatuga paia, tatou te tuputupu ae i le malamalama ia te la o le Togiola o le Lalolagi (Mataupu Faavae ma Feagaiga 93:9), o le Agaga o le Upumoni (Mataupu Faavae ma Feagaiga 93:9), ma o le Lokou (Mataupu Faavae ma Feagaiga 93:8).

Uo pele, o le Faaoala lena ou te iloaina, lea ou te alofa ma faaaloalo i ai ma lo'u loto atoa. Mai le taele o lo'u agaga ou te molimau atu ia te la ma Lona agalelei ma le alofa mutimutivale. Na la folafola mai, "O outou o a'u uo, ma o le a outou maua se tofi faatasi ma a'u" (Mataupu Faavae ma Feagaiga 93:45).


O Iesu Keriso o le tali lava lea i taimi uma i faafitauli ma luitau ia o loo avea o se vaega o lenei aafiaga i la le tino. O le malamalama ai i Lana misiona ma Lana talalelei, o lo tatou alofa mo la, ma lo tatou talitonuga ma le faalagolago ia te la, tatou te maua ai le malosiaga. ■

Mai se Faasauga ma se Pulega Aoao i se faasalalauga mo faiaoga o aoaoga faalelotu na faia i le aso 8 Feb. 2019.

Uso o Iareto



**Sa taitaia lona
aiga ma uo
mai le Olo o
Papelu i le nuu
folafolaina.**



**Sa vaai i se faaliga
ofoofogia, lea o loo
tusifaamaumauina i le vaega
ua faamaufaailogaina o
papatusi (tagai Eteru 4:4–5).**

**“O se tagata tino ese ma
le malosi, ma o se tagata
sa faapitoa tele e le Alii”
(Eteru 1:34).**



**Sa fauina vaa e
sopoia ai vasa.**



**Sa ole atu i le Alii
e pa'i i maa e 16 e
faamalamalama
ai vaa.**



**Sa talanoa ma lesu Keriso
faafesagai
(tagai Eteru 3:13–20).**

AUTALAVOU MATUTUA

*Pe o e, po o se tasi
foi e te iloa o tauivi
ma mausa? E i ai le
faamoemoe mo le suiga.*

44



TAMAITI MA LE
AUTALAVOU

PUIPUIA MA LE
FAAMALOLOGA
MAI LE SAUAINA

58, U12

AUTALAVOU

SOIFUA MALOLOINA
FAALEMAFAUFU
MA FAIFEAUTALAI
FAAOOLIOLI

63


MATUA

AOAOINA ATU
O LE SEFULUAI

U16, U18


O Le A Oo Mai I Le Tausaga Fou

Mekasini a le Eklesia mo
le autalavou ma tamaiti!
Totogi nei loa se lomiga I le
store.ChurchofJesusChrist.org
po o le faletusi tutotonu.



O LE EKALESIA A
IESU KERISO
O LE AU PAIA O ASO
E GATA AI

Uo



Na Asiasi atu
Iesu i Tamaiti i le
Tusi a Mamona


Tagai i itulau U20-22




Saunia e
Peresitene
Dallin H. Oaks
Fesoasoani
Muamua i le Au
Peresitene Sili

O Le Faamanatuga ma A'u

O le faamanatuga o le vaega aupito taua o le sauniga faamanatuga.. A tatou aai ma feinu i le faamanatuga, ua tatou folafola atu e manatua pea le Faaola. Ina ia faia le faamanatuga ia faapitoa, tatou te...



Fai o tatou lavalava e faaalia ai tatou te faamamaluina le faamanatuga.



Nonofo ffilemu a o lei amataina le sauniga.



Usu viiga o le faamanatuga.




Mafaufau ia Iesu ma folafola atu e manatua pea o Ia.

E fesoasoani le faamanatuga ia i tatou ia lagonaina le Agaga Paia. E fesoasoani tatou te tutumau i luga o le ala e toe foi atu ai i lo tatou aiga faalelagi. ●

Sii mai i le "Sauniga Faamanatuga ma le Faamanatuga," Liahona, Nov. 2008, 17–20.

Faaalia Le Alofa mo Iesu

E mafai ona tatou faaalia lo tatou alofa mo Iesu
e ala i le migao i le taimi o le faamanatuga. O le
a lau mea e fai i le taimi o le faamanatuga?



Nofo filemu.



Mafaufau i le viiga faamanatuga
ou te fiafia lava i ai.



Mafaufau i se tala e uiga ia Iesu.



Tatalo i le Tama Faalelagi.

Sa na ona manao lava
o Kali i se uo.

Tuuatoatasi i le Malologa i le Aoauli

Saunia e Stacy Lynn Carroll

(E faavae i se tala moni)

"E musumusu mai ia [Agaga Paia] i se leo mālu"
(Tusipese a Tamaiti, 56).

Sa savali atu Kali i le potu'ai i le aoauli ma tilotilo solo. Sa taufetuli sa'o uma isi tamaiti i a latou uo ma faapotopoto ai i laulau. Sa pisapisao le potu ma leo sagisagi fafia ma taliēga. Sa na o le aso lona lua lea i le aoga, ae sa foliga mai sa tofu tagata uma ma se tagata la te nonono vagana ai Kali.

Sa ia oomiina le 'au o le pusa o lana meaai, ma savali atu i se tasi o laulau. "E mafai ona ou nofo i ou autafa?" Sa fesili atu ai Kali?

Sa tepa ae i luga se teineitiiti ma lana fili uumi lanuenena. Sa tuufeula ma lulū lona ulu. "Leai. Ua i ai le tagata e nofo ai," o lana tali lea.

"Ua lelei." Sa savali atu Kali i se nofoa na avanoa ma tuu i lalo le pusa o lana meaai.

"E le mafai ona e nofo i il! O lea ou te faasaoina le nofoa lena," sa fai ane ai se tamaitiiti e tusitusi lanumeamata lona ofutino. Sa ia tuleia le pusa o le meaai a Kali i le fola. Sa taliē uma ana uo.

Sa punou ifo i lalo Kali ma toe piki i luga le pusa o lana meaai. Sa savali atu o ia i le isi itu o le potu'ai ma saofai ai i se laulau avanoa. Sa ia iloa atu se tasi mai lo latou pitonuu ma taumafai e talo atu i ai, ae sa ia toe tilotilo i le isi itu. Sa faaūū Kali. Aisea na le manao ai se tasi e avea ma ana uo?

Sa autilo ifo Kali i lana meaai. Sa lei toe fia 'ai o ia. Sa ia soloia ona mata, tapuni le pusa o lana meaai, ma savali i fafo.

O la ua taaaalo tagata
uma ma a latou uo.
Sa nofonofo Kali
na o ia i luga o se





nofoaumi ma matamata i isi tamaiti la e fafia e aunoa ma ia. Ona vaia lea e Kali se tamaitiiti pe tusa o lona matua o nofonofo na o ia i luga o le mutia. Sa fai lona ofutino lanu samasama pisipisia, ma sa tutū i luga lona lauulu i tua.

Sa tilotilo ese ia Kali. Sa ia vaia se vaega o teineiti o lana vasega o taaalo i le sikueafa. Sa ia moomoo maimau pe ana latou valaaulia o ia latou te taaalo.

Sa toe tilotilo atu Kali i le tamaitiiti. Sa faagaugau i lalo lona ulu, ma sa ia veleveleina vao sa i autafa o ona vae. Sa manatua e Kali se mea sa fai atu ai lona Tina i nisi o taimi: *Vaavaai mo tamaiti e tuuatoatasi.*

Sa faaūū Kali. O *ia* foi sa tuuatoatasi. Sa leai se tasi na taumafai e avea ma *ana* uo!

Ona mafaufau lea o Kali i le taimi sa papatiso ai i le tausaga ua te'a. Sa ia folafola atu e faalogo i le Agaga Paia. Atonu sa fesoasoani le Agaga Paia ia te ia e manatua mea na ta'u atu e lona Tina ia te ia. Atonu sa taumafai le Agaga Paia e ta'u atu ia te ia e taaalo ma le tamaitiiti ofutino lanu samasama.

Sa mapuea Kali ma tu i luga. Sa faatumulia lona loto i se lagona mafanafana. Sa ia savali atu ma nofo ifo i talaane o le tamaitiiti i luga o le mutia.

“Talofa,” sa ia fai atu ai.

“Talofa,” sa ia memumemmu atu ai.

“O le a le lanu e te fafia i ai?”

“O le . . . lanumeamata.”

“Manaia. “Ou te fafia i le lanupiniki,” na fai atu ai Kali. “E i ai se meaola e te fafia i ai?”

Na saofai sa'o teisi ae le tamaitiiti i luga ma tilotilo atu ia Kali. “Ioe. Ou te fafia lava i tainosoa.”

“E faapena foi au. E sili ona ou fafia i se tainosoa seutolu.”

Sa ataata le tamaitiiti.


Ona ta mai lea o le logo. Sa tu ae i luga Kali ma faatofa atu i le tamaitiiti. Sa ataata o ia a o savali atu na o ia i le potuaoga. Atonu e leai sana uo sili, ae sa ia lagona le fafia i lona iloa ai sa ia faia ia manaia atu le malologa a se tasi. ●

E alaala le tusitala i Iuta, ISA.




Sa ou matuai faatopetope ia ou oo i le aoga. Ae sa ou maua le lagona lea e tatau ona ou aumaia muamua se pepa chips pateta mai le fale. Ina ua uma le malologa, sa foliga faanoanoa la'u uo o Drew. Sa ou fesili ia te ia po o le a le mea na faaletonu. Sa fai mai o ia ua gallo lana meaai. Sa ou manatuaina la'u pepa chips pateta, o lea na ou tuu atu ai ia te ia. Sa fai mai Drew, “O se mea aupito manaia lea ua faia e se tasi mo au i le aoga.”

Durham M., 11 tausaga, Iuta, ISA



Talofa mai Madagascar!

O **Madagascar** o se atunuu o motu i le talafatai i sasae o Aferika. E maua ai le tele o laau ma meaola e le maua i se isi atunuu i le lalolagi--e pei o le [lemur] lima si'usi'u tavi'o lea!



Talofa, o
ma'ua o Margo
ma Paolo.

O loo ma malaga
faataamilo i le lalolagi
e aoao e uiga i fanau a
le Atua. Faatasi mai ma
i ma'ua a o ma asiasi i
Madagascar!



O tama nei o loo amoina fagu vai mo lo latou aiga. E faapefea ona e fesoasoani i lou aiga?




O Le Ekalesia e Iaitiiti i
Madagascar, ae o loo tupu-
tupu pea! O le taimi nei ua 14
uarota ma paranesi e 26 iina.





E tele ituaiga o pili'o'ua
lanu fesuiai e ola i
Madagascar nai lo se isi
lava mea i le lalolagi.




O vavae ogalaau puputa [baobab] nei e mafai ona
teu ai le tele o le vai i o latou
ogalaau---e oo i le 120,000 lita!



E toatele tagata
Madagascar e 'aai alaisa
pe faalua pe faatolu i le
aso, o nisi taimi e 'ai faa-
tasi ma fualau faisua, o
pi, po o aano o manu.

Namana!



O le upu
Madagascar
mo le "uo" o
le *namana*. A
faapea e mafai
ona e feiloai
atu i se uo fou
i Madagascar,
mata o le a le
mea e te ta'u
atu ia i latou?

Feiloai i nisi o a tatou uo mai Madagascar!

Ou te iloa o Iesu Keriso
o lo tatou Faaoela.

**Nathan, 7 tausaga,
Itumalo Antananarivo,
Madagascar**



O Russell M. Nelson, o
se perofeta a le Atua.

**Nomena, 6 tausaga,
Itumalo Antananarivo,
Madagascar**



**Pe e te sau mai Madagascar?
Tusi mai ia i ma'ua! Ma te fiafia
lava e faalogo atu ia te outou.**



**Faafetai mo
le asiaisia o
Madagascar ma
i ma'ua. Feiloai
i se isi taimi!**



O Faneva le Faifeautalai

Saunia e Marissa Widdison

Mekasini a le Ekalesia

(E faavae i se tala moni)

Sa autilo atu Faneva i fafo i le faamalamā. Si le auala pisi i fafo o lona fale. Sa mafai ona ia vaaia tagata o toso a latou taavale o fualaua faisua, alaisa, lavalava, ma isi oloa e faatau atu. Sa mafai ona ia lagona atu pu o taavale o faaee ma taifau o loo ou. Ona ia faalogoina lea o se isi leo.

“Mama, o la e i ai se tagata o loo tu’itu’i mai!” Sa valaau atu ai Faneva. Sa tatala e Mama le faitotoa. E toalua ni alii talavou e fai

o la suti ma fusiua sa tutū i le faasitepu. E lei vaai muamua lava Faneva i se tasi o laei faapea i lo latou pitonuu i Madagascar.

“O i ma’ua o ni faifeautalai mai Le Ekalesia a Iesu Keriso o le Au Paia o Aso e Gata Ai,” sa fai ane ai se tasi o i la’ua. “Ma te aoao tagata e uiga ia Iesu. E mafai ona ma faasoaa atu se savali ia te oe?”

Sa fiafia Faneva ina ua faafe e Mama i la’ua i totonu. Sa faapotopoto ane le aiga

atoa e faalogologo e uiga ia Iesu Keriso ma pe na faapefea ona toe oo mai Lana Eklesia i le lalolagi.

Ina ua uma lena aso, sa toe asiati soo atu ia faifeatalai i le aiga o Faneva. Sa la aumaia se tusi e igoa o *Tala o le Tusi a Mamona*. Sa fiafia Faneva e faitauina ma lona aiga!

O le a i ai se aso o le a avea ai au o se faifeatalai ma ou faasoa atu le Tusi a Mamona i isi, sa fai ifo ai Faneva ia te ia lava.

I se isi taimi ina ua o mai fai featalai, sa la aoaoina le aiga o Faneva i le ala e tatalo ai. Sa aoao Faneva e mafai ona ia talanoa i le Tama Faalelagi i soo se taimi, i soo se mea.

O le a i ai se aso o le a avea ai au o se faifeatalai ma ou aoao ia tagata e uiga i le tatalo. na mafaufau ai Faneva.

I se tasi aso na i ai i faifeatalai se fesili taua.

"Pe o le a e mulimuli i le faataitaiga a Iesu Keriso ma papatiso?" sa fesili ane ai se tasi o i la'ua.

Sa lagona e Faneva le fiafia i lona loto. "Ioe!" o lana tala lea.

"Ioe!" na fai atu ai lona uso ma Mama.

Sa fai atu Papa e lei saunia o ia e papatiso. Ae sa le afaina pe a papatiso uma le isi vaega o le aiga. Ma na papatisoina i latou! Sa papatisoina Faneva e se tasi o faifeatalai o lē sa aoaoina o ia e uiga ia Iesu.

O le a i ai se aso o le a avea ai au o se



faifeatalai ma ou fesoasoani ai i tagata ia papatiso, na mafaufau ai Faneva.

O se tasi o vaega aupito sili o le avea ma se tagata o le Eklesia o le alu i le Peraimeri. Sa fiafia Faneva i gaoioiga ma le feiloai i uo fou. Ae o lana mea aupito sili o le usuina lea o pese o le Peraimeri. I se tasi o Aso

Sa i le Peraimeri, sa latou usuina ai pese e uiga i le faasoa atu o le talalelei.


"Ou te fia faifeatalai nei," na pese ai Faneva. "Ou te le fia faatali sei matua."

E mafai ona ou amata faia le galuega faafafeatalai i le taimi nei, na mataulia ai e Faneva. *Ou te le tau faatali seja oo i se aso!*

Mai lava i lena taimi, sa vaavaai ai Faneva mo ni auala e mafai ai ona ia faasoa atu le talalelei. Sa ia taumafai e avea ma faataitaiga lelei. Sa ia valaulia tagata i le lotu. Sa fesoasoani o ia i ona tuaoi. Ina ua mavae ni nai tausaga, sa lava lona matua e fesoasoani ai i faifeatalai e aoao ia tagata i lona nuu. I ni nai tausaga mulimuli ane, sa faamisiona ai o ia lava---sa feiloai atu i tagata fou ma faasoa atu le talalelei, e faapei o faifeatalai sa faasoa atu ia te ia. ●



"E sii atu ia te au le faaalu o le taimi ma faifeatalai nai lo le faia o se isi lava mea," na fai mai ai Faneva. Sa valauina o ia e avea o se faifeatalai i lona nuu moni o Madagascar.



Atonu e te le vaai i ni **agelu**,
ae o le a i ai i latou iina e
fesoasoani ia te oe.

Sii mai le Peresitene Ezra Taft Benson (1899-1994),
"I Fanau a le Eklesia," *Ensign*, May 1989, 83.

Faaali ma Ta'u Atu

O le konafesi aoao o le masina lenei! O mea nei e fiafia ai nisi tamaiti e uiga i le konafesi.



Isabella B., 5 tausaga, o Kuatemala, Kuatemala



Ilse N., 5, tausaga, Nuevo Leon, Mekisiko



Gabriel F., 10 tausaga, Minas Gerais, Pasila



O Shelem, Josué, Mía, ma Ruth C., e ta'i 5, 8, 6 masina, ma le 3, Durango, Mekisiko, sa fiafia e matamata i le konafesi aoao i le fale. O se konafesi faapitoa!



O u te fiafia lava i musika a le Aufaipese a le Tapeneko. Ou te lagona ai i taimi uma lava le filemu.

Jared B., 7 tausaga, Normandy, Farani



Ina ua ou matamata i le konafesi aoao, sa ou aoao ai e uiga ia Iosefa Saimita sa faaliliuina le Tusi a Mamona ina ia tatou maua le upu a le Atua. E aoao mai a'u e le Tusi a Mamona e uiga ia Iesu Keriso.

Shalom A., 6 tausaga, Dakar Region, Senegal



O Annelle, Ruth, Sarah, ma Samira K., e ta'i 8, 2, 6, ma le 6, Littoral, Benin, sa fiafia e matamata faatasi le konafesi ma lo latou aiga.

Fai atu Leai, Faalogo i

E alofa le Tama Faalelagi ia i tatou ma e finagalo ia tatou saogalemu! O le fai atu leai pe a tatau ai, ma latou fai mai leai ia i tatou o ni auala ia e mafai ona tausisia ai lo tatou saogalemu faapea foi le s

O nisi taimi e
manaomia ona e fai
atu leai i se ala manaia.


O lou taimi lenei! Manatu-
natu e manaomia lou fai
atu leai i se ala manaia.
O le a se mea e mafai
ona e fai atu ai?

O nisi taimi e manaomia
ona e fai atu leai i se
ala e malosi atu.

"Leai, faafetai. E
mafai la ona amai se
ta vai faamolemole?"

"Ou te le fia vaai i le
mea lena! E le tatau ona
tatou vaai i ai."

O lou taimi lenei! Man-
tunatu e manaomia
lou fai atu leai i se ala
e malosi atu. O le a se
mea e mafai ona e fai
atu ai?



Le Leai

a le faaaloalo i isi pe a
saogalemu o isi.

O nisi taimi e ta'u mai
e tagata ia i tatou e
leai ina ia fesoasoani
ia tatou saogalemu
ma ola maloloina.



"E faamalie atu, e le
mafai ona e alu. E
le saogalemu."


O nisi taimi e ta'u mai e
tagata ia i tatou e leai pe
a le lelei o latou lagona.

O lou taimi lenei! Manatu-
natu ua ta'u atu e se tagata
matua ia te oe e leai ae e
te le fafia ai. O le a se mea
e tatau ona e faia?



"Tuu! Ou te le fafia
i le taaloga lea."

O lou taimi lenei! Manatu-
natu ua talosaga atu se tasi
ia te oe e tuu le faia o se
mea. O le a se mea e tatau
ona e faia?



Ae faapefea pe afai e le faalogo tagata pe a e
fai atu leai? E faapefea pe a latou faatiga ia te
oe pe faia se mea e le lelei?

- ★ Savali ese pe a e mafaia.
- ★ Ta'u i se tagata matua e te talitonuina
e uiga i le mea ua tupu.
- ★ Manatua e le o oe na mafua ai.
- ★ Po o le a lava le mea e tupu, ia e iloa
e alolofa pea lava lou Tama Faalelagi
ma Iesu Keriso ia te oe!

Valaau Tamā

*Afai ou te vilia malosi, na
manatu ai Yu, e mafai ona ou
taunuu i le fale a o lei lolovaia
ia magaala.*

Saunia e Julie Cornelius-Huang

(E faavae i se tala moni)

E alala le tusitala i luta, ISA.

"Ia fiafia o le a taitaia outou i le ala"

(Mataupu Faavae ma Feagaiga 78:18).

Sa laa ese Yu mai se aoga tumaoti i le alasavali pisi. Sa tumu lona ulu i mea tau matematika mai lana vasega o le aoga afiafi. Sa faanatinati ane tagata ma o latou faamalu. Sa vave le toulu ifo o mataua lapopoa o le timu ma sa lolovaia le magaala.

Sa laa ane foi i ona autafa le uo a Yu, o Lin. "E tatau ona valaau lou tama e sau e piki atu oe," o le tala lea a Lin. "Fai mai Mr. Zhang o la ua tatafe ni vaega o le aai."

"E mafai ona ou alu lava au i le fale."

"Ae sei vaai atu i vai uma na!". Sa fai atu ai Lin ma tusi atu i le vai ua tatafe mai i le alavai.

Mo sina taimi, sa i ai se lagona mālie ia Yu. Mata e sa'o Lin? Atonu ua *tatau* ona ia valaau i lona Tamā e momoli ia i le fale a o lei tatafe magaala. Ae sa



fai le la feupuaiga ma lona Tamā anapo, ma o la lava sa ita Yu. Sa le'i mamao o ia e fai i lona Tamā mo se fesoasoani.

Sa tatala e Yu lana uila ma faatofa loa ia Lin. *Afai ou te vili malosi*, na manatu ai o ia, e mafai ona ou taunu i le fale a o lei lolovaia ia magaala.,

Sa ia vili malosi, ae e lei umi ae maluluina ona lima, sa susū pala ona ofu, ma sa vaivai o ia. Sa toe oo mai le manatu e valaau Tamā. Pe mai le Agaga Paia lea lagona? Sa fai atu ia faifeautalai ia na papatisoina o ia, e mafai ona avea le Agaga Paia ma ona taiala. Sa sioa a'e Yu i le lagi. Sa matua aupouli ma sa ia le iloa atu tumutumu o fale. Ae sa ia le fiafia pea lava i lona Tamā.

Sa le amanaiaina e Yu le lagona ma vili pea. Sa oo ina maualuga tele le vai ma sa tapunia e le au faioloa o latou faleoloa. Sa la'u e tagata a latou meatotino i falealuga e maualuluga atu. Sa iloa atu e Yu se tina o tulei atu lana fanau e toalua i le lolo i totonu o se tama'i vaa pa'u.

Ona ua i luga a'e o ona tapuvae le vai, ua le toe mafai ai e Yu ona vili lana uila. Sa oso ifo i lalo ma tulei. Atonu ua tuai tele ona valaau i lona tamā i le taimi nei, ma o loo timu pea lava. Sa pāpā faititili ma feemo uila i ona luga a'e. Sa lagona e Yu le fefe. Ma sa matua lelava o ia! Sa ia tilotilo atu i luma. Sa mamao lava le fale. Sa le tatau ona ia le amanaiaina le Agaga Paia ona o se feupuaiga faavalevalea.

Sa tu o ia Yu e fai sina tatalo puupuu. Sa le mafai

ona ia lagona lona leo i le mamafa o timuga ma faititili, ae sa ia iloaina e mafai ona lagona mai o ia e le Tama Faalelagi.

“Le Tama Faalelagi,” na tatalo ai Yu. “Faamolemole fesoasoani mai ia te au ia ou taunu saogalemu i le fale.” Ina ua uma, sa ia lagonaina ua lava le malosi e faaaauai ai pea.

Na iu, ina mafai e Yu ona vaaia lona fale i luga o le mati'e. I le malulu, lelavā, ma na misi se seevae, sa faataupepe atu ai Yu i luga o le mati'e. Sa ia vaaia Tamā o faatalitali mai mo ia i fafo. Sa faatopetope ane Tamā e faafetaia'i ia te ia, ma āsaāsa atu i le vai a o ia tamo'e.

Ina ua pa'i atu Tamā ia te ia, sa ia opo atu ia Yu. “Sa ou matuai popole lava!” Na fai atu ai Tama. “Sa tatau ona e valaau mai ia te au!”

“Faapea lava a'u sa ta taufai ita le tasi i le isi,” na fai atu ai Yu.

“E le taitai lava ona ou ita tele e le mafai ai ona ou fesoasoani atu ia te oe,” na fai mai ai Tamā. Ona ia aveina lea o le uila a Yu ma tulei i le vaega uma na totoe o le ala i luga o le mati'e.

E ui i faititili sa laulogo i le va o fale uumi ma timuga mamafa sa pasasa i lalo, ae sa faatumuina lava le loto o Yu i se lagona mafanafana. Sa ia lagonaina le filemu ma le saogalemu ao ia mulimuli atu i lona Tamā i le fale. ●



“Sa silafia e lo tatou Tama i le Lagi o le a tatou feagai ma luitau i le olaga nei. . . . Ina ia aumaia ia i tatou le malosi faaletino ma le taitaiga faalelagi, ua la tuuina mai ai le Agaga Paia.”

Elder Ronald A. Rasband o le Korama a Apo setolo e Toasefululua, “Tuu Atu i le Agaga Paia e Taitai,” *Liahona*, Me 2017, 95–96.

O Peso o le Sefuluai

Saunia e Alan Iván Ruiz Ontiveros

(E faavae i se tala moni)



Sa alapo Sofia. O le asō o se aso faapitoa tele.
Ealu o ia e faatau vaitipolo i mea faatau atu i
le faletaavale a le uso o lona tina ma lona toalua!
Sa fai e lona tina se sioki telē o le vaitipolo mo ia.

 Sa fai e Sofia se faailo. Sa ia tusia le "Vaitipolo"
i mataitusi lanumoli ma le samasama. Sa ia

faapipiina i se tamai laulau. Ona ia saofai lea i lalo e faatalitali.

E lei pine ae sau se tamaloa. "E mafai ona aumai sa'u ipuvai?" na ia fesili atu ai. Sa ia tuuina ni nai peso i lana fagu.

"Ioe!" Na fai atu ai Sofia. Sa ia ligiina se ipu vaitipolo ma ia.

Sa gasolosolo mai tagata e matamata i mea sa faatau i le faletaavale. Sa gasolosolo mai foi ma faatau le vaitipolo manaia. Sa mou fiafia atu le taeao. E lei umi ae uma le vaitipolo.

Na lūlū e Sofia lana fagu. Sa tatagi ia peso. Sa matuai tele lava ana peso!

"Ta'i Lelei!" Na fai atu ai Papa.

Sa lei tele muamua ni tupe a Sofia. "O le a ou faatauina se yo-yo!"

Sa ataata Papa. "E te iloa le mea ma te faia ma Mama pe a maua ni ma tupe?"



Na lūlū lona ulu.

"Ma te totogia le sefuluai," na fai atu ai Papa. "Na aumai e le Tama Faalelagi ia i tatou mea uma. Ua Ia poloai mai e toe avatu ia te Ia sina vaega itiiti. Ma te totogia sefuluai aua ma te alolofa ia te Ia."

Sa ataata Sofia. Sa manao o ia e faali atu i le Tama Faalelagi e alofa foi o ia ia te Ia.

Sa fesoasoani Papa ia Sofia e faitau ana peso. O taimi uma na te faitau ai i le 10, na te tuuina ai se peso se tasi i totonu o se teutusi. Sa fesoasoani Papa ia te ia e tusi ia fuainumera i luga o se tamai fasipepa paepae. Sa la tuuina le pepa i totonu o le teutusi faatasi ma peso. Ona la tapunia ai lea ma faamau. O le a tuuina atu e Sofia i le epikopo a taeao i le lotu.

"O a ni ou lagona?" Sa fesili atu ai Papa ia Sofia.

"Ua matuai ou fiafia lava! A o lea lava e i ai a'u tupe mo le yo-yo." Sa ia lagonaina ua fiafia le Tama Faalelagi i lana filifiliga. •


E alaala le tusitala i Chihuahua, Mekisiko.



Taimi o le Sefuluai

Ua poloaiina i tatou e le Tama Faalelagi e totogi sefuluai. O lona uiga e avatu le tasi vae sefulu o tupe tatou te maua. E mafai ona e faaaogaina le itulau lea e faataitai ai!

Faitau tupe siliva. Mo ta'i 10 uma e te faitauina, valivali le tasi. O tupe siliva e valivali o mea na e te totogi atu o le sefuluai!



Ua e saunia mo se mea e faigata teisi atu? Faaopoopo tupe o loo i lalo.

Ona valivali lea pe fia tupe o le a e totogi atu o le sefuluai. (Manatua, mo ta'i 10 uma, e te foai atu le tasi.) ●





Saunia e
Elder Edward Dube

O Le Fitugafulu

"Faaaoao ia te au . . . ona maua lea e outou le malologa mo o outou agaga" (Mataio 11:29).

Na aumai ia te a'u e se tamaloa ou te faigaluega ai se kopi o le Tusi a Mamona. Ae ou te lei faitauina mo le toeitiiti lua tausaga. I se tasi Aso Sa, sa ou tago ai i le Tusi a Mamona ma ou alu i se ala o nofoaafi i fafo atu o le taulaga sa ou nofo ai i Zimbabwe. Sa ou nofo i lalo ma amata ona faitau.

I le taimi muamua, sa faigata ona malamalama ai. Ae sa ou toe faitau ma toe faitau i le molimau a Iosefa Samita. Sa tuia lo'u loto i ana upu.

Mulimuli ane, sa valaaulia au e se tasi ou te alu atu i le lotu. I le taimi muamua, ou te lei maua se lagona lelei, o lea sa ou nofo ai i le laina pito i tua. Ae ina ua amata

Faasoaina Atu o le Talalelei

ona faasoai mai molimau a tagata e uiga i le Faaola o Iesu Keriso ma le Tusi a Mamona, sa ou lagonaina se mea matagofie i totonu.

E lei umi lena, ae o mai faifeautalai i lo matou pitonu. Sa lei umi ae ou papatiso. Na mayae ni tausaga mulimuli ane, sa ou maua le faamamaluina i le auauna atu i se misiona ma faasoai atu le talalelei i le toatele o isi.

Ua matuai faatupulaia le Ekalesia i Zimbabwe. Ae o loo tele pea mea e mafai ona tatou faia e faasoai atu ai le talalelei, tusa lava po o fea tatou te nonofo ai. E ala i tatalo, suesue o tusitusiga paia, ma afiafi faaleaiga, e mafai ona e faatupulaia lau molimau ma tumau vavalalata i le Tama Faalelagi. O lau molimau e mafai ona faamanuiaina ai olaga o le toatele o tagata i le lalolagi atoa. ●



O Tagata Faamaoni na Mulimuli ia Iesu




Ina ua asiasi atu Iesu i tagata sa Nifae, na ia aoao atu i latou e uiga i le papatisoga ma le ala e tagofia ai le faamanatuga. Na ia faatuina Lana Ekalesia.




Sa faamanuiaina e Iesu tamaiti taitoatasi. Na o mai agelu! Sa faamalolo e Iesu ia tagata ma sa tatalo mo i latou. Ona Ia toe foi ai lea i le lagi.



Ina ua maliu ese Iesu, sa faia pea e tagata mea sa Ia aoao atu ai. Sa galulue faatasi tagata uma ma fefaasoai mea sa latou maua, o lea sa leai ai se tasi e mativa. Sa faamanuiaina e taitai o le Eklesia i latou o e sa mama'i.




Nai lo le tauaimisa, sa filifili tagata e fealofani. Sa mulimuli tagata uma i tulafono a le Atua. Ma sa latou fiafia mo se taimi umi!




O le a sili atu le fiafia o lo'u olaga pe a ou mulimuli i poloaiga a le Atua. E mafai ona ou faasoa atu mea ua ou maua i isi. E mafai ona ou fesoasoani i tagata ia fealofani. ●

Faitau e uiga i lenei mea i le 3 Nifae 17 e oo i le 4 Nifae 1.

Sa Ola Fiafia Tagata



O le a se mea e mafai ona e
faia e fesoasoani ai i lou aiga
ia fiafia?



O LE EKALESIA A
IESU KERISO
O LE AU PAIA O ASO
E GATA AI

Matua Pele e,

E tatau ona puipuia tamaiti uma ma tausia. Na faatuina e Iesu se faataitaiga o lenei mea i le Tusi a Mamona, faamanuia ma tatalo mo tamaiti taitoatas (tagai i itulau U20–23). E mafai faapefea ona tatou faamanuia ma puipuia tamaiti tatou te iloa? O nisi nei o manatu:

- E mafai ona tatou puipuia i latou faaletino ma aoao i latou ia faaaloalo i tino o isi tagata (itulau U12–13).
- E mafai ona tatou fesoasoani ia puipuia i latou faaleagaga e ala i le fautuaina o i latou e aai ma feinu i le faamanatuga (itulau U2–3).
- E mafai ona tatou aoao i latou e fesili mo se fesoasoani pe a latou manaomiaina (itulau U14–15).

E mafai ona e pikiina se tasi o nei savali e faitau faatasi o se aiga. Ia mautinoa e iloa e lau fanau le tele o lou alofa ia i latou!

Matou te alolofa ia te outou,

O Le *Uo*

AUINA MAI ATATUSI PO O SE AAIFIAGA O LOU ALO I LE LIAHONA

Alu i le liahona.ChurchofJesusChrist.org ma kiliki le “Submit an Article or Feedback.” Pe imeli mai foi ia i matou i le liahona@ChurchofJesusChrist.org faatasi ai ma le igoa o lou alo, tausaga o le matua, aai e nofo ai, ma lenei faamatalaga faataga: “O a'u, o [tuu i ai lou igoa], ua tuu atu le faataga i le Ekalesia a lesu Keriso o le Au Paia o Aso e Gata Ai e faaaoga ai le tusiga a la'u tama i mekasini a le Ekalesia, i luga o upega tafailagi a le Ekalesia ma faasalalauga faaleagafesootai, ma atonu i isi anomea a le Ekalesia.” Matou te fia faalogo atu ia te oe!



Saili le Liahona o loo nanā i totonu!

ANOTUSI

- U2** Mai le Au Peresitene Sili: O Le Famanatuga ma A'u
- U4** Tuuatoatas i le Malologa i le Aoauli
- U6** Talofa mai Madagascar!
- U8** O Faneva le Faifeautalai
- U10** Manatu Lelei
- U11** Faaali ma Ta'u Atu
- U12** Fai atu Leai, Faalogo i le Leai
- U14** Valaa Tamā
- U16** O Peso o le Sefuluai
- U18** Meamalie: Taimi o le Sefuluai
- U19** Uo i le Uo: Faasoaina Atu o le Talalelei
- U20** Tala Faatusipaia: O Tagata Faamaoni na Mulimuli ia Iesu
- U23** Itulau e Valivali: Sa Ola Fiafia Tagata